

# NZAMBI ME MONANA



Beto bikana ya kutelema kaka mwa ntangu fyoti na yina beto ke kulumusa bayintu ya beto samu na kisambu.

<sup>2</sup> Mfumu ya beto ya kufuluka na Lemvo, beto ke vutula kieleka matondo bubu yayi samu na bweso yayi yina beto me kuzwa ya kuvukana beto mosi kintwadi na zulu ya ntoto na ntwala ya Nkwizulu ya Mfumu. Bika ti beto kufyongonina bantima ya beto bubu yayi, na nzila ya Ndinga ya Nge, mpe kumona kana beto kele na kati ya Lukwikilu, ti beto lendaka vwanda ya kukubama, yina, na ngunga ya Kumonika ya Yandi. Ti beto ke vwanda mutindu Masonuku tubaka, “Beto ke bakama kintwadi, na bayina kele ya kulala, mpe ke kutana na Mfumu na mipepe mpe ke vwanda kukondwa nsuka na Yandi.”

<sup>3</sup> Beto ke tonda Nge samu na Mpeve ya Buklisto ya kieleka yina kele dyaka na yinza, na kati ya bantu, ti bawu ke kwikila dyaka na Nge mpe na Ndinga ya Nge. Na yawu beto ke lomba balusakumunu ya Nge na zulu ya beto bubu yayi, ti Nge ke nokisa na mosi na mosi ya beto yina beto ke na yawu nsatu, ti beto lendaka kuzwa maza na nzila ya Ndinga, ti beto lendaka kukula na kukuma bisadilu ya mfunu na maboko ya Nge, samu na kilumbu yayi ya nsuka. Samu beto me lomba yayi na Nkumbu ya Mfumu Yesu Klisto, Muvungi ya beto ya nene, yina beto zola kutalana. Amen.

Beno lenda vwanda.

<sup>4</sup> Mu zola kutuba ti mu ke tala yayi mutindu bweso mosi ya nene na suka yayi na kuvwanda dyaka awa. Mpe mu ke lomba lemvo ti beto kele na bisika mingi ve ya kuvwanda. Mpe beto ke meka awa, na nkokila yayi, na kuzwa bisambu ya bambevo; bubu yayi, na suka yayi, ya ke vwanda mwa mpasi.

<sup>5</sup> Mpe—mpe mu zolaka kubaka na bande Nsangu yayi bubu yayi. Mu. . . Ya ke talana mutindu ti Mfumu ke tala yawu na munu, oh, ya me kuma ngonda mosi to zole me luta, mpe ya kele yinda. Mpe mu ke kuzwaka ntangu mingi ve na balukutakanu, samu beto ke kuzwaka baminuti makumi tatu, to makumi yiya ya kisalu. Mpe kuna beto. . . Samu bantu fwana kwenda na bisalu mpe nyonso, mu me tala yawu mbote mingi ti mu kumisa nkufi Bansangu ya munu. Mpe kuna na ngaanda bawu kuzwaka ve ntangu ya kubaka yawu na bande, na yawu mu banzaka ti mu ke vingila kaka tii ntangu mu ke kuma na tabernacle awa mpe kuna kubaka yawu na bande awa. Mpe ya kele mwa yinda mingi, mpe mu zaba ti beno kele ya kutelama, mpe mu—mu ke sala kaka nswalu mutindu mu lenda. Mpe, ntangu yayi, ya ke kwamisa munu ve kana beno kupesana bisika ya kuvwanda, to nyonso yina, yina ke—yina ke vwanda ya kulunga mingi na munu

samu ti yayi kele kilumbu mosi ya mfunu ti beto ke sala kaka babande yayi.

<sup>6</sup> Mpe na yawu beto me kuzwa bansangu ya nene ya yina Mfumu me sala na ngaanda na bilanga ya kumwangisa nsangu, kasi na kutala beto ke zonzila mingi na yawu na nkokila yayi ntangu beto lenda pesa ntangu mingi na zulu ya yawu, kuzwa ntangu mingi ya kuzonzila.

<sup>7</sup> Mpe ntangu yayi beto ke na kivuvu ti Mfumu ke sakumuna mosi na mosi ya beno. Mu zaba ti bantima ya beno kele ya kufuluka na kyese, ke na kuingila Nkwizulu ya Mfumu. Ya munu mpe, me fuluka, na kumona bima kusalama mutindu yawu kele. Mpe—mpe kuswana ya bayinsi, mpe dibuundu na mutindu na kati ya yina yawu kele, mpe kumona bidimbu ya Nkwizulu ya Yandi, na mitindu nyonso zole na nzutu mpe na kimpeve, mpe na kuzabaka ti ntangu yayi ya Kumonana ya Yandi me belama mingi, ya ke fulusa kaka bantima ya beto na kyese na kuzaba ti beto ke soba mosi ya bilumbu yayi. Beto ke soba na bivangu yayi beto kele.

<sup>8</sup> Ntangu yayi, mu banza, kana mu vwanda me kuwa mbote, ba kele ya kuvukana kisika mosi na alo-alo, ti Nsangu yayi ke na kwenda na Phoenix mpe na—mpe na bizunga yankaka, na nzila ya alo-alo. Mpe na yawu ntangu yayi beto ke na kivuvu ti kana ya kele kieleka. . . mu zaba ve; ba me tubila munu yawu kaka ntete mu kota. Mpe—mpe bantu nyonso kuna ke na kusepelaka mingi mavimpi ya mbote mpe—mpe Nkembo ya Mfumu na zulu ya bawu.

<sup>9</sup> Mpe ntangu yayi—ntangu yayi beto ke zibula Ndinga ya Mfumu. Mpe samu na yina beto nyonso kele awa kele samu beto mosi kusepela mpe ke sala keba na yina beto kele. . . Beto—beto ata mbala mosi ve me kwizaka awa mpe beto kele. . . Ata muntu yina kele awa zabaka ti muntu nyonso zolaka vwanda na tiya ya mutindu yayi, mpe kaka na dibanza ya kuvwanda awa. Beto kele awa samu na lukanu mosi, mpe ya kele, “kutambula pene-pene na Nzambi.” Yawu yina nyonso beto lenda sala, ya kele kukwikila Mfumu Yesu kele na beto. Mpe beto kele awa samu—samu na kutambula pene-pene na Yandi.

<sup>10</sup> Ntangu yayi tiya yayi ke zikisa munu mwa mingi. Na kutala mu me mesana na tiya yina ya kuyuma kuna na Tucson, yina kele. . . Madidi yina kele awa ntangu yayi; kuna tiya ya beto kele tiya mingi kulutila, kasi ya kele ya kuyuma. Madidi ya beto ntangu yankaka ke kumaka mosi ya makumi zole ya nkama mosi, mu banza, kima ya mutindu yina, ya kele kaka na kutala mutindu kuzinga na yisi ya tenta ya oxygène. Kasi awa ya kele na madidi na kati ya yawu, mpe yawu ke sala kaka beno kuwa mutindu “me kufwa ya muvimba,” mutindu beto vwanda zonzaka yawu. Na yawu ya kele mpasi na zulu ya beno, na yawu mu zaba yawu, mpe beno bamama na mwa babebe mpe

beno bantu kele ya kutelama, biboba mpe bantwenya, mpe ya kufyetama kintwadi mutindu beno kele. Mpe ntangu yayi beto ke—beto ke na kivuvu ti Nzambi ke futa beno mingi samu na munkayulu ya beno.

<sup>11</sup> Mu me kuwa ti Mpangi Roy Borders kele kisika mosi awa. Mu vwanda me kuwa yandi kuzonzila yawu, kasi mu banza ti yandi me lenda ve na kukota. Mbote mingi. Yandi kele manadzwele ya balukutakanu.

<sup>12</sup> Na yawu ntangu yayi beto zola mpe kusamuna ti mpangi mosi yina vwanda vwandaka na kati-kati ya beto me kwenda vwanda na Mfumu na suka yayi, bakala mosi, Mpangi Jackson ya Sturgis, na Michigan. Muntu ve me zaba mutindu yandi me kufwa to yina me tadila yawu. Yandi vwandaka kaka mbote, mpe yandi vwandaka kaka . . . Mu banza ti bawu me kuta yandi ya kufwa, to kima mutindu yina. Mu—mu me kuzwa ve bansangu nyonso ya yawu. Mpe beto ke vutula matondo mingi na Nzambi ti Mpangi Jackson vwandaka Muklisto. Ya me kuma bamvula mingi ti mu me mona yandi ve, kasi yandi me vwanda na kati-kati ya beto mpe yandi kele mosi ya beto. Ti Nzambi pesa kupema na moyo ya yandi ya kikesa! Na kukwendaka mutindu yina, beto ke kwikila ti ya lendaka vwanda kima mosi, ti ya vwandaka ntangu samu na yandi na kukwenda. Mfumu ata mbala mosi ve kebisaka beto na yawu, to yandi mosi na yawu, yandi me kwenda kaka. Ya kele mutindu yina ya me salama. Mpe mu zola kubokila kento ya yandi na yina kaka mu ke kuzwa ntangu, mpe kutuba na yandi mawa ya beto. Mpe beto nyonso zola kuvutula matondo na Nzambi samu na luzingu ya yandi ya kikesa ya Buklisto, mpe yina yandi zola kutuba awa na zulu ya ntoto, mpe mingi-mingi samu na beto na kimvuka yayi awa.

<sup>13</sup> Ntangu yayi na nkokila yayi, mu samunaka ti ya ke vwanda na kusambila bambevo na nkokila yayi, mpe mu ke zonzila mingi na zulu ya bambevo na nkokila yayi.

<sup>14</sup> Kasi samu na ntangu yayi, beto kota mbala mosi na kati ya Ndinga na ntangu yayi, samu ti bantu mpe tiya kele mingi. Beto ke kwenda mbala mosi na Ndinga. Mu zola kutanga na bisika zole ya Masonuku na suka yayi, ya kele yinda, na yawu yina ke pesa munu mwa lufulu na zulu ya yina mu zola kutubila.

<sup>15</sup> Mpe, ntangu yayi, mu zola ti bawu bumba ntete bande, Mpangi Sothmann mpe bayankaka, ntete na kutekisa yawu, kana ya lenda salama, mpe mu—mu ke zola kuwa yawu ntete beto . . . ntete yawu basika na ngaanda na bantu nyonso.

<sup>16</sup> Ntangu yayi na . . . Mu zola kutanga na Phillipiens, kapu ya 2, na 1 tii na 8; mpe ya Zole ya Corinthiens 3, kubanda na 6, mpe kutanga kapu ya 4 ya Zole ya Corinthiens, kaka samu na lufulu. Ntangu yayi na Phillipiens, kapu ya 2, mu ke tanga ntete.

Ntete kutanga, beto sambila.

<sup>17</sup> Mfumu Yesu, Ndinga ya Nge kele Kieleka. Mpe na kati ya ngunga yayi ya kuningana yina beto ke na kuzinga, yinsi mosi ke telemina yinsi yankaka, bimbevo ya ngolo, kuningana ya ntoto na bisika mingi, bantima ya bantu ke na kubwa, boma, beto ke mona kisono na zulu ya kibaka. Ntangu yayi, yina kele na kitezo ya yinza, ti yinza nyonso fwana mona yayi. Kasi ntangu yayi ya kele na kitezo ya kimpewe, mpe, mpe beto ke mona bima ya nene kusalama, mpe beto zola kuzonzila na yawu bubu yayi.

<sup>18</sup> Sakumuna Ndinga ya Nge na ntima ya beto. Beto zaba ti ya kele ve na muntu na Mazulu to na ntoto yina kele ya kulunga na kubaka Buku yayi, samu na kukangula Bidimbu, to mpe, na kutala Yawu. Kasi ya vwandaka na Mosi yina monikaka, Mwana ya dimeme yina kufwaka, ya fulukaka na menga, yina kwizaka mpe bakaka Buku, mpe vwandaka ya kulunga mpe na kiyeka ya kuzibula Yawu. O Mwana ya dimeme ya Nzambi, zibula Ndinga ya Nge na bantima ya beto bubu yayi, samu na beto kuzwa kubomba. Beto kele bisadi ya Nge. Lemvokila masumu ya beto, Mfumu. Mpe kima nyonso yina lendaka kanga Ndinga na kubasika na ngolo ya nene mpe ya kuyala bubu yayi na baluzingu ya beto, katula yawu, Mfumu, kikaku nyonso, ti beto lendaka kuzwa nzila ya muvimba ya balusakumunu nyonso yina silamaka na beto na nzila ya Ndinga ya Nge. Beto me lomba yawu na Nkumbu ya Yesu. Amen.

<sup>19</sup> Phillipiens ya 2:

*Na yawu kana ya kele na mwa kubomba na kati ya Klisto, kana ya kele na mwa kukindisa ya zola, kana ya kele na mwa kubundana ya Mpeve, kana ya kele na mwa mawa mpe kyadi,*

*Beni sala kyese ya munu, ti beni vwanda na dibanza mosi, ti beni vwanda na zola mosi, ti beni vwanda na ntima mosi, na—na mpeve mosi.*

*Ti kima ve kusalama na nzila ya kuswana to na nkembo ya mpamba; kasi na kukikulumusaka ya mpeve ti mosi na mosi kutala mpangi ya kulutila bawu mosi.*

*Ti mosi na mosi ya beni na kisika ya kutala kaka ndandu ya yandi, kutala mpe ndandu ya bampangi.*

*Ti dibanza yayi kuvwanda mpe na kati ya beni, yina vwandaka na kati ya Klisto:*

*Yandi yina, vwandaka na mutindu ya Nzambi, kasi yandi talaka yawu ve mutindu lukumu ya kufwanana na Nzambi:*

*Kasi yandi talaka ve na yina yandi vwandaka, mpe kumaka mutindu kisadi, mpe fwananaka na bantu:*

*Mpe na kutalanaka mutindu muntu, yandi kukikulumusaka, mpe kumaka ya kulemvuka tii na lufwa, mpe tii na lufwa ya kulunsi.*

<sup>20</sup> Ntangu yayi kana beto lenda baluka ntangu yayi na ya Zole ya Corinthiens, kapu ya 3, beto ke banda na nzila ya 6, mpe kutanga yayi tii na kapu ya 18, mpe beto ke baka ndambu ya kapu ya 4.

*Yina mpe me sala beto milongi ya kulunga ya Ngwisani ya malu-malu; ya mukanda ve, kasi ya mpeve: samu ti mukanda ke kufwaka, kasi mpeve ke pesaka luzingu.*

*Kasi kana kisalu ya lufwa, ya kusonama mpe ya kusonikaka na zulu ya matadi, vwandaka na nkembo na mutindu ti bana ya Israel lendaka ve kutala kizizi ya Moise samu na nkembo ya kizizi ya yandi; ata ti nkembo yina vwandaka luta:*

*Wapi mutindu kisalu ya mpeve ke vwanda ve kulutula nkembo?*

*Samu ti kana kisalu ya kitumbu me vwanda na nkembo, kulutula nene ke vwanda kisalu ya ludedemo na nkembo.*

*Samu ti ata mpe yina kumaka ya nkembo vwandaka ve na nkembo na ntuala ya yayi, samu na kikuma ya nkembo yina ke kulutula.*

*Samu ti kana yina me luta vwandaka nkembo, nene kele. . . yina kele me lutila nkembo.*

*Na kumonaka na yina ti beto kele na kivuvu ya mutindu yina, beto fwana na bunene. . . ke sadila nzonzolo ya nene ya kukikulumusana.*

*Mpe ve mutindu Moise, yina tulaka vwale na zulu ya kizizi ya yandi, samu bana ya Israel kutala ve na kusikika nsuka ya yina vwandaka luta:*

*Kasi bampeve ya bawu vwandaka mpofo: samu ti tii bubu yayi ya kele dyaka na vwale yango yina me katukaka ve ntangu bawu ke tangaka ngwisani ya ntama; samu ti kaka na Klisto vwale yina ke katuka.*

*Kasi tii bubu yayi, ntangu ba ke tangaka Moise, vwale kele na zulu ya bantima ya bawu.*

*Kasi ntangu bawu ke baluka na Mfumu, vwale ke katuka.*

*Na yina Mfumu kele Mpeve yina: mpe kisika kele Mpeve ya Mfumu. . . kele kimpwanza.*

*Kasi beto nyonso, na kizizi ya mwasi ke tala mutindu na kitala-tala nkembo ya Mfumu, me soba na kizizi mosi na nkembo, mpe mutindu na nzila ya Mpeve ya Mfumu.*

*Na yawu na kumonaka ti beto kele na kisalu yayi, mutindu beto me kuzwa kyadi, beto ke zimbisa ve ngolo;*

*Kasi me manga bima ya kubumbama ya mayuya mpe luvunu, na kutambulaka ve na mayele ya yimbi mpe kusadila ndinga ya Nzambi na mutindu ya luvunu; kasi na nzila ya kumonisama ya kieleka beto ke pesa malongi na dibanza ya muntu nyonso na ntuala ya Nzambi.*

*Kasi kana nsangu ya beto ya mbote kele ya kubumbama, ya kele ya kubumbama samu na bayina kele ya kuzimbana:*

21 Ti Mfumu kubwela balusakumunu ya Yandi na ntangulu ya Ndinga ya Yandi!

22 Ntangu yayi, dilongi ya munu na suka yayi, mu ke na kivuvu ti Nzambi ke monisa yayi. Mpe konso ntangu, kana beno bayina ke bakaka ba-bande mpe ke kuwaka, mpe mu banza mpe mu kele na kivuvu ti—ti beno me kuzwa lubakusu ya kimpeve ya yina Nzambi me meka na kulakisa na Dibuundu kukondwa kutuba yawu mbala mosi. Beno me mona? Ya kele kima, ntangu yankaka, beto fwana tuba bima na mutindu ti ya lendaka mwangisa, ya lendaka nata bayankaka na kubasika, bayankaka na kukwenda, mpe bayankaka na—na—na kuyindula. Kasi ya kele na dibanza na manima. Ya fwana salama mutindu yina.

23 Na yina ya lendaka vwanda na bayankaka yina lendaka tuba, “Nge zola tuba ti Nzambi lendaka sala kima ya mutindu yina na dibanza na manima?” Ya kieleka Yandi salaka. Yandi ke sala dyaka.

24 Yandi tubaka kilumbu mosi, ntangu Yandi vwandaka na mafunda pene-pene ya Yandi, Yandi tubaka, “Kana ti beno kudya Nzutu ya Mwana ya Nzambi, to ya Mwana ya muntu, mpe kunwa Menga ya Yandi, beno kele ve na Luzingu na kati ya beno.”

25 Wapi mutindu ya nsamunu beno ke banza ti dokotolo to kibuki ya kento, to muntu nyonso ya mayele mingi lendaka banza na nsamunu ya mutindu yina, na Muntu yina vwandaka na ministele ya mutindu yina Yandi vwandaka na yawu? Mbote, yandi ke tuba, “Kudya nsuni? Yina kele kudya bantu! Kunwa menga ya muntu? Ya kele yina ke kunwaka menga ya bantu! Na nzonzolo yankaka, Yandi zola ti beto vwanda bantu ke kudya bantu mpe binyumba.” Mpe bantu nyonso kwendaka ntama na Yandi.

26 Mpe ya vwandaka na kimvuka ya milongi na Yandi, ya makumi sambwadi, ya bayina ba soolaka. Mpe Yandi balukaka na bawu, mpe Yandi tubaka, “Yinki beno ke banza ntangu beno ke mona Mwana ya muntu kumata na kisika Yandi katukaka?” Ntangu yayi, Yandi bangulaka yawu ve. Yandi ata mbala mosi ve bangulaka *wapi mutindu*; Paul salaka yawu na ntuala. Yandi tubaka kaka Yawu. Beno me mona? Mpe kuna ntangu yayi, Yandi tubaka, “Yinki beno ke tuba,” na milongi yayi, “ntangu beno ke mona Mwana ya muntu kumata na kisika Yandi me katuka?”

27 Kukondwa ntembe ti bantu yina tubaka, “Ntangu yayi, beno vingila fyoti. Oh, beto me kudya na Yandi. Beto me loba na Yandi. Beto me lala na Yandi. Beto—beto zaba kisika Yandi butukaka. Beto monaka berceau yina Yandi—Yandi leengaka. Mpe wapi mutindu Muntu yayi. . . Yayi kele nzonzolo ya ngolo.”

28 Mpe Biblia ke tuba, “Bawu vwandaka tambula na Yandi dyaka ve.” Bawu bikaka Yandi.

29 Na manima Yandi bikanaka na kumi na zole. Yandi soolaka kumi na zole, mpe mosi na kati ya bawu vwandaka dyabulu, Yandi tubaka. Na yawu Yandi balukaka na bawu.

Mpe ya vwandaka ve na mosi yina zolaka bangula yina Yandi tubaka. “Wapi mutindu bawu ke kudya Nzutu ya Yandi mpe kunwa Menga ya Yandi? Mpe wapi mutindu Yandi kulumukaka, na yina ti Yandi butukaka kaka awa na zulu ya ntoto?” Beno me mona? Bawu lendaka ve kubakula Yawu.

Mpe na yina Yandi balukaka na bantumwa, mpe Yandi tubaka, “Beno mpe zola kwenda?”

30 Mpe ya kele kisika Ntumwa Pierre salaka nsamunu yina ya nene, “Mfumu, na yandi beto ke kwenda?” Beno me mona? “Samu ti beto me ndima. Beto zaba ya kieleka ti Nge, mpe Nge kaka, kele na Ndinga ya Luzingu ya ngunga yayi.” Beno me mona? “Mpe beto ke ndima yawu.” Beno me mona, bawu lendaka ve na kubangula Yawu. Bawu. . .

Beno lenda ve kubangula lukwikilu. Ya kele kima yina beno ke kwikila, mpe ya kele ngolo mingi ti ya kele na kima yankaka ve yina ke baka kisika ya yawu.

Na yawu, bawu zabaka ti Ndinga yina sonamaka samu na nsungi yina bawu vwandaka zinga, nsungi ya Mesiya, ti Yandi vwandaka fwanana ya kieleka na kisika yina. Mpe yinki bawu zolaka sala na kuvutuka na mabuundu ya bawu ya madidi, ya misiku na kati ya yina bawu basikaka? Yandi tubaka, “Wapi kisika beto ke kwenda?” Beno me mona? “Beto me ndima ya kieleka ti Nge ke na Ndinga ya Luzingu.” Beno me mona? Mpe bawu—bawu lendaka ve kubangula Yawu, kasi bawu kwikilaka Yawu. Beno me mona?

31 Mpe Yesu tubaka yawu samu na kukatula matiti ya yimbi na kati ya nkonga ya Yandi, beno me mona, tii Yandi lendaka na kuvukisa kimvuka kintwadi. Mpe na kati ya bantu nyonso yina, bawu, kaka kumi na mosi ya bawu kuna bakulaka ya kieleka Nani Yandi vwandaka. Bawu zabaka ti Yandi vwandaka Nzambi, mpe Nzambi kaka. Ntangu yayi, . . .

32 Dilongi ya munu na suka yayi kele samu na kutalisa, to, kumonisa Nzambi yina.

33 Nzambi ntangu nyonso, na nsungi nyonso, me bumbamaka na manima ya vwale, na bansungi nyonso, kasi Yandi ntangu nyonso me vwandaka Nzambi. Beno me mona? Kasi Yandi me

bumbamaka Yandi mosi na yinza, mpe ke monisa Yandi mosi na bantu ya Yandi ya Kusolama, mutindu bantumwa na kilumbu yina. Ntangu yayi, yina vwandaka Nzambi yina vwandaka zonza na kati ya Klisto.

<sup>34</sup> Ntangu yayi, muntu ntangu nyonso, ya kele nkadulu ya muntu, yandi me sosa na kumona (na nzutu) Nzambi yango. Yandi ntangu nyonso zolaka kumona Yandi. Muntu me sala bivangu yina ke talana mutindu Yandi. Bawu ke banza na . . . Ba-Indien ke sambilaka mwini. Mpe—mpe beto talaka, na Afrika, mitindu mingi ya bibulu, mpe nyonso yina. Mpe kuna na zulu . . . bamonuma ya biteki na Alaska, mpe—mpe mitindu mingi yina bawu ke banza ti Nzambi yayi kele na kati ya yawu. Mutindu Paul zonzaka kuna na Athenes na ntangu yina, na mungo ya Mars, mpe tubaka na bawu ti bawu vwandaka bantu ya lukwikilu ya luvunu na yina me tala Nzambi yayi ya kuzabana ve, ti, bawu zabaka ti Yandi vwandaka kuna kasi dyaka bawu zabaka Yandi ve.

<sup>35</sup> Mpe na yawu beto ke tala mpe na ntangu ya ntama ya Job. Job zabaka ti ya vwandaka na Nzambi. Yandi zabaka yawu. Mpe ya kele ve na muntu ya moyo, na mabanza ya bawu ya mbote, kasi yina zaba ti ya fwana vwanda na Kima mosi kisika mosi. Mpe, ntangu yayi, Job zolaka kuzonza na Yandi.

Mpe mu zola ti beno tala mutindu yina Nzambi soolaka na kuzonza na Job. Nzambi vwandaka ya kubumbama ntangu Yandi zonzaka na Job. Yandi vwandaka ya kubumbama na kati ya kitembo, Yandi kulumukaka na kati ya kitembo. Beno ke kwikila ti Nzambi ke kwizaka dyaka na kati ya kitembo kisika beno lenda mona?

<sup>36</sup> Ya kele na bantu mingi ya kuvwanda awa, lutangu mosi, bayina vwandaka na beto kilumbu yankaka yina ntangu Yandi kwizaka na kati ya kitembo. Yandi tubaka na beto kilumbu na manima, Mpangi Banks Wood mpe bayankaka, na ntangu Yandi tubaka, “Lokuta ditadi yayi, losa yawu na zulu, mpe tuba, ‘MUTINDU ME TUBA MFUMU! Na ntangu mingi ve beno ke mona yawu.’” Mpe mu lokotaka ditadi, kuna na zulu ya mungo, mpe losaka yawu na mupepe, mpe . . . ya kieleka, na kukulumukaka, ya bandaka kitembo, beno me mona, succion yina me sala yawu.

<sup>37</sup> Beno fwana sala kima mosi samu na kunata yawu. Yesu bakaka kitini ya dimpa mpe bukaka yawu, na manima na kitini yina ya dimpa fulusaka. Yandi bakaka maza, tyamunaka yawu na kati ya vaze. Elie bakaka mungwa, tulaka yawu na diyuki; zengaka kitini ya yinti, mpe losaka yawu na maza. Ya kele kima samu na kumonikisa.

Mpe na kulokotaka ditadi yayi mpe na kulosaka yawu na zulu, mpe na kukulumuka bandaka kitembo.



38 Kilumbu yina landaka, mbote, ya vwandaka na mulongi mosi na beto na nzyetolo yango ya kuzomba. Yandi vwandaka ya kutelama pene-pene, mpe yandi tubaka na munu, “Mfumu ke pesaka ba-vision bisika yankaka mutindu yayi, Mpangi Branham?”

39 Mu tubaka, “Yinga, kasi mu ntangu nyonso ke kwizaka awa samu na kupema.” Mpe kaka kuna vision me kwiza.

40 Mpe Mpangi Borders, mu banza ti yandi kele na ngaanda ntangu yayi, yandi vwandaka kuna. Mpangi Banks Wood, mu banza, mpe, oh, bawu mingi vwandaka na zulu kuna, nana to kumi. Mpe Mpangi Banks Wood vwanda tala mbote yayi. Kaka na zulu ya mongo, kaka na lweka yankaka, ya kieleka, na kutala bametele mafunda nana na kisika Bawanzio sambwadi monikaka, samu na yina mu katukaka awa na kukwenda kuna, vutukaka mpe tubaka . . . na yina me tala Bidimbu Sambwadi. Kaka na kutala bametele mafunda nana na yawu.

41 Mpe kuna kilumbu yina landaka, na yina yayi vwandaka landila, mbote, . . . Mu tubaka na mpangi, na mpangi yayi, mu tubaka, “Yina kele mpasi ya nge, nge kele na dyambu na disu ya nge. Badokotolo me meka mwa bamvula na kukanga yawu mpe bawu me lenda ve na kusala yawu. Ba tubaka ti nge ke . . . ya ke kudya disu ya nge.” Mpe mu tubaka, “Kasi kukikwamisa ve, Mfumu Yesu me zitisa lukwikilu ya nge.” Mpe yandi me bika kaka kubwa munduki ya yandi. Mpe mu tubaka, “Mama ya nge,” kaka yina yandi vwandaka mpe yina vwandaka tambula ve mbote na yandi.

Mpe yandi tubaka, “Ya kele kieleka.”

42 Mpangi Roy Roberson yina kele ya dibuundu awa, vwandaka kuna, mu banza ti beno nyonso zaba yandi. Mu zabaka ti yandi vwandaka vétéran, mpe na kuzabaka yina zolaka salama, mu tulaka diboko ya munu na dipeka ya yandi; Mu tubaka, “Mpangi Roberson, sala keba, tala mbote, kima ke na kukubama na kusalama.”

43 Mu me vutuka na kisika yina mu zolaka vwanda, mpe kuna na mupepe me basika kitembo, yina kulumukaka na kulutaka na canyon mosi, na kukatukaka na zulu, ya vwandaka nene mingi ti ya pasulaka matadi, na mudindu ya bametele makumi zole to makumi zole na tanu, kuna na zulu ya mongo, mpe losaka matadi yango ntama na kisika yina bametele nkama na makumi nana na tatu. Mpe bulaka bambala tatu mutindu yina, mpe Ndinga basikaka na yawu. Beno me mona?

44 Mpe bawu nyonso vwandaka ya kutelama kuna. Mpangi Banks, yina kele awa ntangu yayi, yandi me kwiza mpe me tuba, “Ya kele yina nge vwanda tuba na munu mazono?”

Mu tubaka, “Yinga, tata, ya kele yawu.”

Yandi tubaka, “Kasi, yinki Yawu me tuba?”

45 Mu tubaka, “Yina, ya kele kaka samu na munu, na kuzaba yawu, Mpangi Banks, nge me mona, samu ya vwandaka. . . Ya zolaka pesa bantu boma.”

46 Kasi Yawu landilaka na kukwenda na ntwala, ya salamaka kaka fyoti. . . kwendaka na lweka ya node. Mwa bilumbu fyoti, na manima, Yawu bulaka na mubu, mpe beno monaka yina salamaka na Fairbanks. Ya vwandaka kidimbu ya lufundusu. Ntangu yayi beto ke mona ti—ti Nzambi dyaka. . . Beno me mona, ya zolaka kotisa bantu na boma. Mpe na yawu kuna ba zolaka. . . Yina zolaka salama, beno me mona. Ya fwana salama kaka. Bima yina fwana salama fwana salama, na mutindu nyonso. Beno me mona, ya ke salama, na mutindu nyonso.

47 Moise kilumbu mosi, vwandaka na nsatu ya kumona Nzambi, mpe Nzambi tubaka na yandi na kutelema na ditadi. Mpe, na zulu ya ditadi, Moise telamaka mpe yandi monaka Nzambi kuluta, mpe mukongo ya Yandi vwandaka mutindu mukongo ya muntu. Nzambi vwandaka na kati ya kitembo, mpe Nzambi. . . na yina Moise vwandaka ya kutelema na zulu ya ditadi.

48 Mu banza ti beno nyonso monaka foto kuna kilumbu yankaka yina, beto telemaka pene-pene ya ditadi yina mosi. Mpe awa kele Nsemo yina, Wanzio ya Mfumu, kaka kuna kisika Yawu bulaka. Kuna. . . Ya kele kaka na zulu ya tablo ya bansangu, kuna dyaka, na ntangu yayi.

49 Beno tala, Yehowa ya Ngwisani ya Ntama kele Yesu ya Ngwisani ya Malu-malu. Beno me mona? Yandi kele Nzambi mosi, ke soba kaka nzutu ya Yandi.

50 Ntangu yayi, muntu mosi tubaka kilumbu mosi, mulongi mosi—mosi—mosi ya Baptiste kuna na Tucson, “Wapi mutindu nge lenda tuba ti—ti Yesu mpe Nzambi lendaka vwanda Muntu mosi?”

51 Mu tubaka, “Mbote, ya kele mpasi mingi ve kana nge bika kaka mabanza ya nge mpe kubanzila yawu na mitindu ya Biblia. Bawu kele Moyo kaka mosi. Nzambi kele Mpeve; Yesu kele nzutu na kati yina Yandi vwandaka ya kubumbama. Beno me mona?” Mu tubaka, “Mutindu na yinzo ya munu. Na kento ya munu, mu kele bakala ya yandi. Mpe mu kele na mwana ya kento ya ntwenya, Rebecca, mu kele tata ya yandi. Mpe mu kele na mutekolo ya bakala, mpe nkumbu ya yandi kele Paul, mu kele nkooko ya yandi ya bakala. Mu kele bakala, tata, mpe nkooko ya bakala. Mpe kento ya munu kele ve na muswa na zulu ya munu mutindu tata to nkooko ya bakala; yandi kele na muswa na zulu ya munu kaka mutindu bakala. Mpe mwana ya munu ya kento kele na muswa ve na zulu ya munu mutindu bakala to nkooko ya bakala; yandi kele mwana ya munu. Beno me mona? Kasi dyaka bantu nyonso tatu yayi kele muntu mosi. Beno me mona? Ya kele Nzambi; Tata, Mwana, mpe Mpeve-Santu, ya kele

kaka miswa yina kele ya kukangama na kilumbu.” Nzambi kele mutindu mosi, Nzambi mosi.

<sup>52</sup> Nzambi sobaka Yandi mosi, sobaka nzutu ya Yandi. Kana beno tala awa na ba Phillipiens, Yandi tubaka, “Yandi talaka yawu ve mutindu lukumu, kasi bakaka *kifwani* ya muntu.”

<sup>53</sup> Ntangu yayi, mpova ya Grec kuna samu na *kifwani* yina, mu lutisaka kilumbu ya muvimba ya mazono na kutalaka yawu, na kumekaka na kufyongonina yina ya vwandaka, mu me kuzwa, mu me kuma na mpova yayi *en morphe*. Ba ke sonikaka yawu e-n m-o-r-p-h-e. Mu me sosa na Grec, na kumona yina *en morphe* vwandaka . . . Mu lendaka tuba yawu yimbi, kasi ya kele samu na yina mu me tanguna yawu, samu ti kana ba basisa bande, bantu ke, bizabi ke, zaba yina mu—mu zola tuba na nzila ya yawu. Yandi, ntangu *en morphe*, yina zola tuba ti Yandi sobaka Yandi mosi. Yandi, Yandi kulumukaka. Ntangu yayi, mpova ya Grec kuna zola kutuba, ti, “Kima yina ba lendaka mona ve, kasi ya kele kuna, mpe na manima ya ke soba mpe disu lenda simba yawu.” Beno me mona?

<sup>54</sup> Mutindu Elie vwandaka, na Dothan. Beno me mona, kisadi vwanda lenda ve kumona Bawanzio nyonso yina vwandaka na ziunga kuna, mpe Nzambi sobaka kaka; ve na kukulumusaka Bawanzio kuna, kasi Yandi sobisaka kumona ya kisadi. Mpe kuna vwandaka na myongo ya kufuluka na Bawanzio, mpe na tiya, mpe bampunda ya tiya, mpe bapusu ya tiya, bisika nyonso ya profete ya Yandi. Beno me mona, bawu, Yandi sobisaka kumona. Kima kele yimeni kuna.

<sup>55</sup> Na yawu, ya kele yina mu ke na kumeka na kutuba, ti Nzambi yina vwandaka ntangu nyonso kele awa. Kima mosi yina Yandi salaka ntangu Yandi kumaka muntu, Yandi sobaka kibukutu ya Yandi. Beno me mona? Yandi—Yandi, *en morphe* yayi, Yandi—Yandi sobaka Yandi mosi na yina Yandi vwandaka na yina Yandi kele, to kibukutu ya Yandi, mutindu yankaka ya kusala.

<sup>56</sup> Mutindu na kati ya kimpa ya nene. Mutindu mu vwandaka zonzila na suka yayi, mu vwanda bakaka baleso ya yayi ya Shakespeare. Ya me kuma bilumbu mingi. Kasi ntangu Shakespeare sonikaka kimpa, . . . samu na Ntinu Jacques ya Angleterre, ntangu yandi . . . muntu ya Macbeth. Beno me mona, Shakespeare vwanda kwikilaka ve na bandoki ya bakento; kasi na kati ya kimpa, samu na ntinu vwanda kwikilaka na bandonki ya bakento, na yawu yandi zolaka kotisa bandonki ya bakento. Beno me mona? Mpe ntangu yayi, samu na kusala yayi, ba me sobisa ba-role.

<sup>57</sup> Becky awa, na *Carmen*, ba vwanda me sala yawu na—na lukolo kisika yandi vwanda me kuzwa kaka diplome balumingu fyoti me luta. Ntangu yayi, ya lendaka vwanda ti muntu mosi salaka ba-role tatu to yiya. Samu na kusala yawu, yandi—

yandi vwanda soba kibukutu ya yandi. Bantangu yankaka yandi vwanda basika, yandi kele muntu *yayi*; mpe mbala yankaka yandi ke basika, yandi kele muntu yankaka. Kasi ya kele muntu mosi ntangu nyonso.

<sup>58</sup> Mpe yina kele Nzambi. Yandi sobaka Yandi mosi na—na Dikunzi ya Tiya, na kukuma Muntu. Na manima sobaka Yandi mosi na yawu, na kuvutuka dyaka na Kimpeve, ti Yandi lenda kuzinga na kati ya muntu. Nzambi na kusalaka na kati ya muntu ke lakisa yina Yandi vwandaka ya kieleka. Yesu Klisto, vwandaka Nzambi na kusalaka na kati ya Muntu, na kati ya Muntu *mosi*. Na kati ya Muntu mosi, yawu yina Yandi vwandaka. Yandi sobaka na Dikunzi ya Tiya, mpe kuna kotaka; yina vwandaka vwale na ntoto ya kuyuma, yina vwandaka bumba Nzambi na ntwala ya Israel. Moise monaka mutindu ya nzutu ya Yandi, kasi ya kieleka Yandi vwandaka ya kubumbama ntangu nyonso na manima ya Dikunzi yayi ya Tiya, yina vwandaka Logos yina basikaka na Nzambi.

<sup>59</sup> Ntangu yayi beto ke tala awa, ntangu yayi kubanda Pentecote, Nzambi ke na kusalaka ve *na kati* ya muntu, to kusala . . . ntangu yayi Yandi ke na kusalaka *na nzila* ya muntu. Beno me mona? Yandi vwandaka sala *na kati* ya Muntu mosi kuna, Yesu. Ntangu yayi Yandi ke na kusalaka *na nzila* ya muntu yina Yandi soolaka samu na lukanu yayi. Nzambi, na kati ya nzutu ya muntu, Yandi sobaka Yandi mosi na kifwani ya—ya . . . ya Nzambi, na kifwani ya muntu.

<sup>60</sup> Yandi kwizaka na bankumbu tatu, na bankumbu tatu ya mwana. Yandi kwizaka na Mwana . . . na nkumbu ya Mwana ya—ya muntu, Mwana ya David, mpe Mwana ya Nzambi; bankumbu tatu ya mwana.

<sup>61</sup> Ntangu yayi, Yandi kwizaka mbala ya ntete na Mwana ya Da- . . . Mwana ya muntu, samu Yandi vwandaka Profete. Ntangu yayi, Yehowa Yandi mosi bokilaka Ezéchiél mpe bapofete, “Mwana ya muntu, yinki nge ke mona?” Yesu ata mbala mosi ve tubaka ti Yandi vwandaka Mwana ya Nzambi; Yandi vwanda tubaka ti Yandi vwandaka Mwana ya muntu, samu ti Masonuku lenda bukana ve.

Ya lenda vwanda ve na kima ke bukana na Masonuku. Konso Ndinga fwana vwanda mutindu yina. Ya kele mutindu mu ke kwikila yawu. Ya kele mutindu Yawu fwana vwanda, ve samu mu ke kwikila yawu, samu Yawu kele Ndinga ya Nzambi.

<sup>62</sup> Ntangu yayi kana beno tala na mbandukulu, Ndinga mosi, na paze mosi ya Biblia, na Genèse 1, beto ke tala ti nyonso . . . Bimbevo nyonso, mawa nyonso, bampasi nyonso, mpe yina nyonso me salamaka ntete ve na bantu ya moyo, kwizaka samu ti muntu *mosi* kwikilaka ve na Ndinga *mosi*, yina nataka nyonso yayi. Yina kele ntonono ya Biblia. Na nsuka ya Biblia, na Apocalypse 22, Nzambi mosi yina ke tuba, “Muntu nyonso yina

ke katula Ndinga mosi na Yayi, to ke bwela ndinga mosi na Yawu.” Beno me mona, ya fwana vwanda Ndinga na nzila ya Ndinga, kaka mutindu Yawu kele.

<sup>63</sup> Na yawu, kuna, mpe mu ke baka kaka mwa kima ya mutindu mu ke. . .ya kele na muntu ntangu nyonso yina ke tubaka na munu na yina mu ke zonzaka na bakento ke zengaka nsuki ya bawu. Ntangu yayi, samu na munu, ntangu nyonso yandi ke sala mutindu yina, mu ke tala ve mutindu santu yandi kele mpe nyonso yina yandi zaba, yandi kele dyaka yimbi. Yandi ke lwata bakupe mpe bilele yayi ya mutindu yina; mu ke tala ve na yina yandi ke salaka, na mutindu yandi lenda yimba, na mutindu ya mbote yandi lenda longa, nyonso yina yandi lenda sala, mutindu ya luzingu yandi ke zinga, ya kele dyaka ti Ndinga mosi kele ya kubuka. Beno me mona? Beno me mona, ya fwana vwanda Ndinga nyonso. Flaze ve; Ndinga, Ndinga mosi! Na yawu, Biblia kele ve kutendula ya muntu mosi. Yawu fwana vwanda Ndinga na nzila ya Ndinga, mutindu Yawu kele ya kusonama. Beto fwana kwikila Yawu.

<sup>64</sup> Mpe kaka kukwikila Yawu ve, kasi kuzinga Yawu. Kana beto ke zinga Yawu ve, na yawu beto ke kwikila na Yawu ve; beto ke tuba kaka beto ke sala. Mutindu mu. . .Na kubakaka lufulu na yina mu me tuba, bilandi yina lendaka ve kubangula Yawu, kasi bawu kwikilaka Yawu, na mutindu nyonso, mpe bawu salaka funguna ya bawu ya lukwikilu mpe zingaka na yawu. Na ntangu bayankaka nyonso ya bawu vwandaka kwenda ntama na Yawu, bawu vwandaka na Yawu! Bawu kwikilaka Yawu! Ya kele mutindu beto ke salaka. Ya kele mutindu beno fwana sala yawu. Ata nyonso yina muntu yankaka ke sala, beto ke kwikila Yawu mpe na manima beto ke sadila na zulu ya Yawu. Kana beno sala yawu ve, na yina beno ke kwikila Yawu ve.

<sup>65</sup> Ntangu yayi beno tala awa ntangu Yandi kwizaka, Yandi zolaka kwiza mutindu Mwana ya muntu, samu ti Masonuku ya Santu ke tuba ti Yandi zolaka, “Nzambi zolaka telemisa samu na bawu Profete.” Na yina Yandi zolaka kwiza ve na kubokilaka Yandi mosi Mwana ya Nzambi, samu ti ya vwandaka ve kilumbu yango. Yandi vwandaka Mwana ya muntu yina vwandaka pesa profesi, samu na kulungisa, mpe kutalisa na bawu mambu nyonso yina salamaka, mpe vwandaka fwanikisa yina Yandi vwandaka. Na yina Yandi vwandaka na zulu ya ntoto mutindu Mwana ya muntu.

<sup>66</sup> Beno tala kento yina ya Syrophénicienne yina kwizaka mbangu na Yandi, mpe tubaka, “Nge Mwana ya David, tala munu kyadi!” Ata mbala mosi ve ti Yandi telemisaka yintu ya Yandi. Yandi vwandaka ve na muswa na zulu ya Yandi mutindu Mwana ya David. Yandi vwandaka Muntu ya makanda.

Ya kulutila ve mwana ya munu ya kento kele na muswa na zulu ya munu mutindu bakala; to, kento ya munu, mutindu

mwana ya kento. Dyaka, yandi kele mwana ya munu ya kento mpe kento ya munu, yandi kele mwana ya munu ya kento na Nsangu ya mbote. Kasi, na ntoto, yandi kele na muswa ve ya kubokila munu tata. Beno me mona?

Ntangu yayi beno tala, kento ya Muntu ya makanda yayi vwandaka ve na muswa na zulu ya Yandi mutindu Mwana ya David. Kasi mpofo Bartimée vwandaka, beno me mona, yandi vwandaka Juif. Ntangu yayi, Yandi kwizaka mutindu Mwana ya muntu.

<sup>67</sup> Beno fwana zaba bampova yayi mpe bima yayi. Beno tala Hattie Wright na ntangu yina, na ntangu ya Kubenda ya Tatu. Beno ke bambuka moyo na yawu. Na nyonso, kento yina tubaka kima ya kieleka. Beno fwana tuba ndinga yina ya kieleka, kima ya kusungama na Nzambi.

<sup>68</sup> Beno tala ntangu yayi, Yandi kwizaka mbala ya ntete mutindu Profete, mpe bawu komaka Yandi na kulunsi. Baya ya Yandi Mosi komaka Yandi na kulunsi. Yandi kwizaka mutindu Mwana ya muntu.

<sup>69</sup> Kuna na manima Mpeve-Santu kwizaka, kuna Yandi vwandaka Mwana ya Nzambi. Nzambi kele Mpeve. Yandi vwandaka Mpeve-Santu, Mwana ya Nzambi. Yandi zingaka na nzila ya bansungi ya dibuundu mutindu Mwana ya Nzambi.

<sup>70</sup> Ntangu yayi, na Milenyome, Yandi ke vwanda Mwana ya David, ya kuvwanda na zulu ya Kiti ya kimfumu ya tata ya Yandi, David. Yandi kele Mwana ya David.

<sup>71</sup> Ntangu yayi, mpe, beno bambuka moyo, na kati-kati ya Mwana ya Nzambi. . . Na nsungi ya dibuundu ya Laodicée, ba me tula Yandi na ngaanda. Mpe na Luc, Yandi tubaka ti Yandi ke monisama dyaka mutindu Mwana ya muntu, Profete, na kulungisaka yina bikanaka. Beno me mona? Masonuku ke vukana kintwadi na mutindu ya kulunga. Mwana ya muntu, Mwana ya Nzambi, Mwana ya David. Yinki ya vwandaka? Ya kele Nzambi mosi na ntangu nyonso, ke sobaka kaka nzutu ya Yandi, *en morphe*. Yandi ke sobaka kaka yawu. Ya kele kimpa ya nene samu na Yandi. Yandi ke na kusalaka kosalu yayi mpe yina.

<sup>72</sup> Yandi kwizaka mutindu Mwana ya muntu, Profete. Salaka ya kieleka. Ata mpe mwa kento yina na kati ya disumu ya yandi nyonso, kuna na dibulu ya maza, yandi zabaka Yandi. Yandi tubaka, “Beto zaba ti Mesiya ke kwiza, yina ba ke bokila Klisto, ya kele yina Yandi ke sala.” Beno me mona, yandi zabaka samu yandi vwandaka Nkuna yina soalamaka na ntwala. Na yina yandi. . .

Na kisika, bayankaka ya bawu zabaka Yandi ve. Bawu vwandaka na kima ve samu na kuzaba. Bawu vwandaka na disumu, na kubanda.

<sup>73</sup> Samu, samu na bisalu ya Yandi, Yandi ke sobaka nzutu ya Yandi. Na manima Yandi kwizaka na nzutu ya Mwana ya muntu.

Samu na nsungi ya mibongisi, Wesley, Luther, mpe nzila nyonso, kuna beto ke mona ti bawu kotisa yawu na poto-poto, kaka mutindu Israel salaka, tii ntangu Yandi ke monika na bilumbu ya nsuka, na nsungi ya Pentecote, mutindu Mpeve-Santu, bawu mangaka Yawu. Bawu salaka kima mutindu Israel salaka.

Mpe yinki Yandi ke sala ntangu yayi? Ke vutuka mutindu Mwana ya muntu. Mpe dyaka, kubanda kuna, Mwana ya David. Benno me mona mutindu beto me kuma pene-pene? Mwana ya muntu, Mwana ya David, Mwana ya Nzambi. Yandi me monisama na bilumbu ya nsuka mutindu Mwana ya muntu, landila Malachie 4, bapofesi nyonso yankaka yina ke tadila ngunga yayi. Ke tadila dyaka ve na dibuundu na manima Yandi. . . Bawu me tula Yandi na ngaanda; Yandi ke na ngaanda, ke na kukonkota na mwelo. Ya ke dyaka na mwa Bankuna yina soolamaka na ntwala, na kati kuna. Yandi fwana kuma na bawu.

<sup>74</sup> Mpe Nzambi, na kati ya muntu, Yandi mosi kulosamaka. Na Joël 2:28, beto ke tala, Yandi tubaka, “Mu ke mwangisa, na bilumbu ya nsuka, Mpeve ya Munu.” Ntangu yayi, kana benno tala mpova kuna, mpova na Grec. Mu lendaka zimbana, kasi yina mu me lenda kuzwa. . .

<sup>75</sup> Benno fwana tala mbote bampova. Na Kingelezi ntangu yankaka ya ke na bambangululu zole. Kaka mutindu mpova beto ke tubaka, “nzambi.” “Nzambi vangaka mazulu mpe ntoto,” Genèse 1. Kasi ntangu yayi, na kati ya Biblia, Ya me tuba, “Na mbandukulu Elohim.” Ntangu yayi, Elohim, Kingelezi ke bokila “nzambi,” kasi ya kieleka ya vwandaka ve. . . *Elohim*. . . Kima nyonso lenda vwanda nzambi, kana beto baka mpova *nzambi*; benno lenda sala kiteki nzambi; benno lenda sala piano nzambi; benno lenda sala nyonso nzambi.

<sup>76</sup> Kasi ya ke ve mutindu yina na mpova *Elohim*; Ya zola tuba, “yina ke zingaka na Yandi mosi.” Benno me mona? Pina yina lenda zinga ve na yawu mosi, kima ve lenda zinga na yawu mosi. Na yawu, mpova *Elohim*, zola tuba, “Yandi yina ke zingaka ntangu nyonso.” *Nzambi* lenda zola tuba kima nyonso. Benno me mona luswaswanu na mpova?

<sup>77</sup> Ntangu yayi, ntangu Yawu me tuba awa ti Yandi *losaka* Yandi mosi, to *mwangisaka*, ntangu yayi, beto lendaka banza mutindu yayi, ti Yandi “lukaka,” mpova ya Kingelezi ya *losaka*, to *mwangisaka* na kubasisaka na Yandi, benno me mona, kima basikaka na Yandi yina vwandaka ya kuswaswana na Yandi. Kasi mpova *kenos*, na Grec, zola ve kutuba ti Yandi “lukaka,” to mwa. . . Ti diboko ya Yandi katukaka, to disu ya Yandi katukaka, muntu yankaka.

<sup>78</sup> Ya kele, Yandi sobaka Yandi mosi, Yandi “mwangisaka Yandi mosi na kati,” (Amen!), na kati ya kibukutu yankaka, na kati ya nzutu yankaka. Ya kele ve Muntu yankaka basikaka na Yandi, na nkumbu Mpeve-Santu, kasi Yawu vwandaka Yandi mosi. Beno me bakula yawu? Yandi Yandi Mosi kumwangisaka Yandi mosi na kati ya bantu. “Klisto na kati ya beno!” Mutindu ya kele kitoko, mutindu ya kele kitoko, na kubanza, Nzambi kumwangisa Yandi mosi na kati ya muntu ya moyo, na kati ya mukwikidi. “Kumwangisa!” Ya vwandaka kitini ya kimpa ya Yandi, na kusala mutindu yina.

Nzambi, muvimba nyonso, Bunzambi nyonso vwandaka na kati ya nzutu ya Muntu yayi, Yesu Klisto. Yandi vwandaka Nzambi, mpe Nzambi kaka. Ve muntu ya tatu to muntu ya zole, to muntu ya ntete; kasi Muntu, Nzambi ya kubumbama na kati ya nzutu ya muntu.

<sup>79</sup> Ya Ntete ya Timothée 3:16, “Kukondwa ntembe dinsweki ya kinzambi kele nene; samu ti N-z-a-m-b-i, Elohim,” N ya nene-z-a-m-b-i, na Biblia. Beno tala yawu, muntu nyonso. Ya ke nata, na mukanda ya ntete, Ya ke tuba, “Elohim.” “Na mbandukulu, Elohim.” Beno me mona? “Mpe, Elohim, kukondwa ntembe dinsweki ya Elohim kele nene; samu ti Elohim kumaka nsuni, mpe beto simbaka Yandi.” Elohim, ya kubumbama na kati ya nsuni ya muntu! Yehowa ya nene yina fukaka kisika nyonso, ntangu, mpe bisika nyonso, kumaka muntu. Beto simbaka Yandi, Elohim. “Na mbandukulu, Elohim. Mpe Elohim kumaka nsuni, zingaka na kati-kati ya beto.”

<sup>80</sup> Yinki? Yayi kele mutindu ya Yandi, ba-role ya kimpa. Ya kele mutindu Yandi ke sala yawu, mutindu ya Yandi ya kumonana Yandi mosi na beto mutindu muntu mosi yankaka. Beto kele bantu ke kufwa, mpe Yandi zaba yawu. Mpe beto ke bakula kaka mutindu bantu ke kufwa. Beto zaba kaka mutindu bantu ke kufwa. Beto zaba kaka mutindu ba-sense ya beto ke sala beto zaba, mpe yina yankaka beto fwana kwikila na lukwikilu. Beto fwana tuba ti ya kele na Nzambi; kana beto mona Yandi, to ve, beto ke kwikila yawu, na mutindu nyonso. Beno me mona? Kana ya kele to ve, beto ke kwikila dyaka yawu samu ti Nzambi tubaka yawu.

<sup>81</sup> Mutindu Abraham, lendaka ve kumona mwana yina, ata kidimbu mosi, ata kivumu na—na Sarah, ata ntangu mosi ya kumona menga to kima, kasi dyaka Nzambi tubaka yawu. Kivuvu nyonso, mpe kibutulu ya yandi—ya yandi vwandaka ya kufwa, mpe luzingu ya bakala vwandaka me kwenda, mpe yinto ya luzingu ya yandi kuyumaka, mpe luzingu ya yandi—ya yandi kuyumaka na kati ya yandi. “Mpe dyaka yandi salaka ntembe ve na nsilulu ya Nzambi na nzila ya kukondwa lukwikilu, kasi yandi vwandaka na ngolo, vwandaka pesa lukumu, na kuzabaka ti Nzambi vwandaka na lenda ya kusala kima yina Yandi tubaka ti Yandi ke sala.”



Ya kele mutindu yina beto fwana kwikila Ndinga yina bubu yayi. Wapi mutindu ya ke vwanda? Mu zaba ve. Nzambi tubaka ti ya ke vwanda mutindu yina, mpe yina ke sukisa yawu.

<sup>82</sup> Nani kele Muntu yayi ya nene yina ke monanaka ve? Nani kele Muntu Yayi yina Abraham monaka na ba-vision? Kaka na nsuka, ata ti, Yandi kumonanaka na nzutu, ntete mwana kukwiza. Nzambi Yandi mosi kwizaka na Abraham na nzutu ya muntu, na ntangu ya nsuka. Monisamaka! Yandi monaka Yandi na mwa Nsemo ntangu mosi; yandi monaka Yandi na ba-vision; yandi kuwaka Ndinga ya Yandi; baluzayikisu mingi. Kasi kaka ntete mwana ya nsilulu, yandi monaka Yandi na nzutu ya muntu, mpe zonzaka na Yandi, mpe disaka Yandi musuni mpe pesaka ya kunwa. Beno me mona? Beno tala, Nzambi Yandi mosi bumbamaka na nzutu ya muntu.

<sup>83</sup> Yayi kele kitini ya mutindu ya Yandi. Yayi kele mutindu yina Yandi ke monikaka Yandi mosi na beto, ke monisaka Ndinga ya Kukonda nsuka, Nzambi, Yehowa kumaka nsuni. Mutindu na Santu Jean 1, “Na mbandukulu vwandaka Ndinga, mpe Ndinga vwandaka na Nzambi, mpe. . .Na mbandukulu vwandaka Elohim, mpe Elohim vwandaka. . .kumaka Ndinga, mpe Ndinga vwandaka Elohim. Mpe Ndinga kumaka Elohim.” Beno me mona? Ya kele kima mosi, ke funguka kaka.

<sup>84</sup> Mutindu kinama, beno me mona, ya kele na kati ya Nzambi. Kinama kele dibanza ya beno. Nzambi na mbandukulu, ya Seko, Yandi vwandaka mpe ve Nzambi. Yandi vwandaka ya Seko. Yandi vwandaka mpe ve Nzambi; *Nzambi* kele “kima ya kusambila,” to kima mosi. Beno me mona? Na yawu Yandi vwandaka mpe ve yawu. Yandi vwandaka Elohim, ya Seko. Kasi na kati ya Yandi vwandaka na mabanza. Yandi zolaka kukuma kima. Mpe yinki Yandi salaka? Na yina Yandi zonzaka Ndinga, mpe Ndinga kumaka kima. Yawu yina kizizi nyonso, kubanda Genèse tii Apocalypse. Ya kele ve na kima ya yimbi. Ya kele Elohim yina vwanda kuma kima samu ba lenda kusimba, kuwa Yandi. Mpe na Milenyome, ya kele na Elohim ke vwanda na zulu ya Kiti ya kimfumu, beno me mona, ya kele kieleka, na bantu ya Yandi nyonso na ziunga ya Yandi, bayina Yandi soolaka na ntwala ya mbandukulu ya yinza.

<sup>85</sup> Ya kele mutindu muntu ke tungaka bangunga to ke salaka bangunga, munyengisi. Konso ngunga fwana bula mutindu yankaka na yankaka. Bima mosi, kasi bisengo mingi, asiye mingi, mitaku mingi, samu yawu pesa “makelele.”

<sup>86</sup> Ya kele mutindu Nzambi salaka. Yandi vukisaka yandi yayi na yandi yina, na yandi yayi na yandi yina, na yandi yayi na yandi yina, tii Yandi kuzwaka ya kieleka yina Yandi zolaka. Ya kele mutindu Yandi kulumukaka. Nzambi kumonanaka Yandi mosi na Dikunzi ya Tiya mpe na nzila ya bapofete, na manima na kati ya Mwana ya Nzambi, yina, Yandi vwandaka Nzambi.

Beno me mona, ya kele Nzambi mosi yina ke na kulakisa ya kieleka, katuka kulunga na kulunga, katuka nkembo na nkembo. Ya kele mutindu Dibuundu ke tambulaka.

<sup>87</sup> Beno tala, na nzila ya bansungi, mutindu mosi, na nzila ya bapofete ya Yandi, Yandi monisamaka Yandi mosi. Bawu vwandaka ya kieleka bapofete ve, bawu vwandaka banzambi. Yandi tubaka yawu. Samu ti, yina bawu vwandaka zonza vwandaka Ndinga ya Nzambi. Bawu vwandaka nzutu na kati ya yina Nzambi vwandaka bumbama. Bawu vwandaka banzambi. Yesu tubaka, Yandi mosi, tubaka, “Wapi mutindu beno lenda bedisa Munu na ntangu Mu ke tuba ti Mu kele Mwana ya Nzambi, mpe musiku ya beno mosi ke tuba ti na bawu yina Ndinga ya Mfumu kwizaka vwandaka banzambi?” Beno me mona?

<sup>88</sup> Na yawu ya vwandaka Nzambi na kati ya nzutu ya muntu yina ba vwanda bokila profete. Beno me mona? Mpe Ndinga ya Mfumu kwizaka na muntu yayi, na yawu ya vwandaka profete ve; profete vwandaka vwale, kasi Ndinga vwandaka Nzambi. Ndinga ya muntu ke sala mutindu yina ve. Beno me mona yina mu zola tuba? Ya lenda sala ve na mutindu yina. Kasi na kutala ya vwandaka Nzambi. Beno me mona, Yandi vwandaka Ndinga ya Nzambi na kati ya nzutu ya muntu, yina ba vwanda bokila “muntu.”

Beno tala, Yandi sobaka ata fyoti ve nkadulu ya Yandi, kaka nzutu ya Yandi. Hebreux 13:8, ke tuba, “Yandi kele mutindu mosi mazono, bubu yayi, mpe ntangu nyonso.” Na yawu Yandi sobaka ve nkadulu ya Yandi ntangu Yandi kwizaka. Yandi kele ntangu nyonso Profete yina, nzila nyonso ya nsungi, kima mosi: Ndinga, Ndinga, Ndinga, Ndinga. Beno me mona? Yandi lenda soba nkadulu ya Yandi ve, kasi Yandi sobaka nzutu ya Yandi. Hebreux 13:8, ke tuba, “Yandi kele mutindu mosi mazono, bubu yayi, mpe ntangu nyonso.” Yandi sobaka kaka kibukutu ya Yandi.

<sup>89</sup> Mutindu mu sobaka katuka bakala, ntangu mwana ya munu me butuka, kuna mu kele tata. Ntangu mutekolo ya munu ya bakala me butuka, mu kele nkooko ya bakala. Beno me mona? Kasi, mu me soba ve; yina kele dyaka—dyaka munu. Beno me mona? (Mpe yina kele Nzambi.) Ya kele kaka ti mu me soba ya munu. . . Beno me mona, ya kele kaka kusoba mutindu ya beno. Beno me mona?

Beno tala. Mpe yinza ke salaka nsobolo katuka ntwenya ya muntu na muntu ya kukula, na kiboba. Mpe beno bawu yayi, beno me mona, beno ke soba kaka nzutu ya beno.

<sup>90</sup> Ntangu yayi, beno lenda ve kutuba ti ntwenya mosi ya bakala awa, ya bamvula kumi na sambanu, yandi tuba ti yandi kele nkooko ya bakala. Yandi lenda vwanda ve. Nzutu ya yandi fwana soba. Mwa bamvula ke soba yawu, kuna yandi ke kuma nkooko ya bakala. Beno me mona yina mu zola tuba?

<sup>91</sup> Kasi ya kele Muntu mosi ntangu nyonso, Muntu mosi, Nzambi ntangu nyonso. Na mutindu yayi Yandi ke monisama Yandi mosi na bantu ya Yandi, na kusalaka yayi. Beno tala, na nzila ya nsungi ya Dikunzi ya Tiya, Yandi monisaka Yandi mosi na bantu ya Yandi. Na nsungi ya—ya Yesu, Yandi monisamaka Yandi mosi na bantu ya Yandi. Na nsungi ya Mpeve-Santu, mutindu Mwana ya Nzambi. Mwana ya David. . . Yandi ntangu nyonso ke monisamaka Yandi mosi na mutindu yina na bantu ya Yandi, na kusalaka bantu kuzaba Yandi. Yandi ke bumbama na manima ya kima, beno tala, na mutindu mosi, to na nkadulu mosi, ntangu nyonso.

<sup>92</sup> Nzambi bumbamaka na kati ya Yesu, samu na kusala kisalu ya mpulusu na kulunsi. Nzambi zola kufwa ve, mutindu Mpeve. Yandi kele ya Seko. Kasi Yandi zolaka lwata kibukutu mpe kubula role ya lufwa. Yandi kufwaka, kasi Yandi zolaka sala yawu ve na nzutu ya Yandi ya Nzambi. Yandi zolaka sala yawu na kati ya nzutu ya Mwana, mutindu Mwana ya muntu, na zulu ya ntoto. Beno me mona? Yandi zolaka vwanda nzutu ya Mwana. Na yina ntangu Yandi vutukaka na Pentecote, Yandi vwandaka dyaka Mwana ya Nzambi. Beno ke mona yina mu zola tuba? Beno ke bakula? Yandi vwandaka. . .

<sup>93</sup> Yandi zolaka kwiza na nsuni ya kimuntu, na. . . mpe muntu ve, kukondwa nsatu ya kuvukisa banzutu. Samu ti yina ke lakisa dyaka kimbangi ya beto ya nkuna ya nyoka, beno me mona, “kuvukisa banzutu,” ya kieleka kuvukisa ya banzutu. Ba-pomme ve; kuvukisa ya banzutu! Ya kele kieleka. Ya fwana vwanda. Beno tala awa, beno me mona, samu ti muntu nyonso ya mbote. . . Beno tala bapofete yina kuna na ntangu ya ntama, kasi Yandi zolaka vwanda ya kulutila profete. Beno me mona? Samu na kusala yawu, Yandi zolaka kwiza na mbutukulu ya bumwense, na kulakisaka ti mbutukulu ya bumwense yango vwandaka lakisa. . . Yandi zolaka butuka na mbutukulu ya bumwense, samu na kukatula nsingulu, Nkisi. Beno ke mona yina mu zola tuba? Na yawu, ya zolaka vwanda kuvukisa ya banzutu. Yandi lakisaka yawu na nkwezulu ya Yandi Mosi; Yandi kwizaka ve na nzila ya nsatu ya kuvukisa banzutu, kasi na nzila ya mbutukulu ya bumwense. Mpe Yandi sobaka kibukutu ya Yandi na Yehowa na Yesu, samu na kubaka kisalu ya mpulusu na kimpa yina Yandi vwandaka sala, na Nzambi na kulunsi.

<sup>94</sup> Ba-Grec vwandaka zola kumona Yandi. Na Santu Jean 12:20, mingi ya beno kuwaka munu kulonga na zulu ya bampova, “Tata, beto zola mona Yesu.” Beno bakulaka yawu?

<sup>95</sup> Ntangu yayi, ba-Grec vwandaka bantu bizabi, bawu vwandaka bantu ya nene. Mpe bawu vwandaka—bawu vwandaka na nsatu ya nene samu na Nzambi, mutindu Paul longaka bawu na mongo ya Mars. Mpe bawu vwandaka, bawu—bawu vwandaka twadisa yinza na science mpe—mpe na ndongosolo, bawu vwandaka bantu ya nene. Kasi bawu

vwandaka sambila mpe vwandaka kwikila na masolo mpe nyonso, babuku ya ba-art mpe ya ba-art ya mutindu na mutindu, mpe nyonso yina.

<sup>96</sup> Kasi bawu—bawu—bawu vwandaka ya kuyituka na zulu ya Muntu yayi Yina lendaka kubelusa bambevo mpe lendaka tuba na ntwala bima yina vwandaka salama, ya kieleka. Mpe bawu vwandaka ya kuyituka, na yawu bawu kwizaka mona Yandi. Ntangu yayi, beno tala mbote-mbote ntangu yayi, beno kondwa yayi ve. Beno me mona? Mpe bawu kwizaka mpe bawu tubaka na Philippe, yina vwandaka ya Bethsaida, “Tata, beto zola mona Yesu.” Mpe Philippe mpe bilandi yankaka nataka yandi na Yesu, samu na kumona Yesu.

<sup>97</sup> Ntangu yayi beno tala bampova yina Yesu tubaka na bawu, samu bawu kwizaka mona Nani Yandi vwandaka, mpe bawu lendaka ve kumona Yandi. Bawu monaka nzutu, kasi Yandi vwandaka na kati ya tempelo ya Yandi. Nzambi vwandaka na kati ya tempelo ya Yandi, ya kubumbama na kati ya nsuni ya muntu. Beno tala bampova Yandi tubaka, “Kana ti mbuma ya blé kubwa na ntoto, beno me mona, mpe kufwa, ya ke zinga yawu mosi.” Beno me mona? “Ngunga me kwiza, ntama mingi ve ya ke vwanda yawu, kisika Mwana ya muntu ke kuzwa nkembo, beno me mona, mpe Yandi fwana luta na ntoto yayi. Mpe kana ti ngunga yayi kukwiza ve, beno ke lenda ata mbala mosi ve kumona Yawu.” Beno me mona?

<sup>98</sup> Awa, samu na yinki bawu lendaka ve kumona Yesu? Yandi vwandaka na kati ya kibukutu. Nzambi vwandaka na kati ya kibukutu. Ba-Grec vwandaka na nsatu ya Nzambi, mpe awa Yandi vwandaka, kasi bawu vwandaka lenda ve kumona Yandi samu na vwale. Mpe ya kele kima mosi bubu yayi, ba lenda ve kumona Yandi samu na vwale. Ya kele na zulu ya kizizi ya bawu. Ba-Grec yayi vwandaka na kati ya kibukutu, to Yesu vwandaka na kati ya kibukutu samu na ba-Grec yayi.

<sup>99</sup> Beno tala, Yandi tubaka na bawu, “Kana ti mbuma yayi ya ble kubwa na ntoto, ya ke zinga yawu mosi.”

<sup>100</sup> Bawu, bawu lendaka ve kubakula wapi mutindu, samu na yinki bawu lendaka ve kumona Yandi. Kuna vwandaka muntu mosi. Bawu kwizaka mona Nzambi, mpe bawu monaka muntu. Beno me mona? Bawu lendaka ve kumona Nzambi samu Nzambi vwandaka ya bumbama samu na bawu. Ntangu yayi beno bumba yawu na mabanza ya beno, Nzambi vwandaka ya kubumbama na kati ya muntu. Bawu zolaka tuba, “Muntu ve lenda sala bisalu yayi kana ti ya vwanda Nzambi. Muntu ve lenda sala yawu, mpe wapi mutindu awa kele na muntu mpe dyaka bisalu ya Nzambi ke monisama na nzila ya Yandi!” Beno me mona, bawu lendaka ve kubakula ti Nzambi vwandaka ya kubumbama.

<sup>101</sup> Yandi me bumbama na kati ya muntu, mutindu Yandi vwandaka ntangu nyonso ya kubumbama. Kasi, Yandi

vwandaka ya kubumbama na bawu, Yandi vwandaka na kati ya tempelo ya Yandi ya kimuntu. Nzambi vwandaka na kati ya tempelo ya kimuntu. Ntangu yayi, beno sala keba mingi, ntangu yayi Yandi kele mutindu mosi mazono, bubu yayi, mpe ntangu nyonso. Beno me mona? Nzambi ya kubumbama, ke bumbama Yandi mosi na yinza, ya kubumbama na kati ya muntu ya moyo. Beno me mona? Awa vwandaka Nzambi! Ba-Grec yina vwandaka tuba, “Beto zola mona Yandi.”

<sup>102</sup> Mpe Yesu tubaka, “Mbuma ya blé fwana kubwa mpe kufwa.” Beno fwana kufwa na mabanza ya beno nyonso. Beno fwana basika na mabanza ya beno mosi.

Mutindu bilandi yina vwandaka, ba lendaka ve kubangula yina ke tala kudya nzutu ya Yandi mpe—mpe kunwa Menga ya Yandi, kasi, beno tala, bawu kufwaka ya muvimba samu na bima yina. Bawu kufwaka samu na Musiku, bawu kufwaka samu na Klisto. Ata nyonso yina ya kele, to mutindu mbwisulu ya Yandi vwandaka talana, bawu vwandaka kwikila dyaka Yawu na mutindu nyonso. Beno me mona? Bawu lendaka na kumona na kati ya Muntu yina; Muntu yina kudyaka, kunwaka, lobaka, lalaka, nyonso yankaka, yina butamaka awa na zulu ya ntoto, mpe tambulaka na bawu, zonzaka na bawu, lwataka bilele mutindu bayankaka ya bawu, kasi ya vwandaka Nzambi.

<sup>103</sup> Na yawu ba-Grec lendaka ve na kumona Yandi, samu Yandi vwandaka ya kubumbama na bawu, na kati ya muntu ya moyo. Beno tala Ndinga ya Yandi na bawu, “Kana ti mbuma yayi ya blé kubwa na ntoto.”

<sup>104</sup> Nzambi ya bumbama na kati ya nzutu ya muntu, bumbamaka Yandi mosi na ntwala ya meso ya bawu. Bawu lendaka kaka kumona muntu. Kasi bayina ba Soolaka ntete monaka Nzambi. Mosi monaka muntu, yankaka monaka Nzambi. Beno me mona? Mpe ya vwandaka Nzambi ya kubumbama na kati ya muntu ya moyo, ke sala ti bawu zole vwanda na raison, kasi lukwikilu ya beno na yina beno ke mona ve. Beno ke kwikila yawu, na mutindu nyonso. Nzambi ya kubumbama na kati ya muntu ya moyo. Yandi vwandaka na kati nzutu yina, mpe nzutu yina vwandaka vwale ya Yandi. Vwale pasukaka, beno me mona, samu Nzambi kumonisama.

<sup>105</sup> Na Ngwisani ya Ntama, Nzambi vwandaka ya kubumbama ntangu Yandi vwandaka na kiti ya Yandi ya kyadi; na kiti ya kyadi, na nzila ya vwale. Na Ngwisani ya Ntama, Nzambi vwandaka na tempelo ya Yandi. Kasi bantu vwanda kwiza mpe vwanda sambila mutindu yayi, kasi, beno bambuka moyo, ya vwandaka na vwale (amen) yina vwanda bumba Nzambi. Bawu zabaka ti Nzambi vwandaka kuna. Bawu lendaka ve kumona Yandi. Dikunzi yina ya Tiya monikaka ata mbala mosi dyaka ve kuna. Beno talaka? Ya kele ve na ntangu mosi na kati ya Masonuku, kubanda ntangu Dikunzi yina ya Tiya kotaka

na manima ya vwale yina, ti Yawu talanaka dyaka, tii Yawu kwizaka na Yesu Klisto. Nzambi vwandaka ya kubumbama!

<sup>106</sup> Ntangu Yandi vwandaka na zulu ya ntoto, Yandi tubaka, “Mu me katuka na Nzambi mpe mu ke kwenda na Nzambi.”

<sup>107</sup> Na manima Paul, (na manima ya lufwa ya Yandi, ya luzikulu ya Yandi, mpe ya mvumbukulu ya Yandi), na nzila ya yandi na Damas, kuna vwandaka Dikunzi yina ya Tiya dyaka. Yinki Yawu vwandaka? Yawu basikaka na manima ya vwale! Nkembo na Nzambi!

<sup>108</sup> Yandi vwandaka na kati ya manima ya vwale. Ntangu yayi Yandi vwandaka na manima ya yinki? Ya vwale ya mpusu. Beno me mona, “bampusu ya bibulu,” na manima ya vwale. Mpe na ntangu vwale yina pasukaka na kilumbu ya kulunsi, vwale na kati ya yina Yandi vwandaka ya kufuka kupasukaka na kilumbu ya kulunsi, kiti ya muvimba ya kyadi kumonanaka.

<sup>109</sup> Ntangu yayi, ba-Juif lendaka ve kubakula mutindu ti Nzambi lendaka vwanda na kyadi ya bantu ya masumu, bantu ya yimbi mutindu beto kele. Kasi ba lendaka ve kumona Yandi yayi Yina vwandaka tala kyadi, samu ti Yandi vwandaka ya kubumbama. Yandi vwandaka na manima ya kiti ya kyadi, na kati, na bampusu ya bibulu yina vwandaka diembela, na kufuka Yandi. Na ntwala . . .

<sup>110</sup> Na ntwala, kana muntu mosi kotaka na manima ya vwale yina, ya vwandaka mbala mosi lufwa. Amen. Oh, beto ke kuzwa leso mosi awa na mwa na ntangu fyoti, beno me mona, kana beno lenda—beno lenda ndima Yawu. Na kutambula na manima ya bampusu ya bawu. . . Mpe mosi ya bana ya babakala ya nganga-Nzambi mekana na kusala yawu kilumbu mosi, mpe yandi kufwaka. “Beno kwenda ve na manima ya vwale yina.” Muntu yina vwandaka luta na manima. . . Samu na yinki? Ya vwandaka ntete ve na mpulusu, na kati ya yawu. Ya vwandaka kima ke luta. Ya vwandaka kaka kima ke luta. Mpe nyonso ya *kima ke luta* kele ntete ve kima ya kieleka, beno me mona, kima ke luta kaka. Ya vwandaka mpulusu. . . Disumu vwandaka fuka, vwandaka katuka ve. . . katulaka, mu zolaka tuba, katulaka ve. *Kukatulaka* kele “kukabikisa mpe kufwa.” Mpe na yawu menga ya mameme mpe ya bankombo lendaka ve kusala yawu, na yawu Yehowa vwandaka ya kubumbama na manima ya vwale. Ntangu yayi, na manima ya vwale yayi kisika Yandi vwandaka ya kubumbama, kukota kuna, muntu kubwaka kufwa, na kumeka na kukota na Yawu.

<sup>111</sup> Kasi tuka Pentecote, tuka Kulunsi, ntangu vwale yina pasukaka kubanda na zulu tii na yisi, samu na nsungi yina. . . Yesu vwandaka Nzambi yina, ya kubumbama. Mpe na ntangu Yandi kufwaka na Calvaire, Nzambi tumaka tiya mpe nzasi, mpe pasulaka vwale yina na zulu tii na yisi, ti kiti ya muvimba ya kyadi vwandaka pwelele na ntwala ya bantu nyonso. Kasi bawu

vwandaka ya kufwa meso mingi na kumona Yawu. Mutindu Moise tubaka awa, ata, to. . . Paul tubaka, na kutangaka Moise, “Ntangu ba ke tangaka Moise, dyaka, vwale yina kele dyaka na zulu ya ntima ya bawu.” Oh, mpangi-bakala, mpangi-kento, yawu yina ba-Juif salaka ntangu vwale pasukaka mpe Nzambi me talana pwelele na ntwala ya bantu nyonso, ya kulelika na kulunsi. Yandi vwandaka pwelele na ntwala ya bantu nyonso, kasi bawu lendaka ve kumona Yawu.

112 Ya lendaka vwanda ti Bantu ya makanda me sala kima mutindu mosi? O Nzambi! Ntangu bawu kuzwaka bansungi ya dibuundu, ya Mwana ya Nzambi; kasi ntangu awa vwale ya ba-denomination yayi mpe nyonso, vwale yayi ya kinkulu yina beto me kuzwa tuka Pentecote, ntangu binkulu ya dibuundu pasukaka, bima yina bantu tubaka, “Bilumbu ya bimangu me luta, mpe bima yayi,” mpe Nzambi katulaka vwale na Yawu, mpe nataka Yawu pwelele na ntwala ya bantu nyonso, mpe bawu me yilama na kukoma dyaka Yawu, kaka kieleka mutindu mosi.

113 Nzambi yina me monisama, pwelele na ntwala ya bantu, ba zolaka mona Yandi ya kutelama kuna. Kasi Yandi vwandaka mingi mutindu bantu nyonso, Yandi vwandaka muntu mutindu bantu nyonso. Bawu lendaka ve kumona Yawu. Beno me mona, kuna vwandaka muntu. “Mbote,” bawu tubaka, “bakala yayi, na wapi lukolo Yandi me basika?” Kasi, beno bambuka moyo, ntangu dyonga yina kotaka na nzutu ya Yandi, Mpeve yina bikaka Yandi, tempelo. . . bamesa ya minkayulu kubalukaka, mpe lusyemo sabukaka tempelo mpe pasulaka vwale. Yinki ya vwandaka? Kuna vwandaka Nzambi ya bawu ya kulelika na Calvaire, mpe bawu vwandaka ya kufwa meso mingi na kumona yawu.

114 Ba nataka Yandi na ntwala ya bantu nyonso, mpe dyaka bawu monaka Yawu ve! Bawu kele ya kufwa meso. Nzambi, ya kubumbama na kati ya muntu ya moyo!

115 Beno bambuka moyo, Yandi vutukaka kuna na Paul na manima ya yawu, mpe na Pierre na boloko, mutindu Dikunzi ya Tiya. Beno ke bambuka moyo na yawu?

116 Kasi na bilumbu ya nsuka Yandi fwana vutuka dyaka, kasi Dikunzi ya Tiya fwana vutuka dyaka samu na kutalisa Mwana ya muntu, beno me mona, samu na kulakisa Ndinga, Nsemo. Binkulu, yina vwandaka, ke zimbana. Ya ke vwanda na kima ve ke kwamisa Yawu; yawu ke salama, na mutindu nyonso. Nzambi ke mwangisa kaka ba-denomination mpe binkulu ya bawu.

Na wapi mutindu ya Mpeve Yandi ke sala yawu? Mutindu Yandi salaka na kisika ya ntete. Beno tala yina Yandi salaka na bilumbu ya Elie, na bilumbu ya Jean. “Beno banza ve na kutuba na beno mosi beno ‘kele na Abraham tata,’ samu ti Nzambi kele na lenda na matadi yayi na kubasisa bana samu na Abraham.” Beno me mona? Beno banza ve, “Samu ti, mu kele ya *yayi* mpe mu

kele ya *yina*.” Beno me mona? Nzambi ke katula vwale, beno me mona, samu na kulakisa Nani Yandi kele. Beno me mona, beno tala mbote vwale ntangu yawu pasukaka awa ntangu yayi, beto ke tala ntangu yayi.

<sup>117</sup> Ntangu yayi, mpe mbala mosi, kana muntu lutaka vwale yina, ya vwandaka lufwa na mbala mosi. Ntangu yayi ya kele lufwa ve na kuluta na Yawu! Amen. Kana beno lenda ve kubuka vwale yina ya kinkulu, kuluta kibaka yina ya denomination, samu na kumona Nzambi na ngolo ya Yandi, ya kele lufwa. Na ntangu mosi ya vwandaka lufwa na kukota na kati, ntangu yayi ya kele lufwa na kuvwanda na ngaanda. Kiti ya muvimba ya Kyadi kele pwelele na ntwala ya bantu, muntu nyonso lenda mona Yawu, vwale me pasuka. Nkembo na Nzambi! Kiti ya muvimba ya Kyadi me talana pwelele na ntwala ya bantu.

<sup>118</sup> Wapi mutindu Nzambi lendaka na kutala kyadi na misumuki ya yimbi mutindu beto, ntangu Yandi bumbamaka Yandi mosi, ya vwandaka dinsweki. Mpe ntangu yayi Yawu kele pwelele na ntwala ya bantu, to ya muvimba na meso ya bantu, ya kumonisama na nzila ya Ndinga ya Yandi. Ya kele ntangu nyonso Ndinga, ntangu nyonso, ya kele Nzambi. Ya kele Ndinga ti ke zibulaka yawu. Kana bantu yina zolaka zaba Ndinga ya Nzambi kilumbu yina ntangu Yesu kufwaka, bawu zolaka mona Kiti ya Kyadi, bawu zolaka mona Nani Yandi vwandaka.

<sup>119</sup> “Nani Yawu vwandaka kuna? Samu na yinki vwale pasukaka?” Beno bambuka moyo, ya vwandaka lufwa na kukota na Yawu. Muntu ve zolaka mona Yawu. Moise monaka Yawu na kati ya nzutu mosi, Yawu vwandaka kidye . . . ya vwandaka mukongo ya Muntu. Mbote, awa Yawu kele, mukongo ya kifuluka na menga, Muntu yango mosi! Yinki Yawu vwandaka? Nzambi vwanda zola kulakisa bawu Kiti ya Kyadi. Nzambi vwanda zola kulakisa bawu Nani Yandi vwandaka. Na yawu vwale na tempelo, na diboko ya Nzambi, na zulu, pasukaka na zulu tii na yisi, mpe lakisaka Nzambi pwelele na ntwala ya bantu. Ya vwandaka Yesu Klisto ya kulelika na zulu ya kulunsi, Kiti ya Kyadi. Mpe yinki ya vwandaka? Bantu vwandaka ya kufwa meso mingi na kumona Yawu.

<sup>120</sup> Ntangu yayi ya me vutukila dyaka, binkulu ya bawu! Mutindu, kuna, na Kilumbu ya Pentecote, Ndinga kwizaka mpe vwandaka na kati ya nzutu ya “Mwana ya Nzambi.” Mpe bawu bandaka na kusala yawu organisation na Nicée, na Rome. Mpe, kima ya ntete, bawu kwendaka na ba-Methodiste, ba-Baptiste, ba-Presbyterien, ba-Pentecotiste, mpe nyonso yankaka. Ya kele kinkulu ya kubongisa tii muntu ke zaba ve kisika yandi kele.

Kasi, nkembo na Nzambi, Yandi silaka na bilumbu ya nsuka yina Yandi ke sala. Yandi ke lakisa Ndinga ya Yandi pwelele na ntwala ya bantu, ya kufunguka na ntwala ya beto dyaka, beno me mona, kuzibula Yawu.



121 Kana bawu zabaka kaka Ndinga, bawu zolaka zaba Nani Yesu vwandaka. Kana muntu zabaka kaka Ndinga ya Nzambi, yandi zolaka zaba ngunga yina beto ke na kuzinga mpe yina ke na kusalamaka. Bawu mangaka kaka na kuwa Ndinga yina. Binkulu ya bawu! Yinki salaka ti ba-Juif kumona yawu? Yinki? Ya ke talana mutindu ti ba zolaka ya kieleka kumona yawu, samu ti kima vwandaka ya kupasuka mwasi. Yawu vwandaka ya kupasuka mwasi samu na lukanu mosi.

122 Samu na yinki reveil yayi keke na ntangu yayi? Wapi mutindu ya lenda kwenda na ntwala? Wapi mutindu ya lenda vwanza ya kusakumuka? Mu ke tala ve na lutangu ya bilandalandanda yina keke na yawu, to nyonso yankaka, yina ke ve. . . Ntangu Moise basikaka, ya vwanza na nkonga ya bantu ya mutindu na mutindu yina kwenda na yandi. Kasi yinki ya salaka? Ya keke Yehowa Yandi mosi ke katula vwale na Nzambi, samu na kulakisa luswaswanu na kati-kati ya kieleka mpe luvunu. Ya keke, ba-Méthodiste, ba-Baptiste, ba-Presbytérien, to nani keke na kieleka? Ndinga ya Nzambi keke kieleka! “Bika ti konso ndinga ya muntu kuvwanda luvunu, mpe ya Munu Kieleka.” Nzambi keke na nsatu ya mutenduli ve. Yandi ke salaka lutendulu ya Yandi Mosi. Yandi lakisaka Yawu, mpe. . . ya pesaka lutendulu. Nzambi ke monana Yandi mosi. Oh, la la! Kaka na kati-kati ya beto, beto ke mona diboko ya Yandi ya nene kutuba bima yayi, kusala bima yayi.

123 Mu keke na kima na zulu ya yawu na nkokila yayi, beno me mona, na mutindu ya kutala mbote diboko ya Nzambi, yina Yawu ke salaka, mutindu Yawu ke monanaka yawu mosi. Beno me mona?

124 Mpe bantu ke tubaka, “Oh, Yina keke buzoba. Yina keke bufanatiki kuna. Ya keke na kima ve na Yawu. Yina keke buzoba. Yina keke Beelzebul. Yina keke dyabulu. Yina keke bunganga. Ya keke yayi.” Beno me mona, kima mosi bawu tubaka na zulu ya Yandi.

125 O dibuundu, mpe kana bande yayi kubasika, beno lenda mona ve, milongi ya Nsangu ya mbote, kisika beno keke na kuzingaka? Beno lenda ve kumona ngunga na kati ya yina beto keke? Nzambi, na kulakisaka Yandi mosi, ke tula na lweka. . . Beno tala, Yandi bakaka vwale yina ya tempelo mpe pasulaka yawu na bitini, ti bawu lendaka mona Nzambi pwelele na ntwala ya bantu, mpe bawu vwanza ya kufwa meso mingi na kumona Yawu. Mpe Yandi me sala kima mosi bubu yayi, na kulakisa ya muvimba Ndinga ya Yandi na ntwala ya bantu nyonso, yina Yandi silaka. Konso nsilulu na Ndinga, ya kutulama kaka na ntwala ya beto, pwelele na ntwala ya bantu!

126 Beno zaba yina dibuundu ya Bantu ya makanda ke salaka? Kima mosi dibuundu ya ba-Juif salaka, ya kufwa meso mingi na

kumona Yawu. Kaka yina. Ya ke vwanda na bantima ya bawu kaka mutindu ya vwandaka na kilumbu yina.

<sup>127</sup> Beno tala, na kuvwanda ntama na Yawu ntangu yayi, kele lufwa. Beno fwana kota na kati ya Yawu na nzila ya vwale yayi, to beno ke lenda ve. Wapi mutindu Nzambi zolaka vwanda na kyadi na bawu, kasi beno bambuka moyo yina ya vwandaka, ti Nzambi ke lakisa yina vwandaka na manima ya vwale yina. Beno tala mbote yina vwandaka na manima ya vwale, Ndinga! Yinki ya vwandaka bumba? Ndinga! Yinki ya vwandaka? Ya kele na kati ya nzasa. Ya vwandaka Ndinga ti vwale yina vwandaka bumba. Beno me mona? Mpe Yesu vwandaka Ndinga yina, mpe Yandi kele Ndinga yina, mpe vwale ya nzutu ya Yandi vwandaka bumba Yawu.

<sup>128</sup> Mpe bubu yayi vwale ya kinkulu ke bumba dyaka Ndinga, na kutubaka, “Ya kele mutindu yina ve.” Kasi Yawu kele mutindu yina! Nzambi ke na kupesaka kimbangi ya Yawu, ke na kupela kaka Yandi mosi mutindu mwini, na ntwala ya muntu nyonso, mpe bawu ke na kukondwa na kumona Yawu. Nzambi, tala beto kyadi.

<sup>129</sup> Na kifwanukusu, Moise katukaka na Ntwala ya Nzambi, na Ndinga ya Nzambi samu na nsungi yina. Beno tala mbote ntangu yayi, beto kele ntangu yayi na Exode 19. Beno kondwa yayi ve. Exode 19, Moise me katuka na Ntwala ya Nzambi, to 20 mpe 21, 19:20 mpe 21. Moise me katuka na Ntwala ya Nzambi. Yandi me vwanda na kati ya Ndinga. Ndinga me sonama. Mpe yandi, na Ntwala ya Nzambi, na Ndinga, yandi vwandaka na Ndinga samu na nsungi yina. Ya kele na Ndinga samu na konso nsungi. Mpe ntangu Moise kwizaka, kizizi ya yandi vwandaka kupela mingi! Beno me mona? Ndinga vwandaka na kati ya yandi, me kubama na kumonisama, na kupesama na bantu.

<sup>130</sup> Ndinga ya kieleka, Nzambi sonikaka Yawu, mpe Yawu vwandaka na Moise. Beno tala, Yawu vwandaka na Moise mpe vwandaka ya kukubama na kumonisama. Yandi vwandaka Ndinga samu na bawu, yandi vwandaka Ndinga ya moyo, ya kubumbama. Yandi bambuka yandi mosi, Moise zolaka tula vwale na zulu ya kizizi ya yandi mosi. Samu na yinki? Yandi vwandaka Ndinga yina. Amen. Tii Ndinga yina zabanaka, Moise zolaka bumba yandi mosi. Amen!

Beno ke mona Yawu? Konso kisika yina Ndinga kele, Yawu ke bumbama.

<sup>131</sup> Moise vwandaka na Ndinga. Ntangu yayi beno bambuka moyo, na manima Ndinga me monisama, Moise vwandaka dyaka Moise. Beno me mona? Kasi na ntangu Ndinga yina vwandaka na kati ya yandi samu na kupesama, yandi vwandaka Nzambi; mbote, yandi vwandaka dyaka ve Moise. Yandi vwandaka na Ndinga ya Mfumu samu na nsungi yina. Kima ve zolaka simba yandi tii kuna ya ke suka; ya vwandaka na Ndinga yina na

yandi. Na yawu, kuna, ntangu yandi kwizaka, bantu balulaka bayintu ya bawu; bawu lendaka ve na kubakula. Bawu sobaka. Yandi vwandaka muntu yankaka. Yandi kwizaka na Ndinga yina. “Mpe yandi tulaka vwale,” Biblia ke tuba, “na zulu ya kizizi ya yandi,” samu yandi vwandaka na Ndinga. Mpe yandi vwandaka Ndinga samu na bawu.

<sup>132</sup> Ntangu yayi beno tala, kana Moise. . . O mpangi, yayi ke nyongisa. Kasi kana Moise. . . Mutindu Paul tubaka awa na ya Zole ya Corinthiens, kapu ya 3. Kana Moise zolaka bumba kizizi ya yandi na mutindu yina ya Nkembo na zulu ya yandi. . . beno me mona, samu ti yina vwandaka nkembo ya yinza, yina vwandaka musiku ya yinza. Mpe kana Moise, na kuzabaka ti musiku yina zolaka kufwa, kasi Nkembo vwandaka nene mingi ti yawu kufwaka meso ya bantu, na yawu bawu zolaka tula vwale na kizizi ya yandi, wapi mutindu kulutila Yawu ke vwanda? Bantu ya kimpeve ya kufwa meso! Uh-huh. Nkembo yina vwandaka luta, kasi Nkembo yayi ke luta ve. Beno me mona? Moise vwandaka na misiku ya nsuni, lufundusu, kukondwa lemvo, kukondwa kima; ya vwandaka fundisa kaka beno. Kasi Yayi beto ke na kuzonzilaka. . . Ya vwandaka ya kukondwa lemvo, ya vwandaka tuba kaka na beno yina beno vwandaka. Yayi ke pesa beno nzila ya kubasikila.

<sup>133</sup> Mpe ntangu Ndinga yango me monana, oh, la la, wapi mutindu ya kizizi Yawu ke vwanda? Yawu fwana vwanda ya kubumbama. Yawu fwana vwanda ya kubumbama. Ntangu yayi beno tala. Na yawu Mpeve ke bumbama na kati ya tempelo ya kimuntu, beno me mona, Yandi ke tuba bandinga ya kimuntu na vwale ya kimuntu.

<sup>134</sup> Ntangu yayi, Paul ke na kuzonzaka awa ntangu yayi, mpe na yayi—yayi mutindu, Ndinga—Mpeve, “Beto kele milongi, ve ya mukanda, ya musiku; kasi me kuzwa lenda ya kuvwanda milongi ya Mpeve,” ti Mpeve ke bakaka mukanda mpe ke monisa Yawu.

<sup>135</sup> Yina vwandaka kaka musiku, beno zolaka kwenda tala, kutuba, “Nge ke sala pité ve. Nge ke yiba ve. Nge ke vuna ve. Nge ke sala *yayi*, *yina*, to *yankaka* ve.” Beno me mona? Beno zolaka tala yawu.

<sup>136</sup> Kasi yayi kele Mpeve yina ke kwiza na zulu ya Ndinga silamaka samu na nsungi *yayi*, mpe yina ke basisa mpe ke monisa, ve bamesa zole ya matadi, kasi Mvwandulu ya Nzambi ya moyo. Ve dibanza ya luvunu yina muntu me sala, to Houdini mosi, mazi; kasi nsilulu ya kieleka ya Nzambi yina me monana mpe me talana ya kieleka na ntuala ya beto. Wapi mutindu ya vwale yina ke vwanda na manima? Mpe ku—kuzimbisa yawu. . .

<sup>137</sup> Beno me mona, yina vwandaka nene mingi ti bantu tubaka, bawu tubaka ntangu bawu monaka Yehowa kukulumuka na Dikunzi ya Tiya yayi, mpe bandaka na kuningisa ntoto, mpe—mpe bima yina Yandi salaka, mpe mongo na tiya. Mpe dyaka

kana muntu mekaka na kukwenda na mongo yina, yandi kufwaka. Ya vwandaka nene mingi ti mpe Moise vwandaka tala boma ya kuningana. Na yina, kana na ntangu yina Yandi ningisaka kaka mongo, mbala yayi Yandi ke ningisa mazulu mpe ntoto.

<sup>138</sup> Yinki samu na Nkembo Yayi? Kana yina vwandaka ya kubumbama na vwale ya kimuntu, yayi kele kieleka...ya kubumbama na nzila ya vwale ya kimpeve. Na yawu beno meka ve na kutala na ya kimuntu; beno kota na Kimpeve mpe beno mona kisika yina beno kele, beno mona ngunga yina beto ke na kuzinga.

<sup>139</sup> Ya kele ya kulunga samu na beno? Beno me mona, Ya kele vwale ya kimpeve yina kele na zulu ya bantu, na kutuba, “Mu kele Methodiste. Mu kele mbote mutindu muntu nyonso. Mu kele Baptiste. Mpe mu kele Pentecotiste.” Beno ke bakula yawu ve, ti kima yina kele vwale ya kinkulu? Ya ke na kubumbaka Nzambi na ntuala ya beno. Ya kele kima yina ke kanga beno na kusepela na nyonso . . .

Oh, beno ke tuba, “Mu ke bokaka mpe ke dumukaka.”

<sup>140</sup> Yandi tubaka, “Ndinga nyonso!” Eve kwikilaka Ndinga nyonso kukondwa mosi. Beno me mona? Ya kele Ndinga ya muvimba ya Nzambi, nsilulu ya ngunga yayi ya kutalana. Beno me mona?

<sup>141</sup> Beno tala ntangu yayi na yina beto ke landila na kukwenda. Mu kele na mingi awa samu na kuzonzila, kasi mu kele na bapaze makumi zole, kasi ya . . .ya—ya—ya banoti, kasi mu—mu ke zonzila kaka ve na nyonso. Beno me mona, mu ke sala nswalu.

<sup>142</sup> Yandi me bumbama na vwale ya kimuntu ntete yandi lenda zonza Ndinga na bantu. Ntangu yayi, Nzambi fwana bumbama Yandi mosi, mutindu Yandi silaka, na nzutu ya muntu. Nzambi! Beno ke bakula Yawu? Nzambi fwana bumbama Yandi mosi na nzutu ya muntu, mpe kutula vwale ya kimpeve na zulu ya bawu, (na kutuba, “Mbote, mu kele *yayi* mpe mu kele *yina*”), samu na kuzonza na bantu. Ntangu vwale, yina kele vwale ya kinkulu, me pasuka, na yina . . .yina bawu ke tuba, “Mbote, bilumbu ya bimangu me luta.”

<sup>143</sup> Bakala mosi tubaka na munu kilumbu yankaka, ntwenya mosi—mosi ya mulongi ya Baptiste kuna, yandi kwizaka na munu, Mpangi Green, mpe yandi tubaka, “Mpangi Branham, tala mu kele na dyambu mosi na nge.” Yandi tubaka, “Nge ke na kumekaka na kukumisa bantu . . .” Ya vwandaka na Auberge Ramada, ntangu beto vwandaka na lukutakanu kuna. Yandi tubaka, “Nge ke na kumekaka na kusala bantu kukwikila na nsungi ya bantumwa, na kuzinga bubu yayi mutindu bawu vwandaka na nsungi ya bantumwa.” Yandi tubaka, “Nsungi ya bantumwa sukaka na bantumwa.”

Mu tubaka, “Ya kieleka?”

“Yinga.”

Mu tubaka, “Nani vwandaka muzonzi na nsungi ya bantumwa?”

Yandi tubaka, “Bantumwa kumi na zole na kivinga ya zulu.”

<sup>144</sup> Mu tubaka, “Na yina ya ke katula Paul.” Mu tubaka, “Muzonzi vwandaka Pierre. Mpe Pierre tubaka, na Kilumbu ya Pentecote, ntangu bawu monaka nyonso yayi kusalama, mpe Mpeve-Santu kusala, yandi tubaka, ‘Nsilulu kele samu na beno, mpe na bana ya beno, mpe na bayina kele ntama, mpe mingi kulutila mutindu Mfumu Nzambi ya beto ke bokila kaka.’ Kana Yandi ke na kubokila dyaka, na yina Kima mosi kele awa. Na yina wapi ntangu nsungi ya bantumwa sukaka? Nsungi ya bantumwa ke suka ntangu Nzambi ke sukisa na kubokila.” Yandi tubaka ata kima dyaka ve kasi bakaka yimpu ya yandi mpe kwendaka.

<sup>145</sup> Ya ke lomba Ndinga na kusala yawu. Ya kele Ndinga. Yesu tubaka na Satana, “Ya kele ya kusunama.” Beno me mona? Kaka yina, “Ya kele ya kusunama.”

<sup>146</sup> Mu tubaka, “Pierre tubaka ti ya ke suka ata mbala mosi ve. Mingi kulutila mutindu Mfumu ke bokila, Lusakumunu yayi vwandaka samu na bawu. Ntangu yayi beno ke tuba, ‘Yandi sukisaka.’ Na wapi ntangu?”

“Kukondwa dyambu?”

Mu tubaka, “Ve, tata, ata fyoti ve. Kwenda na ntwala.” Uhuh. Kaka kuna. Beno me mona?

<sup>147</sup> Pierre tubaka ti yawu vwandaka samu na konso muntu yina Nzambi ke bokila, yandi ke kuzwa Lusakumunu mosi ya bantumwa. Yina kele—yina kele Ndinga ya Mfumu. Beno me mona?

<sup>148</sup> Ntangu yayi vwale ya kimuntu. Nzambi, Ndinga, bumbamaka na kati ya nzutu ya muntu. Yinki ya vwandaka? Nzambi vwandaka ya kubumbama na kati ya Moise. Nzambi vwandaka na kati ya Moise, ya kubumbama, mpe Mvwandulu ya Nzambi vwandaka na kati ya yandi. Yandi vwandaka ya kulunga mingi na Ndinga yina na kati ya yandi mutindu yina, ti yandi zolaka bumba kizizi ya yandi. Mpe ya vwandaka profete me siamisama yina fungulaka Ndinga mpe tubaka na bawu, “Nge ke sala ve! Nge ke sala! Mpe nge ke sala ve!” Beno me mona?

<sup>149</sup> Samu na kupesa Ndinga ya Yandi na nsungi yina, Yandi bumbamaka Yandi mosi na kati ya muntu ya moyo, kana ve Ndinga zolaka kufwa meso mpe ya bayina ba bokilaka na kubasika. Beno me mona? Ata mpe bantu yina vwandaka kuna, bawu lendaka ve na kutelema na kumona yawu. Na—na Exode beto ke tala ti, bawu tubaka, “Bika ti Moise kuzonza, Nzambi

ve.” Beno me mona samu na yinki Dikunzi ya Tiya ke monanaka mingi ve? Beno me mona?

<sup>150</sup> Nzambi tubaka, “Mu—Mu—Mu ke sala yawu. Mu ke telemisa bawu Profete.” Amen! “Mu ke telemisa bawu mosi.” Mpe Yandi kwizaka ya kieleka kaka. “Mu ke telemisa, mpe Yandi ke vwanda, ke vwanda Ndinga.”

<sup>151</sup> Yandi tubaka, “Kana bawu zola kumona yina Ndinga kele. . .” Yandi tubaka, “Ntangu yayi, Moise, Mu monikaka na nge kuna, na divunda ya tiya.” Yandi tubaka, “Mu ke kulumuka mpe ke tula mongo yina na tiya.” Yandi tubaka, “Ba ke mona ti nge tubaka kieleka. Mu ke monika awa na—na mutindu mosi ya tiya. Mu ke monika awa mpe ke siamisa na bantu, Mu ke siamisa ministele ya nge.” Yawu yina Yandi tubaka na Moise awa, bampova mingi.

<sup>152</sup> Beno tala, Yandi tubaka, “Ntangu yayi Mu ke—Mu ke kembisa nge na ntwala ya bantu.” Yandi tubaka, “Ntangu yayi, nge tubaka na bawu ti Mu kutanaka na nge kuna na divunda ya tiya; ntangu yayi Mu ke kulumuka, Tiya mosi, mpe Mu ke bika bantu kumona ti nge vunaka ata mbala mosi ve na zulu ya Yawu.” Beno lenda lakisa Yawu na mutindu ya science, mpe, kana beno zola. Beno me mona? “Mu ke kulumuka kaka mpe ke bika bawu kuzaba.”

<sup>153</sup> Mpe ntangu Yandi bandaka na kungana, ntangu Yehowa bandaka na kungana, bantu tubaka, “Ve! Ve! Ve! Ti Yehowa kuzonza ve; beto ke—beto ke kufwa.”

<sup>154</sup> Beno me mona, Yandi zolaka bumbama, na yawu Nzambi bumbamaka Yandi mosi na Moise mpe pesaka Moise Ndinga. Mpe Moise kulumukaka mpe zonzaka Ndinga ya Mfumu, na vwale na zulu ya kizizi ya yandi. Ya kieleka? Yehowa ya kubumbama na kati ya nzutu ya profete, samu ya zolaka vwanda kieleka. . . Mpe Nzambi tubaka ti Yandi zolaka zonza dyaka ve na bawu na mutindu yina. Yandi ke zonza na bawu kaka na nzila ya profete. Yina kele mutindu kaka Yandi zolaka zonza ntete ve kubanda kuna. Yina kele kaka mutindu Yandi zonzaka zonza ntete ve. Ya kele kieleka. Ata mbala mosi ve na mutindu yankaka. Yandi ke vunaka ve.

<sup>155</sup> Beno tala, kaka Moise vwandaka na Ndinga. Ntangu yayi, ya vwandaka ve na kimvuka kulumukaka, ya vwandaka kaka ba-Pharisien ve, to ba-Sadducéen ve, to ya vwandaka ve mwa kinzambi-nzambi to nkonga mosi ya bantu. Ya vwandaka Moise! Yandi kuzwaka muntu mosi. Yandi lenda ve kuzwa mabanza zole to tatu ya kuswaswana. Yandi ke bakaka muntu mosi. Moise vwandaka na Ndinga, mpe Moise kaka. Josué mpe kuzwaka ve Yawu. Muntu yankaka ve kuzwaka Yawu. Amen! Josué vwandaka mfumu ya basoda; Josué vwandaka komanda ya basoda; Josué vwandaka mukwikidi, Muklisto. Kasi Moise vwandaka profete! Ndinga lendaka kwiza ve na Josué; Ya fwana

kwiza na Moise. Yandi vwandaka profete ya nene ya ngunga. Beno tala, Ndinga ata mbala mosi ve kwizaka na Josué tii ntangu Moise kwendaka. Ve, tata. Nzambi ke salaka na mosi na ntangu mosi. Nzambi kele mosi. Beno me mona? Ntangu yayi, kaka Moise vwandaka na Ndinga, nkonga ya bantu ve.

<sup>156</sup> Beno tala, Nzambi kebisaka muntu nyonso na kumeka ve na kulanda Moise na vwale yina; bayina ke landaka na kusala. Beno me mona? Kento, bakala, nganga-Nzambi, nyonso yina ya vwandaka, ata mutindu santu, ata mutindu muntu, ata mutindu ya kuzituswa, ata mutindu bawu vwandaka; Yandi kebisaka, “Ti Moise kwiza yandi mosi! Mpe kana muntu mosi, mpe kibulu, kusimba yawu, yandi fwana kufwa kaka kuna.” Kukota ata mbala mosi ve na manima ya vwale yina. Vwale yina kele samu na muntu mosi. Nsangu yina kele muntu mosi. Beno me mona? Na kati ya tempelo, muntu mosi vwandaka kota mbala mosi na mvula, ya kupakula mpe ya kukubika na kukota; ve samu na kubasika na Ndinga, kasi samu na kupesa munkayulu ya menga. Mpe kaka na kukota na kati kuna na ntwala ya Yawu, kaka mosi. Muntu nyonso yankaka kufwaka. Beno me mona?

<sup>157</sup> Bawu ke na kufwa na kimpeve ntangu yayi. Yayi kele vwale ya kimpeve. Beno me mona? Yina vwandaka vwale ya kimuntu. Yayi kele vwale ya kimpeve. Beno me mona? Bawu ke landila kaka na kutambula na manima kuna, beno lenda tuba na bawu. “Oh, mu zaba! Mu zaba yawu, kasi mu . . .”

Mu tubaka, “Kwenda na ntwala, ya kele nyonso ya kulunga, ya ke zonzila kaka . . .” Beno ke bambuka moyo, mpasi ya nsuka yina salamaka na Egypte, na ntwala ya exode. Mpasi ya nsuka na zulu ya ntoto kele lufwa ya kimpeve, na ntwala ya exode. Na yina ba ke vwanda na boloko mpe ba ke vutuka na fundu-fundu, mpe bantu ya kudedama ke tambula na zulu ya mbombi ya bawu. Kasi kima ya nsuka kele lufwa ya kimpeve, na kumangaka Ndinga.

<sup>158</sup> Ntangu yayi beno tala, Nzambi kebisaka bantu nyonso na kumeka ve na kulanda Moise na vwale ya Tiya. Moise zolaka vwanda ya kubumbama, yandi zolaka basika mutindu yina. Moise vwandaka kota kuna mutindu Moise, vwandaka kota na Dikunzi yayi ya Tiya; mpe ntangu yandi vwandaka basika kuna, yandi vwandaka ya kubumbama. Samu, yandi vwandaka kota Kuna, bikaka binkulu ya yandi, binkulu ya bambuta. Yandi monaka Dikunzi ya Tiya, kasi ntangu yayi yandi ke na kukota na kati ya Dikunzi ya Tiya. Beno me mona? Amen! Mpe yandi ke basika, ya kubumbama. Ndinga ya Nzambi na kati ya muntu, ya kubumbama! Awa yandi ke basika na kutambulaka, oh, la la, mu lenda mona yawu. Yandi kebisaka muntu nyonso yankaka na kumeka yawu, muntu mosi ve lenda landa Yawu. Beno ke sala mbote na kumeka ve. Beno me mona? Ata mpe nganga-Nzambi to muntu ya santu, muntu nyonso yina ya vwandaka, cardinal, bishop, nyonso yankaka, yina mekaka na kukota na vwale yina,

kufwaka. Nzambi kebisaka bawu. Beto ke vwanda na bilanda-landa ve.

<sup>159</sup> Ndinga ya Yandi ke monisama na muntu mosi. Ya me vwandaka ntangu nyonso, profete mosi ke kwiza na Ndinga ya Mfumu, na nsungi nyonso, konso ntangu, na kati ya Masonuku. Ndinga ke kwizaka na mosi. Na konso nsungi, mutindu mosi, ata mpe na bansungi ya dibuundu, kubanda na yina ya ntete tii na ya nsuka. Bayankaka kele na bisika ya bawu, ya kele kieleka, beno tala, kasi beno vwanda ntama na Dikunzi ya Tiya yina. Beno me mona? Wapi mutindu ya lesu beto ke longuka awa! Beno me mona, muntu nyonso ke zola vwanda Moise, mpe muntu nyonso. . .

<sup>160</sup> Beno ke bambuka moyo na yina Dathan mpe bayankaka tubaka kuna? Bawu tubaka, “Ntangu yayi, Moise, vingila fyoti awa! Nge ke baka mingi na zulu ya nge mosi, nge me mona. Ntangu yayi, ya kele na bantu yankaka awa yina Nzambi me bokila.”

<sup>161</sup> Ya kele kieleka. Bawu, mosi na mosi, vwandaka landa mbote ntangu nyonso bawu vwandaka landa, kasi ntangu muntu mekaka na kumata mpe kubaka kisika ya Nzambi yina Yandi pesaka Moise, yandi yina vwandaka ya kusoolama ntete mpe ya kukubika na kosalu yina, mekaka na kubaka yawu, tiya kulumukaka mpe fungulaka ntoto mpe minaka bawu mbala mosi na kati ya yawu. Beno me mona? Beno me mona? Beno sala keba. Beno me mona? Beno vwanda kaka mbote, Muklisto ya Nzambi ya santu, yina ke kwikila Ndinga. Beno me mona? Beno vwanda ntama na Dikunzi yina. Wapi mutindu ya lesu!

<sup>162</sup> Nzambi monikaka ntete na Moise na divunda ya tiya, Nzambi vwandaka ya kubumbama na kati ya Dikunzi ya Tiya. Ntangu yayi beno kuwa mbote-mbote awa mwa ntangu fyoti. Nzambi, na kukwizaka na Moise na ntete, Yandi vwandaka ya kubumbama. Nzambi vwandaka na kati ya Dikunzi ya Tiya, ya kubumbama na kati ya divunda, beno me mona; mutindu na manima ya bampusu, beno me mona, kuna na kiti ya kyadi na autel. Beno me mona? Yandi vwandaka ya kubumbama. Yandi kele ntangu nyonso ya kubumbama. Mpe ntangu Yandi kwizaka na Moise, Yandi vwandaka na kati ya Dikunzi ya Tiya, ya kubumbama na kati ya Dikunzi ya Tiya. Kasi awa, na ntwala ya bantu, Nzambi siamisaka yandi na nzila ya Dikunzi ya Tiya mosi. Beno me mona? Moise tubaka. . .

<sup>163</sup> Ntangu yayi beno tala mbote. Beno ke na kutangaka? Beno ke na kubikaka mabanza ya beno kukwenda ntama? Beno lenda? Beno lenda. . . “Yandi yina kele na makutu, ti yandi kuwa.” Beno me mona?

<sup>164</sup> Ntangu Nzambi monikaka na Moise, ya vwandaka na Dikunzi ya Tiya, ntangu Yandi bokilaka yandi na kosalu ya yandi. Mpe Moise kwizaka mpe tubaka na bantu samu na yawu. Bawu



lendaka ve kukwikila yawu, na kutala yandi salaka bimangu mpe nyonso. Kasi, na ntangu yayi, Yandi talanaka pwelele, na mutindu ya science talanaka mpe siamisaka ministele ya Moise na kuvwandaka Nzambi mosi yina tubaka na yandi, samu ti Yandi monikaka na nzutu ya Dikunzi ya Tiya mpe tulaka mongo na tiya. Mpe Yawu kwizaka na Moise na divunda, zonzaka na yandi. Mbote mingi.

<sup>165</sup> Kumonika ya ntete ya Nzambi, na Moise, na divunda ya tiya, vwale. Na ntwala ya bantu, Nzambi bumbamaka dyaka mpe siamisaka Moise, na nzila ya vwale, na kubumbaka Yandi mosi na Tiya yango, Dikunzi yango mosi ya Tiya kulumukaka. Kubanda—kubanda kuna. . . Kubanda na bawu, samu bawu lenda kaka kuwa Ndinga ya Nzambi. Beno me bakula yawu? Kaka Ndinga, bawu kuwaka Ndinga ya Yandi. Samu ti, Moise vwandaka, samu na bawu, Ndinga ya moyo. Moise! Beno me mona, Nzambi siamisaka mingi Ndinga yina na nzila ya Moise! Beno me mona, Moise tubaka. . . Nzambi tubaka na Moise, “Kwenda kuna. Mu ke vwanda na nge. Yandi ke. . . Kima ve ke telemina na nge. MU KELE YANDI YINA KELE.”

<sup>166</sup> Moise kwendaka, mpe tubaka, “Beno lendaka kwikila yayi ve, mu banza, kasi Nzambi me monika na munu na kati ya Dikunzi ya Tiya mpe Yandi me tuba na munu mambu yayi.”

<sup>167</sup> “Oh, beto kele na mitindu nyonso yina ya bima.” Pharaon tubaka, “Tala!” Pasteur Pharaon tubaka, “Mbote, nge kele na bima ya fyoti ya bunganga. Tala, mu kele na bamazisiye awa yina lenda balula nyoka na. . . nkawa—nkawa na nyoka. Beno kwiza awa, bamazisiye.” Mpe bawu kwizaka kuna mpe salaka kima mutindu mosi.

<sup>168</sup> Moise zabaka. Ata kima ve kwamisaka yandi. Ata lutangu ya bantu ke zolaka kulanda, ya vwandaka sala ata luswaswanu fyoti ve. Moise vwandaka kaka swi. Kima ya ntete beno zaba, bawu komvulaka mwa ntangu fyoti, mpe, mbala mosi, nyoka ya Moise me kudya kaka bayankaka ya bawu. Beno me mona? Samu na yinki? Mutindu bantumwa yina, bawu lendaka kubangula Yawu ve. Moise zabaka ve mutindu Nzambi zolaka sala yawu, kasi Yandi zolaka sala yawu.

<sup>169</sup> Beno bambuka moyo, Yandi tubaka Jambrière na Jannès ke vutuka na bilumbu ya nsuka, beno me mona, bilanda-landa. “Mpe ke vuna Musoolami ya kieleka kana ya lendaka salama,” Matthieu 24:24. Beno me mona? Ya kieleka kaka bima mosi, kusala mutindu mosi ya bimangu mpe nyonso. Beno tala mbote Ndinga yina! Beno tala mbote Ndinga yina! Muntu ke tuba ti yandi ke sala kimangu mpe ke zola dyaka kukwikila ti ya kele na Banzambi tatu, mpe ya kele na mitindu nyonso yayi; beno vwanda ntama na mutindu yina. Beto zaba ti yina kele—yina kele luvunu, beno me mona, ya kele ve kima ya mutindu. Beno me mona? Ndinga, konso Ndinga, konso Ndinga yina ke basika

na yinwa ya Nzambi! Genèse, Ndinga mosi! Awa, ya me tuba, “Kukatula ve to kubwela ndinga mosi ve.” Beno me mona, Ya fwana vwanda Ndinga yina mosi. Beno me mona?

<sup>170</sup> Beno tala, bantu monaka kima yina salamaka. Moise vwanaka ya kubumbama mutindu. . . Yandi vwanaka profete, mpe Nzambi siamisaka Ndinga ya Yandi awa, yandi kwendaka kuna. Mpe yandi monaka bidimbu mpe mambu ya ngitukulu. Mpe kuna, mbote mingi, bantu yayi kabwanaka bawu mosi, dibuundu. Beno me mona, *dibuundu* zola tuba “yina ba me bokila na kubasika.” Beno me mona? Na manima ba bokilaka bawu na kubasika na yinza mpe kukuma bantu ya yinsi mosi, beno me mona, kuna Nzambi bikaka Yandi mosi kuzabana ti Yandi vwanaka Dikunzi ya Tiya yina. Yandi siamisaka nsangu ya Moise. Beno me mona? Yandi vwanaka Dikunzi ya Tiya. Bawu zolaka baka Yawu foto, mu banza, kana bawu vwanaka na bakamera, samu ti yawu nyonso vwanaka na Tiya. Kasi bawu—bawu siamisaka ti, Nzambi vwanaka siamisa ti Nsangu vwanaka kieleka. Nsangu vwanaka kuna, nyonso vwanaka kuna, bawu vwanda kwenda na exode kuna. Yandi bumbaka profete ya Yandi samu na bantu yayi ya exode.

<sup>171</sup> Bantu, beno banza, monaka ti kima salamaka na yandi. Yandi vwanaka ntangu yayi ya kuswaswana na bayankaka ya ba-Israelite. Yandi vwanaka mutindu yankaka, nsangu ya yandi vwanaka mutindu yankaka, yandi vwanaka ya kuswaswana na banganga-Nzambi, yandi vwanaka ya kuswaswana na kima nyonso. Beno me mona, yandi vwanaka muntu ya mutindu yankaka. Bantu monaka ti kima kusalamaka. Nzambi bumbamaka Yandi mosi na kati ya profete ya Yandi, samu na kuzonza Bandinga ya Yandi na bawu. Yawu yina Yandi salaka. Moise vwanaka Ndinga yina ya moyo na bantu, ya kubumbama na Dikunzi ya Tiya, na kuzonzaka yina ba ke bumba na ntuala na manima ya bampusu ya bibulu. Beno me mona?

<sup>172</sup> Ndinga zolaka kwiza na Moise, ntete. Beno me mona? Moise vwanaka na Ndinga. Ya vwanaka ya kusonama na Nzambi, muntu ve zolaka tendula Yawu, Moise zolaka tendula Yawu, ntete. Ya kele samu na yina yandi bumbaka kizizi ya yandi, samu yandi. . . Beno ke mona Yawu? Beno me mona?

Yawu *yayi*. Beto lenda baka Yawu, kunata Yawu, mpe nyonso yankaka kuna, kasi Yawu fwana monana. Samu na kumonisa, Moise zolaka kuma Nzambi na bantu.

Beno ke tuba, “Yina kele buzoba.”

<sup>173</sup> Mbote, Yandi tubaka, mpe tubaka na Moise, Yandi mosi, “Nge ke vwanda Nzambi, mpe Aaron ke vwanda profete ya nge! . . . ? . . .” Beno me mona? Na yawu kuna Yandi kwizaka, beno me mona, Yandi zolaka bumba Yandi mosi, samu Nzambi

kele ntangu nyonso na manima ya vwale mosi. Oh, la la! Beno ke mona Yawu? Nzambi me bumbama na ntwala ya bantu nyonso.

174 Yandi tubaka, “Tata, Mu me tonda Nge, Nge me bumba Yawu na bantu ya ndwenga mpe ya mayele, mpe me monisa Yawu na bana ya fyoti, na bayina zola kulonguka.” Beno me mona?

175 Nzambi ya kubumbama na manima ya vwale. Moise bumbaka kizizi ya yandi. Moise vwandaka Ndinga ya moyo ya kubumbama na ntangu yina. Bantu monaka Dikunzi yango ya Tiya, tubaka, “Ntangu yayi beto ke sepela.” Beno me mona? “Ti Moise zonza.” Beno me mona? “Ti Nzambi zonza ve, kana ve beto ke kufwa.” Moise kotaka mbala mosi na Dikunzi ya Tiya yina. Beno me mona?

176 Mpe awa tubaka, Yandi tubaka, “Ntangu yayi Mu—Mu ke zonza na bawu dyaka ve mutindu yayi. Mu ke pesa bawu profete.” Beno me mona? Mpe ya kele mutindu Yandi ke salaka yawu ntangu nyonso. Beno me mona? Yandi tubaka, “Ntangu yayi ti bawu kwenda.” Kasi profete yayi fwana vwanda na Ndinga yayi. Kana yandi me bumbama na kinkulu, Nzambi fidisaka yandi ata mbala mosi ve. Kana yandi me bumbama na Ndinga, Nzambi ke siamisa Yawu. Nzambi ke tendulaka Ndinga ya Yandi Mosi. Moise zonzaka Yawu; Nzambi tendulaka Yawu. Amen.

177 Moise tubaka, “Mfumu me tuba yawu!” Mpe Mfumu salaka kaka yina Yandi tubaka. Yina sungikaka Yawu.

178 Ntangu yayi Yandi tubaka, “Ntangu yayi, Moise, nge me bakula. Bantu me bakula ntangu yayi. Nge me mona, mu me lakisa nge, mu me siamisa nge.” Nzambi bumbamaka Yandi mosi na kati ya profete yayi, samu na kuzonza Ndinga ya Yandi na bantu. Moise vwandaka Nzambi ya moyo samu na bawu, Ndinga ya Nzambi ya moyo yina me talana. Ya kele samu na yina kizizi ya yandi vwandaka ya kubumbama. Beno me mona?

179 Mpe beno zaba kima ya mutindu mosi na Muklisto ya kieleka me bumbama bubu yayi, na bantu ya kukondwa lukwikilu? Ba ke mona bakento yina na bansuki ya yinda mpe nyonso yina, ba ke tuba ti ya ke. . . “Beno tala modele yina ya ntama.” Bakento ke balula nsuki ya bawu na manima, bawu ke tuba, “Beno kele na pine, pine ya secours na zulu ya yintu.” Beno me mona, Yawu kele nyonso ya kubumbama. Bawu kele ya kufwa meso. “Oh,” bawu ke tuba, “Mu kele na Doctorat ya Philosophie, na Doctorat ya Droit. . .” Mu ke kipe ve yina beno kele na yawu, beno kele dyaka muntu yina zaba ve Ndinga. Kieleka ya kele ya kulunga. “Oh, yina, ya kele kaka kima ya fyoti. Mu. . .” Beno baka baleso ya fyoti ntete.

180 Wapi mutindu samu na bantu yina ke tubaka ti bawu me bumbama na kati ya Mvwandulu ya Nzambi, mpe ke longa mwa kinkulu ya mabuundu? Oh, kyadi, mawa! Na yina ba ke bwela mpe ke katula, mpe nyonso yankaka, na kukotisaka

malongi ya bawu mosi mpe mabanza ya bawu mosi, mpe Ndinga ya Nzambi ve, beno me mona, wapi mutindu ya vwale? Yina kele kuvwanda na vwale ya dibuundu. Nzambi ya muvimba me pasula vwale yina!

<sup>181</sup> Bawu ke tuba, “Ya kele ve na kima mutindu baprofete. Ya kele na kima ya mutindu yina ve, na bilumbu yayi ya nsuka, mutindu bantumwa mpe baprofete. Ya kele na kima ya mutindu yina ve mutindu kubeluka ya Kinzambi. Ya kele na kima ya mutindu yina ve mutindu mimoni, dyaka. Ya kele na kima ya mutindu yina ve mutindu Marc 16 yina me lungama. Nsungi ya bantumwa me luta.” Bawu me bumba Yawu na bantu. Kasi Nzambi me kwiza ya muvimba kuna na Mpeve-Santu ya Yandi ya Tiya, mpe me pasula kima yina kubanda zulu tii na yi- . . . [Kisika ya mpamba na bande—Mu.] Nzambi me pasula vwale.

<sup>182</sup> Moise vwandaka vwale, Ndinga ya moyo ya Nzambi ya kubumbama na manima ya nzutu ya muntu. Dikunzi ya Tiya vwandaka na kati ya Moise, ya kieleka, samu na kuzonza yina zolaka bumbama na ntwala na manima ya bampusu, beno me mona.

<sup>183</sup> Ntangu yayi, yina, Ndinga, Ndinga pesamaka, na manima Yawu sonamaka, na manima Yawu tulamaka na manima mpe dyaka ya kubumbama, samu Nzambi vwandaka ntangu nyonso na kati ya Ndinga yina. Amen! Yandi kele Ndinga, ntangu nyonso. Yandi vwandaka na kati ya Ndinga yina. Ya kele samu na yina Ndinga yina zolaka vwanda ya kubumbama.

<sup>184</sup> Oh, mpangi-bakala, mpangi-kento, beno ke na kubakula Yawu? Beno tala! Beno ke mona ve? Yawu me vwanda ya kubumbama na nzila ya bansungi yayi, landila yina Nzambi tubaka, mpe Yawu ke zibuka na bilumbu ya nsuka, Bidimbu Sambwadi yina ke bukana, mpe Kima ya muvimba ke talana na meso ya bantu, yina salamaka nzila nyonso. Ngunga ya Nsangu ya wanzio ya sambwadi, mansweki nyonso ya Nzambi fwana zabana na Elie yina, na ngunga ya nsuka yayi; mutindu ti Klisto me tulama na ngaanda ya dibuundu ya Yandi, Mwana ya Nzambi; mutindu Yandi ke monisama mutindu Mwana ya muntu dyaka; mutindu ti Dibuundu fwana tulama na nzila, mpe nyonso samu na kilumbu ya nsuka, kukondwa credo, kukondwa denomination, kaka kieleka Ndinga ke zinga na kati ya muntu. “Mu ke baka mosi, mpe ke bika mosi. Mu ke baka *yayi*, mpe ke bika *yina*.” Beno me mona? Ya kele kaka. . . Ya kele na ata basinga ve, ata ba-denomination ve, ata bundongo ve to kima mosi; ya kele ntima na Nzambi, mpe na Yandi kaka. Beno me mona?

<sup>185</sup> Beno tala, ya kubumbama na kati ya nzutu ya muntu. Moise na Ndinga yina, samu na kuzonza yina zolaka vwanda na ntwala na manima ya mpusu ya kibulu. Samu ti. . . Mutindu mosi Klisto kele Moise ya beto. Klisto kele Moise ya beto.

Yandi vwandaka Nzambi ya kubumbama na kati ya nsuni ya muntu, ya kubumbama na kati ya nzutu, na kati ya nsuni. Ya kieleka. Mpe Yandi kele mutindu mosi mazono, bubu yayi, mpe ntangu nyonso. Yandi vwandaka ya kubumbama na bampusu ya bibulu. Yandi vwandaka ya kubumbama. Mpe ntangu yayi Yandi vwandaka ya kubumbama na kati ya Muntu. Beno me mona? Ntangu yayi beno tala, “mutindu mosi mazono, bubu yayi, mpe ntangu nyonso,” silaka Ndinga ya Yandi na nsungi *yayi*. Yandi kele dyaka Klisto, Ndinga ya nsilulu na nsungi yayi, ya kubumbama na nzutu ya muntu. Ndinga kele Nzambi.

<sup>186</sup> Kupakula kele muntu. Mpova *Klisto* zola kutuba “muntu ya kupakula,” beno me mona, “muntu ya kupakula.” Na yina, Moise vwandaka Klisto na bilumbu ya yandi, yandi vwandaka muntu ya kupakula. Jérémie vwandaka Klisto na bilumbu ya yandi, na kitini ya Ndinga samu na kilumbu yina.

<sup>187</sup> Kasi ntangu Yesu kwizaka, Yandi kwizaka mutindu Muntu Mukudi ya Kupakula; mpe yina vwandaka Moise mpe yina nyonso vwandaka na kati ya Moise, mpe Ndinga nyonso, mpe Bunzambi nyonso vwandaka na kati ya nzutu ya Yandi. Ya kele samu na yina vwale ya muvimba ya tempelo pasukaka, mpe kiti ya kyadi monanaka ya kulunga na ntwala ya bantu, Yandi vwandaka Muntu ya kupakula.

<sup>188</sup> Beno tala ntangu yayi, vwale na nzutu ya muntu, Ndinga ya nsilulu na nsungi yayi fwana vwanda ya kubumbama mpe. Beno tala. Bamambele ya dibuundu yina ke zolaka disumu mpe misumuki lenda ve kumona Yawu samu na vwale ya kimuntu.

<sup>189</sup> Ya kele samu na yina bawu lendaka ve kumona Yandi. “Tala, Yandi kele muntu. Wapi kisika Yandi me katuka? Wapi kalati ya kubundana kele na Yandi? Ya wapi dibuundu Yandi kele?” Mu zola zonza na zulu ya yawu na nkokila yayi, “Ya wapi dibuundu Yandi kele?” Beno me mona? Mpe na yawu, beno me mona, ntangu yayi, “Ya wapi dibuundu Yandi kele, ya wapi—ya wapi kimvuka? Wapi lukolo Yandi me katuka? Wapi kisika Yandi me kuzwa ndongosolo ya Yandi? Tala, Muntu yayi me butuka, na kulandaka kinkulu, to landila disolo na zulu ya Yandi na ziunga awa, Muntu yayi me butuka na ngaanda ya makwela ya santu. Tala, Yandi, ya kieleka, Yandi kele dyabulu. Beno me mona, Yandi kele—Yandi kele ya dyabulu. Yandi me butuka na ngaanda ya makwela ya busantu, mpe Joseph vwanda me kwela kaka yandi samu na kumanga ba losa yandi matadi, samu yandi vwandaka kento ya ke sala pité. Mpe Muntu yango ke kwiza awa mpe ke tuba na beto banganga-nzambi yinki ya kusala?”

<sup>190</sup> Mpe ya vwandaka Nzambi ya kutelama kuna, ke monisa Ndinga yina, na kubokaka, “Nzambi ya Munu, samu na yinki Nge me bika Munu?” Mikunga yina kaka bawu vwandaka yimba na tempelo, yina David salaka samu na bawu bamvula me luta, vwandaka tubila na Klisto. “Mikwa ya Munu nyonso ke tala

Munu. Bawu me tobola maboko ya Munu mpe makulu ya Munu.” Mpe kuna bawu vwandaka kuna, ke yimba yawu, mpe Muntu yango vwanda kufwa na kulunsi. Mpe na ntangu bawu manisaka kuna mpe . . .

<sup>191</sup> Ntangu Yandi kufwaka, Nzambi ya Mazulu kulumukaka, mutindu Yandi salaka na Mongo ya Sinai, na Tiya ya Santu, mpe nyengisaka vwale ya tempelo yina kubanda zulu tii na yisi, pasulaka yawu na bitini. Mpe yinki bawu zolaka sala? Kutala kaka kuna na nela ya tempelo, na Calvaire, mpe kuna Nzambi vwandaka pwelele na ntuala ya bantu nyonso, Munkayulu.

<sup>192</sup> Kasi bawu ke mona ntete Yawu ve, bubu yayi. Nzambi na kilumbu yayi ya nsuka me pasula binkulu yina, mpe me nata Ndinga ya nsungi yayi mbala mosi pwelele na ntuala ya bantu nyonso, mpe dyaka bawu zaba Yawu ve. Bawu zaba kaka Yawu ve. Ya kele—ya kele pete mingi. Beno me mona, ya kele kaka pete mingi. Ya kele ntama mingi na bima ya yinza.

<sup>193</sup> Mu longaka kilumbu yankaka yina na lukutakanu mosi, na zulu ya, “Kuvwanda kilawu.” Mosi ya bilumbu yayi mu zola kuzonzila na zulu ya yawu, “Kuvwanda kilawu.” Beto nyonso kele bilawu ya muntu mosi, na yawu—na yawu mu ke vwanda mosi samu na Klisto. Paul tubaka ti yandi “vwandaka ya kutanga kilawu.” Ya kieleka, beno fwana vwanda. Beno me mona, yawu ke lomba ecrou na kusimbisa bima nyonso kintwadi. Beno me mona? Ya kieleka.

<sup>194</sup> Na yawu beno tala vwale, nsuni ya muntu. Ve, ntangu yayi, bantu ya luzolo ya disumu lendaka ve kumona yawu. Bantu ya nsambulu ya binkulu yina, bawu lendaka ve kumona yawu, samu Yandi vwandaka muntu. Samu na yinki? Nzutu ya muntu yina vwandaka bumba Nzambi.

<sup>195</sup> Ntangu yayi, kana Yandi vwandaka Dikunzi ya nene ya Tiya yina kulumukaka, beno me mona, Dikunzi ya nene ya Tiya kulumukaka mpe lakisaka bawu ti yina Yandi vwandaka, ti Yandi vwandaka Dikunzi ya nene yayi ya Tiya, ba zolaka kwikila yawu; kana Yehowa zolaka kwendaka na ziunga.

Kasi beno ke mona yina Yandi salaka, samu Yandi luta bantu nyonso ya mayele, bantu ya ndwenga, Yandi monanaka kaka Yandi mosi mutindu Yandi silaka na Moise, beno me mona, “Mu ke tuba na bawu na nzila ya Profete.” Mpe Yandi vwandaka Mwana ya muntu, Profete. Mpe bayankaka ya bawu bakulaka Yawu, pene ya mosi na zulu ya nkama mosi na yinza, bawu kwikilaka Yawu; bayankaka ya bawu ve. Kasi, Yandi vwandaka, kaka mutindu mosi.

<sup>196</sup> Kasi Nzambi ya Ngolo nyonso vwandaka ya kutelama kuna na ntuala ya meso nyonso, Kiti ya Kyadi! Yandi kufwaka ntangu bana ya Yandi Mosi vwandaka tuba . . . bana ya Yandi Mosi kuna, vwandaka tuba, “Beto ke na nsatu ya Yandi ve! Ti Yandi kwenda!” Bawu losaka Yandi mate.

197 Mutindu kifwanukusu, ntama mingi, ntangu David vwandaka bika tempelo, ntinu ba me manga. Yandi vwandaka kulumuka bala-bala, mpe mwa, muntu mosi ya ntama na kikata yina vwanda kwendaka na kubendaka dikulu, zolaka yandi ata fyoti ve, yandi bokilaka yandi “kiboba ya luvunu” to kima mosi, losilaka yandi kaka mate na kizizi. Mpe mukengi yina bendaka mbele, yandi tubaka, “Mu ke bika ti yintu ya yimbwa yina kuvwanda na zulu ya yandi; na kulosilaka mate na zulu ya ntinu ya munu?”

198 David tubaka, “Bika yandi, Nzambi me tuba na yandi yawu.” David na kutala yandi zabaka ve yina yandi vwandaka tuba. Yandi kwendaka na zulu ya mongo, talaka na manima, mpe dilaka.

199 Bamvula bankama nana na manima kuna, Mwana ya David vwandaka mata mongo mosi, Yandi talaka, dilaka na zulu ya Jérusalem, Ntinu ba me manga. Mpe bawu losaka Yandi mate na kizizi.

200 Beno ke mona ve? Ya kele kima mosi. Beno ke mona Ndinga yango kulandila, kulandila na kusala bubu yayi? Ntangu nyonso ya kumanga na lutangu ya bantu mingi, beno me mona, mpe ya kukwikila na lutangu ya bantu fyoti.

201 Ntangu yayi, beno me mona, bawu lendaka ve kukwikila Yawu. Ba-Grec yina, bawu lendaka ve kumona Yandi, Yandi vwandaka na kati ya tempelo ya Yandi ya kimuntu. “Tala,” bawu tubaka, “nkumbu ya muntu yayi kele Yesu; Yandi me katuka na Nazareth.”

202 Ntangu yayi, bawu vwandaka kaka na nkumbu mosi kuna na bilumbu yina. Mutindu, “Jean, Jim,” bawu vwanda tubaka, “Jean ya Jeffersonville, Jim ya New Albany,” to kima ya mutindu yina, beno me mona.

203 Yandi tubaka, “Yayi kele Yesu ya Nazareth. Ya kele ya kuzabana ti mama ya Yandi kuzwaka kivumu ya soda.” Beno me mona? Mpe kuna ya kele ya kieleka yina bawu vwandaka kwikila. Kieleka! Mpe beto tuba bawu vwanda tuba, ntangu yayi, “Mpe yayi kele Yesu ya Nazareth.” Beno me mona? “Nani Yandi kele?” Beno me mona, bawu vwanda lenda ve kubakula Yawu.

204 Kasi, beno tala, Ndinga yayi samu na kilumbu yina, ntangu Yandi vwandaka longa, Yandi tubaka, “Beno tala Masonuku. Na kati ya Yawu beno ke banza ti beno kele na Luzingu ya Seko, mpe ya kele Yawu ke pesa kimbangi ya Nani Mu kele. Kana beno lenda ve kukwikila Munu; beno zimbana Munu, mutindu vwale, beno kwikila na Ndinga yina ke na kubasika. Bantu zole kele kimbangi,” Yandi tubaka, “Mu ke zonga mpe Tata ke zonzila samu na Munu.” Amen. Ya kele kieleka.

205 Mu ke zonzila na Ndinga ya bubu yayi, mpe Tata ke siamisa Yawu. Ntangu yayi yina kele mbangi samu na beno? Ya kele, beno me mona. Ya kele mutindu ya fwana salama.

206 Beno tala na ya Zole ya Corinthiens ntangu yayi, . . . na ya Zole ya Corinthiens, kapu 3, na nzila ya 6, tempelo ya ntama salaka Nzambi zinga na manima ya bampusu ya ntama, na ntwala ya ba-Juif. Ntangu vwale ya ntama pasukaka, dyaka kuna ba-Juif . . . ya kufwa meso na Nani Yandi vwandaka, mpe Yina Yandi kele dyaka. Mpe kuna Pentecote monisaka Nani Nzambi ya kieleka mpe ya moyo vwandaka, na ntangu ba zengaka vwale yina na bitini zole, na Nzambi, kubanda na zulu. Samu na yinki yawu salamaka na vwale yina? Samu na yinki yawu salamaka?

207 Samu na yinki me kwiza Nsangu ya mutindu bubu yayi, samu na kusala yina Yawu me sala? Samu na yinki Yawu me kwiza? Samu na yinki?

208 Ya vwandaka na muntu zolaka bokila munu, kilumbu mosi awa ntama mingi ve, yina zolaka tula ntembe na munu na yina me tadila nsungi ya dibuundu, ti, “Nzambi vwandaka na kati ya dibuundu ya Yandi ya santu,” mpe bima ya mutindu yina. Mpe mu bakulaka ti ya vwandaka longi mosi ya kento, na yina mu zimbanaka kaka yawu. Beno me mona, kana ya vwandaka mwa bakala, yina zolaka vwanda mbote, ya zolaka vwanda mutindu yankaka. Kasi, na yawu, kasi wapi mbote ya ke sala na kukwenda ntama, na yinsi yankaka kuna, na ntangu mu fwana bika lukutakanu awa samu na kusala yawu, beno me mona? Na yawu mu ke bika kaka bawu. Mpofu ke twadisa mpofu, bawu—bawu nyonso ke kubwa na dibulu.

209 Na yawu, na yawu, ntangu yayi na nsungi yayi, na ntangu vwale ya ba-denomination mpe ya binkulu ya ntama me pasuka, na Ndinga ya Nzambi, na yawu Yawu lenda talana! Beno me mona yina mu zola tuba? Binkulu ke tuba, “Bima yina nyonso me lutaka.” Beto kotisa Yawu mwa fyoti. “Bima me lutaka.” Kasi, na kilumbu yayi ya nsuka, vwale yina ya kinkulu me pasuka na kati-kati, mpe awa kele na Dikunzi ya Tiya. Beno me mona? Awa Yandi yayi, ke na kotalisa Ndinga ya kilumbu yayi. Vwale me pasuka.

Ntangu yayi, yinza, dyaka bawu ke kwikila Yawu ve. Ata nyonso yina, bawu ke mona Yawu ve. Bawu ke mona Yawu ve. Yawu kufidisamaka ve samu na bawu.

210 Beno bambuka moyo, Mwana ya Nzambi monisamaka ve na Sodome; ya vwandaka minati-nsangu zole. Ya kele kieleka.

211 Kasi, yayi, Nzambi Yandi mosi na nzutu ya muntu monanaka na Abraham, Musoolami. Mpe beno tala yina Yandi salaka samu na kumonana Yandi mosi. Mpe ntangu yayi Abraham zabaka, ntangu Yandi zabaka yina vwandaka na dibanza ya Sarah



na manima ya Yandi, yandi tubaka, bokilaka Yandi, “Elohim! Kisadi ya Nge. . .”

212 Beno tala ntangu yayi, samu yawu talana. Ndinga vwandaka na vwale na zulu ya Yawu bamvula nyonso yayi, na ntwala ya bantu, “Ya lenda salama ve.”

213 Beno ke bambuka moyo na dilongi yina mu longaka na suka yina ntangu mu vwandaka katuka awa mbala ya ntete, na zulu ya Goliath na David? Mu tubaka, “Beno tala muntu ke sombolaka kuna, kutuba ti ‘bilumbu ya bimangu me luta.’”

Beno tala babande yayi mutindu yawu me kulumuka, beno tala mbote mosi na mosi, mutindu Yawu me kuma pwelele mpe pwelele mingi; kana beno kele na makutu ya kuwa, beno me mona, meso ya kumona.

Yinki? Mu tubaka, “Ya kele na yinza ya nene ya dibuundu yina na nganda kuna, ke tuba na nsungi yayi ya science, ti ya lenda salama ve.” Kasi mu tubaka, “Nzambi. . .” Na Nsemo yina, ntete kaka ba baka Yawu na foto, kasi mbala mosi; ba bakaka ntete ve yawu kuna foto. Ya vwandaka kuna na nzadi; ata mbala mosi ve ti bawu bakaka Yawu foto. Beno me mona? Mu tubaka, “Yandi tubaka na munu ti ya ke salama; Yandi ke sala mbokolo mpe ya ke mwangana na bayinsi.”

214 Mpe ata mpe Docteur Davis, tubaka, “Nge, mulongoki ya mvula ya sambwadi, na nivo ya lukolo ya fyoti, ke sambila samu na bantinu mpe ba-monarque, mpe ke banda reveil yina ke mwangana na bayinsi?”

Mu tubaka, “Yawu yina Yandi tubaka.”

215 Mpe yawu salamaka. Beno me mona? Beno me mona, yawu salamaka. Yawu yina, ya kele, Yandi kele ve na nsatu ya lutendulu. Yandi me sala yawu. Beno me mona, Yandi salaka yawu yimeni, ya ke tendula yawu mosi, beno me mona, ke bokila Misoolami ya Yandi, beno me mona, na—na bisika nyonso. Ntangu yayi ya me talana.

216 Mu tubaka ti David vwandaka kuna, mwa, muntu mosi ya fyoti, na mukongo ya yandi ya kufutama, na lanse na diboko ya yandi. Mpe, tala, Saul talaka yandi, mfumu ya kimvuka ya milongi, yandi tubaka, “Kasi, nge, nge me longukaka mpe ve!” Yandi tubaka, “Bika mu tala kana mu lenda pesa nge Doctorat ya Philosophie to kima.” Lwatisaka yandi kinwaninu, yawu. . . Yandi talaka ti yawu me lunga ve na muntu ya Nzambi.

217 Yandi tubaka, “Katula munu kima yayi.” Yandi tubaka, “Mu zaba kima mosi ve na yawu.” Yandi tubaka, “Bika mu kwenda mutindu yina mu zaba, na yina mu nwanisaka nkosi, na yina mu nwanisaka ulusu.” Yandi vwandaka na kutala muntu ya mfinda. Yandi tubaka, “Bika mu kwenda mutindu yayi.”

218 Mpe Goliath yayi ya ntama tubaka, “Beno me tinda yimbwa na kunwanisa munu?” Yandi tubaka, “Mu ke tobula nge na

nsongi ya dyonga ya munu ya kisengo mpe mu ke lelika mvumbi ya nge na zulu kuna mpe kubika bandeke kudya yawu.”

<sup>219</sup> David tubaka, “Nge ke kutana na munu mutindu Philistin, na kinwaninu mpe dyonga, mpe mu ke kutana na nge na Nkumbu ya Mfumu Nzambi ya Israel.” Beno tala mbote profete, David, kutuba, “Bubu yayi mu ke zenga yintu ya nge na zulu ya mapeka ya nge.” Amen! Oh, la la! Yandi zabaka yina yandi vwandaka, na Nani yandi kwikilaka, mpe vwandaka ya muvimba ya kundima ti Yandi vwandaka na lenda ya kubumba yina Yandi pesaka yandi. Beno me mona? Na yawu ya salamaka na mutindu nyonso.

<sup>220</sup> Kingana ya ntama, “Bilumbu ya bimangu me luta,” ba me bwisisa bibaka! Yehowa kele dyaka kuna na ntwala ya bantu nyonso, ke talisa Ndinga ya Yandi, Muntu ya kumonana. Ya kele kieleka. Beno tala.

<sup>221</sup> Dibuundu ya Bantu ya makanda me vwanda mpe ya kufwa meso na vwale, na manima ba me pasula yawu mpe me lakisa Nzambi, vwale ya mabuundu. Wapi mutindu? Na kubumbaka dyaka Ndinga na kati ya muntu ya moyo. Ya kele ya kieleka yina Israel kondwaka na kumona. Kana ya vwandaka Wanzio mosi to kima mosi, Israel zolaka kwikila Yawu. Kasi yawu na kuvwandaka zolaka vwanda ve Wanzio, ya zolaka vwanda muntu. Amen!

Nzambi lenda ve kubuka Ndinga ya Yandi. Na bilumbu ya nsuka ya fwana vwanda dyaka kima ya mutindu mosi. Beno me mona? Yinki kufwaka Israël meso? Muntu yina. “Nge kele Muntu ke na kusalaka Nge mosi Nzambi.” Ya kele samu na yina bawu kufwaka Yandi, mpe, bubu yayi, samu ti Nsangu me kwiza na nzila ya muntu mpe ve na nzila ya Bawanzio. Beno me mona? Nzambi lenda soba ve mutindu ya Yandi, kusoba Ndinga ya Yandi. Yandi tubaka ti Yandi ke soba ve. Beno me mona? Beno tala, ya kusila! Mpe Bantu ya makanda kele kaka ya kufwa meso bubu yayi mutindu Israël vwandaka, samu ti (yinki?) vwale. Nzambi ya kubumbama na kati ya muntu ya moyo, kufwaka meso ya Israel.

Beno tala, mutindu ntangu nyonso, mosi ke vwandaka ya kufwa meso. Mosi, Yawu ke kufwa meso; yankaka, Yawu ke monisa Kieleka. Ya ke kanga meso ya bayankaka, mpe ke fungula meso ya bayankaka.

<sup>222</sup> Beno tala, Yesu telamaka mpe tubaka, “Mbote, nkumbu ya nge kele—kele—kele Simon, mpe nkumbu ya tata ya nge vwandaka Jonas.”

Yandi tubaka, “Mfumu Nzambi!” Beno me mona? Philippe. . .

Yandi tubaka, “Wapi kisika Nge zabaka munu?”

Yandi tubaka, “Beno tala Israélite, na kati ya yina luvunu kele ve!”

Mpe yandi tubaka, “Rabbi, wapi kisika Nge zabaka munu?”

223 Yandi tubaka, “Ntete Philippe kubokila nge, ntangu nge vwandaka na yisi ya yinti, Mu monaka nge.”

224 Yandi tubaka, “Rabbi, Nge kele Mwana ya Nzambi. Nge kele Ntinu ya Israel.”

225 Mbote, bayankaka telamaka kuna, tubaka, “Yandi kele Béelzébul.” Beno me mona? Yinki Yawu salaka? Fungulaka meso ya muntu mosi, kufwaka meso ya muntu yankaka. Yinki banganga-Nzambi tubaka? “Beno tala, Muntu yina kele Belzebul!”

226 Mwa kento yayi tubaka, “Mu zaba ti Mesiya ke kwiza, yina ba ke bokila Muntu ya Kupakulama. Beno me mona, Muntu ya Kupakulama ke kwiza. Beto kuzwaka ve bapofete. . . Nge fwana vwanda profete. Kasi Muntu ya Kupakulama ke kwiza. Beto ke vingila Yandi. Yayi kele bilumbu ya nsuka samu na Bantu ya makanda. . . to samu na ba-Juif.” Yandi tubaka, “Yayi kele kilumbu ya nsuka.” Beno me mona, bawu zole Samaritain mpe Juif vwandaka vingila Mesiya. Beno me mona? Yandi tubaka, “Yayi kele ntangu samu na Yandi na kumonika. Beto zaba, ntangu Yandi ke kwiza, Yandi ke sala bima yayi. Yandi ke tuba na beto bima yayi.”

Yesu tubaka, “Mu kele Yandi.”

Meso ya yandi fungukaka, banganga-Nzambi vwandaka ya kufwa meso.

227 Yawu yina Nsangu ya mbote ke salaka ntangu nyonso. Yawu ke zibula meso ya bantu yankaka, ke monisa Kieleka na bayankaka, na yina Yawu ke kufwa meso ya bantu yankaka; ya kele na mutindu zole. Bayankaka lenda baka Mwana yina mpe kutala mbala mosi na Yawu, mpe kufwa meso; bayankaka lenda baka Yawu mpe kutambula na Yawu, yawu yina luswaswanu.

228 Mutindu yawu salamaka na konso nsungi, Bunzambi ya kubumbama na kati ya nzutu ya muntu. Beno tala, Yandi salaka. Bapofete vwandaka Bunzambi, ya kubumbama. Bawu vwandaka Ndinga ya Nzambi (ya kele kieleka?) ya kubumbama na kati ya nzutu ya kimuntu. Na yawu, bawu bakulaka ve Moise ya beto to dyaka, beno me mona, Yesu.

229 Beno tala ya kubumbama na manima ya bampusu ya bibulu na kati ya tempelo ya ntama, vwandaka Ndinga, vwandaka Ndinga ya kutalana na zulu ya bamesa ya matadi.

230 Ntangu yayi, mu ke meka na kusukisa na kutala na baminuti makumi zole ntangu yayi, kana mu lenda, kumanisa na ngunga ya kumi na mosi na ndambu. Beno tala, kana beno tala, mu me balula mwa bapaze awa, beno me mona, samu na kulandila na. . . samu mu landila na kuzenga. . . kukumisa yawu yinda mingi. Mu zaba ti beno kele na tiya, me lemba.

<sup>231</sup> Na manima ya tempelo ya ntama, na kati ya vwale, yinki vwandaka na manima kuna? Yinki vwandaka Yehowa? Yinki vwandaka ya kubumbama na manima kuna? Yinki vwale vwandaka bumba? Oh, alleluya! Yinki vwale vwandaka bumba? Yawu vwandaka bumba Ndinga. Vwale, bampusu ya ntama ya bibulu, vwandaka bumbisa, vwandaka bumbisa Ndinga na meso ya bawu, ya kimuntu. Na manima kuna, mpe, vwandaka na dimpa ya munkayulu. Na manima kuna, mpe, vwandaka na Nkembo ya Shekinah. Kasi Yawu nyonso vwandaka ya kubumbama na ntwala ya bawu. Yawu nyonso vwandaka ya kubumbama. Nkembo nyonso ya Nzambi vwandaka kaka na manima ya mpusu yina ya ntama ya bibulu, ya kele kieleka, nyonso ya kubumbama na ntwala ya meso ya kimuntu.

<sup>232</sup> Ya kele mpe, bubu yayi. Ba ke bokila yawu “nkonga ya ba-exalté, ya bafanatiki,” kasi bawu zaba ve yina kele ya kubumbama na manima kuna. Ya kele yina bawu zaba ve. Beno me mona?

<sup>233</sup> Na yina ntangu Nzambi, na kyadi, pasulaka vwale samu bawu kumona, bawu vwandaka mingi ya kufuka na binkulu ya bawu bawu . . . ya vwandaka dyaka ya bumbama na bawu, mpe dyaka bubu yayi.

<sup>234</sup> Mutindu mosi bubu yayi! Nkembo, Ngolo ya Mpeve-Santu, Nkembo ya Shekinah yina ke kwizaka na zulu ya mukwikidi, ntangu yayi mu zola tuba mukwikidi ya kieleka, yina ke salaka bisalu ya Nzambi mpe ke kotisa lukwikilu na kati ya yandi, samu na kukwikila Ndinga ya Nzambi, yina nyonso ke bumbama na meso ya bawu. Bawu ke tuba, “Bima yina me lutaka.” Beno me mona, bawu ke zinga dyaka na manima ya vwale.

Beno kele dyaka ve na manima ya vwale yina, Bana ya fyoti, Nzambi me monana na ntwala ya beno.

<sup>235</sup> Kilumbu yankaka yina, Mpangi Fred Sothmann, Mpangi Tom Simpson. . . Mu zaba ve kana yandi me lenda kukwiza awa to ve. Mingi ya beto vwandaka na dibuundu ya ba-Baptiste, mpe mulongi tubaka kima mosi yina wakanaka mbote mingi. Beto nyonso tubaka, “Amen!” Bantu nyonso na kati ya dibuundu me telemisa laka ya bawu mpe me tala na manima. Beno me mona? Beno me mona? Beto talaka mwa kitini mosi ya mampa yina katukaka na manima ya Shekinah kuna, beno zaba, mpe beto vwandaka na kutala ya kuyangalala na kuzwa yawu. Beto tubaka, na mutindu yankaka, “Matondo na Nge, Mfumu!” Beno me mona? Mpe, na ntangu bawu salaka mutindu yina, bantu yayi vwandaka mingi ya kukanga na vwale ti bawu sekaka yawu. Bawu zabaka ve yina me tadila Yawu. Beno me mona? Bawu kele dyaka ya kukanga na vwale. Na yawu, ya kele na bantu yankaka kele na kati mpe bayankaka na ngaanda. Mpe na yawu. . . Kasi Nzambi kele ya muvimba na ntwala ya beto, ya kubumbama. Mutindu mosi bubu yayi!

<sup>236</sup> Na yina ntangu Nzambi, na kyadi ya Yandi, pasulaka vwale, Yandi natamaka na kumonana na ntwala ya bantu nyonso. Kasi, bawu vwandaka ya kufuka mingi na kati ya binkulu ya bawu, Yandi vwandaka dyaka ya kubumbama na bawu.

Mutindu mosi bubu yayi! Nkembo yina nyonso, ya kubumbama, me bumbama samu na beto na Klisto, Ndinga, Yandi yina kele Tempelo ya beto.

<sup>237</sup> Oh, ntangu yayi, mu fwana timuna mwa fyoti na kati ya yayi. Beno lemvokila munu samu na ba-émotion ya munu na suka yayi, kasi, oh, ya me kuma bilumbu mingi ti mu vwandaka—mu vwandaka na nsatu ya kupesa yayi, mu. . . ya ke na kupelaka kaka na kati ya munu. Beno me mona?

<sup>238</sup> Beno tala, Nkembo nyonso yina kele na kati ya Nzambi kele na kati ya Ndinga. Balusakumunu nyonso yina kele na kati ya Nzambi kele na kati ya Ndinga. Ya kele ya kubumbama, na muntu ya kukondwa lukwikilu, na nzila ya binkulu. Beno ke mona yina mu zola tuba? Kasi Yawu kele nyonso na kati ya Klisto. Nyonso yina Nzambi vwandaka, Yandi *kulosamaka* Yandi mosi, “kenos,” mpe kwizaka na kati ya Klisto; mpe beto, na kati ya Klisto, kele na manima ya vwale.

<sup>239</sup> “Mbote, mu kele na kati ya Klisto,” beno ke tuba. Mpe na manima beno ke kwikila ti ya kele na Banzambi tatu? Ke botika na nkumbu ya “Tata, Mwana, mpe Mpeve-Santu”? Ke kwikila na binkulu yayi nyonso mpe nyonso na kati ya yina beno ke kwikila, ya bakuluntu? Ve, beno kele dyaka na manima ya vwale. Beno me mona? Beno kota na vwale. Yandi, Klisto, kele Ndinga.

<sup>240</sup> “Wapi mutindu? Mu ke kwikilaka ve na kubeluka ya Kinzambi. Mu ke kwikilaka ve na bimangu yayi mpe bima ya mutindu yina.”

<sup>241</sup> Mbote, beno me mona, beno—beno kele ve na kati, na kati ya vwale. Beno zaba ve kima na zulu ya Yawu. Beno me mona? Klisto kele Ndinga! Mpe ntangu beto kele na kati ya Ndinga, beto kele na kati ya Klisto. Mpe wapi mutindu mu lenda vwanda na kati ya Klisto, mpe kumanga Klisto? Ya vwandaka Yandi yina tubaka, “Ata mpova mosi ve fwana kubwelama na Yawu to kukatula na Yawu.” Na yina, wapi mutindu beno lenda katula na Yawu mpe kubwela na Yawu? Beno me mona, ya ke lakisa beno wapi vwale me kanga beno. Beno me mona?

<sup>242</sup> Beto kele na kati ya Yandi! Na yina beto, na kuvwandaka na kati ya Yandi, beto kele dyaka ya kubumbama na misambidi mpe na milongisi ya yinza. Beno me mona, Nkembo ya beto yina beto kele na yawu mpe ke yangalala, beto kele dyaka ya kubumbama samu na bantu yina na ngaanda. Ba ke banza ti beto kele “ya kulawuka, kilawu,” dyaka. Beno me mona? Beno me mona? Ya kele kieleka. Kasi beto bayina kele na kati awa, na kati ya Klisto, me botama na kati ya Yandi, (ya Ntete ya Corinthiens kapu 12), na kati ya Yandi, beto me kota na Nkembo yayi. Beno me mona?

Kasi na ngaanda ve; beno ke tala dyaka na kati, na kumangaka Yawu. Beno me mona?

<sup>243</sup> Na yawu ntangu yayi ba me bokila beto na kati na Yandi, samu na kukota na nyonso Yandi kele. Ba me bokila beto na kati na Yandi, yina kele ya kubumbama na bantu ya ntembe, na nzila ya vwale ya nzutu ya muntu. Beno me mona? Ba zaba Nkembo yina, ba ke tangaka na zulu ya Yawu, Yawu kele na kati ya Ndinga awa, “Nkembo ya Nzambi” mpe bima ya mutindu yina, ya kele kaka ndinga samu na bawu. Na beto, ya kele kumonisama! Beno me mona? Yawu kele kaka ndinga dyaka ve; ya kele kieleka! Amen!

<sup>244</sup> Nzambi tubaka, “Ti nsemo vwanda,” yina vwandaka ndinga. Kasi ntangu yayi nsemo yawu yayi. Ya kele ve ndinga; ya kele nsemo. Beno me mona yina mu zola tuba?

<sup>245</sup> Ntangu yayi ya kele ve kaka Ndinga me sonama samu na beto, ya kele kieleka. Beto kele na kati ya Yandi. Ntangu yayi beto ke na kusepela. Ntangu yayi beto ke na kutala Yandi. Ntangu yayi beto ke na kumona Yandi, Ndinga, kumonana Yandi mosi. Yawu kele ya kubumbama, na ngaanda kuna, (samu na yinki?) samu Yawu me bumbama na kati ya nzutu ya muntu. Beno me mona?

<sup>246</sup> Oh, bawu ke tuba, “Nkongga ya bantu yina, wapi lukolo ba me katuka? Wapi—wapi ndongosolo bawu me kuzwa? Wapi kisika, wapi—wapi kisika bawu me katuka? Ya wapi—ya wapi—ya wapi kimvuka bawu kele?” Beno me mona? Huh! Beno me mona, bawu ke bakula Yawu ve.

<sup>247</sup> Muntu mosi tubaka na muntu yankaka, kilumbu yankaka yina, yandi tubaka, “Nge fwana vwanda ya denomination mosi samu na kuvwanda Muklisto.”

<sup>248</sup> Yandi tubaka, “Mu kele Muklisto; mu kele na kati ya ata mosi ya bawu.” Uh-huh. Yandi tubaka, “Nzambi basisaka cancer yayi na munu,” yandi tubaka, “ntangu yayi yinki nge ke banza samu na yawu?” Ya vwandaka dokotolo. Yandi tubaka, “Lakisa munu ba-denomination ke na kusalaka yawu.” Beno me mona? Mbote mingi. Beno me mona? Ya kele dyaka ya bumbama kaka.

<sup>249</sup> Beto kele na kati ya Klisto. Ntangu yayi, na yina, bakwikidi nyonso ya kieleka ke mona Yandi, Ndinga ya nsilulu ya bubu yayi, ya kotalana pwelele. Yina kele ndinga ya nene kana beno lenda kuzwa yawu. Beno me mona? Beno me mona? Bakwikidi nyonso ya kieleka, yina kele na kati ya Ndinga, ke monaka Nzambi pwelele. Vwale me pasuka, mpe Nzambi me telema pwelele na ntwala ya beno, ya kotalana. Beno me mona? Nzambi, ya kotalana, pwelele.

<sup>250</sup> Samu na kusala yayi, vwale ya beto ya denomination ya ntama ya kinkulu ba fwana pasula dyaka yawu. Samu na kumona kieleka yina Yawu kele, beno fwana basika na kima ya mutindu yina. Beno me mona? Ata mbala mosi ve ti beno ke

sala yawu; bawu ke landila na kubenda vwale yina na ntuala ya beno, konso ntangu, “Oh, ya kele ve na kima na Yawu.” Kasi awa Yawu me sonama, mpe awa Yawu me talana, beno me mona. Beno me mona?

<sup>251</sup> Ntangu yayi, yinki ke salama kana muntu mosi manga na kumona mwini, yandi tuba, “Oh, kuna, mu zaba ti Nzambi tubaka, ‘Ti ya vwanda na nsemo,’ kasi ya kele ve na kima ya mutindu yina. Mu ke kulumuka na yisi ya ntoto. Mu—mu ke manga kaka na kumona yawu?” Muntu yayi me lawuka. Ya kele na kima ke tambula ve mbote na yandi.

<sup>252</sup> Ya kele na kima ke tambula ve mbote na bakala to kento yina, lenda mona nsilulu ya Nzambi mpe, kumona Yawu kutalana, mpe na manima ke manga na kukwikila Yawu samu ti denomination ke kulumusa vwale. Beno me mona, ya kubumbama!

<sup>253</sup> Samu na kusala yayi, vwale ya beto ya kinkulu fwana kubwa, na nzila ya Mpeve ya Nzambi ya Tiya mpe Mbele, yina kele Ndinga ya Yandi. Ntangu nyonso Ndinga ya Yandi kele Mbele ya Yandi. Beno me mona? Mpe Yandi bakaka Mbele ya Yandi kilumbu yina, ya kufuluka na Tiya, mpe pasulaka vwale yina kubanda na zulu tii na yisi. Yandi ke sala kima ya mutindu mosi na Mbele mosi bubu yayi! Ve “credo ya munu, buku ya munu ya ba-credo, ya munu—ya munu katekisima.” Kasi Mbele ya Mfumu, beno me mona, ke pasula vwale tii na yisi, mpe beno ke mona Nzambi ya kutelama pwelele na ntuala ya bantu, ya kumonisama na Ndinga ya Yandi. Wapi kima ya nkembo na kutala! Beno me mona? Mbote mingi. Mpeve-Santu ya Nzambi mpe Tiya, Mbele ya Yandi, ke pasula yawu. Ndinga ke pasula vwale ya denomination.

<sup>254</sup> Mbote, kana beno tuba kaka, “Ndinga,” mpe Ndinga salama ve? Wapi mbote Mbele ke vwanda awa, mpe kutuba, “Yawu lenda ve kupasula”? Kutuba, “Uh,” mpe yawu lenda ve kupasula?

<sup>255</sup> Kasi ntangu beno ke tula Mbele yango ya Nzambi na zulu kuna mpe kutala yandi mbote kupasula, yandi kele—yandi kele ya kusimba na diboko ya kutumama na kusala mutindu yina. Beno me mona, ke pasula yawu pwelele, mpe kuna Yandi kele. Kuna ya ke lakisa Nzambi pwelele na ntuala ya bantu, Yehowa ya nene. Yina kele Ndinga ya Yandi yina me talana, kitini yina ba silaka na kilumbu yina. Beno ke bakula Yawu? Beno me mona? Ntangu Mbele, nsilulu ya bubu yayi, na kilumbu yayi, yina ya fwana vwanda, mpe Nzambi ke baka Mbele ya Yandi mpe ke pasula vwale ya denomination mpe kufungula yawu, mpe ke talisa Yandi mosi mpe ke lakisa ti Yandi kele kuna, dyaka Dikunzi ya Tiya yina mosi. Beno tala, yina kele Ndinga yina me talana samu na bansilulu ya bubu yayi.

<sup>256</sup> Beto ke mona Yawu mutindu Pierre ntangu yandi tubaka, “Mfumu, na nani beto ke kwenda, na manima ya kumona Yayi?”

Wapi kisika beto ke kwenda? Wapi dibuundu beto lenda kota, na ntangu beto me butuka na Mosi? Beno me mona? Yinki beno lenda. . . Wapi denomination beno lenda kota na manima ya kuzaba Kieleka yayi, beno me mona, na ntangu bawu (mosi na mosi) ke manga Yawu? Mosi na mosi ya bawu! Mu kele ve na mosi yina ke tuba to ke sala kima samu na Yawu. Kieleka. Ya kele kieleka.

<sup>257</sup> Na ntangu mu bandaka banzyetolo yayi awa, ya vwandaka na mabuundu makumi yiya na zole na kisika mosi yina simbisaka; ntangu mu kumaka kuna, mu vwandaka na ata mosi dyaka ve. Mosi na mosi ya bawu vwandaka tuba, “Yandi ke kwikilaka na lukengolo ya Seko.” Yina ke tula na ngaanda bantu ya misiku. Mosi ke tuba, “Yandi ke botikaka na Nkumbu ya Yesu.” Yina ke tula na ngaanda bawu nyonso yina yankaka, beno me mona. Kuna, mosi ya bawu tubaka, “Yandi ke kwikilaka na nkuna ya nyoka. Nyoka kele na nkuna ve!” Yina ke tula. . .

<sup>258</sup> Biblia ke tuba, “Mu ke tula kuyina na kati-kati ya Nkuna ya yandi na nkuna ya nyoka.” Beno me mona? Beno me mona kuna?

<sup>259</sup> Yawu, vwale, me zanguka na Ndinga. Beno me mona? Ya kele kieleka. Yawu me monisama na bana ya fyoti. Ya me—ya me zanguka. Bawu ke mona Yawu. Mpe ya ke vwanda, mutindu mbala mosi ba tubaka. . . Ya kele kieleka. Na yina ya ke vwanda, mutindu ba tubaka mbala mosi, “Ntangu beno ke mona,” na ntangu vwale yayi me katuka na Ndinga, binkulu me katuka na Ndinga, mutindu Yesu tubaka mbala mosi, “Ntangu beno ke mona Munu, beno ke mona Tata.” Beno me mona? Nzambi na Ndinga ya Yandi kele mosi. Ntangu yayi beno me bakula? Ntangu Ndinga me talana, yinki Yawu kele? Beno me mona?

<sup>260</sup> Yesu tubaka, “Beno tala Masonuku, beno ke banza kuzwa ya. . . Beno me kwikila na Nzambi, beno kwikila mpe na Munu. Kana Mu ke sala bisalu ya Tata ya Munu ve, na yina beno kwikila Munu ve. Kasi kana Mu ke sala bisalu, Munu mpe Tata ya Munu kele Muntu mosi. Na ntangu beno ke mona Munu, beno me mona Tata.”

<sup>261</sup> Mpe na ntangu beno ke mona Ndinga kutalana, beno ke mona Tata Nzambi, samu Ndinga kele Tata. Ndinga kele Nzambi. Mpe Ndinga, me talana, kele Nzambi Yandi mosi na kubakaka Ndinga ya Yandi Mosi mpe ke talisa Yawu na kati ya bakwikidi. Kima mosi ve lenda sala ti Yawu kuzinga kasi bakwikidi, kaka bakwikidi. Ya kele ve. . . Ya ke ve. . .

<sup>262</sup> Beno lenda baka blé mpe kukuna yawu na—na mutindu mosi yankaka ya ntoto, ata mbala mosi ve ti yawu ke basika. Kasi, yina, ya fwana vwanda na engrain mosi na kati ya ntoto samu na kubasisa blé. Mpe kana ya kele ve—kana ya kele ve. . . kana engrain na kati ya ntoto kele ve—kele ve, blé ke mena ve na engrain yina, ya ke basika ve. Na yawu ata kisika yina Ndinga ke kubwa, kana Yawu kubwa ve na mutindu ya kieleka ya ntima. . .



263 Yesu tubaka mutindu yina. “Bayankaka kubwaka na lweka ya nzila, na bisika ya matadi, mpe bandeke ya dizulu kwizaka mpe kudyaka yawu.” Mpe na manima Yandi tubaka, “Bayankaka kubwaka na bansende mpe matiti ya bansende, yina telamaka mpe kangaka yawu kupema,” binkulu, badenomination, bampasi ya luzingu kanga Yawu kupema. Kasi Yandi tubaka, “Bayankaka kwendaka na ntoto ya mbote mpe basisaka nkama yankaka,” Yandi tubaka, “yina kele Kimfumu ya Nzambi.”

Ya kele kima mutindu mosi, beno me mona, bayankaka ke kwikila ata fyoti ve.

264 Bayankaka ke kwikila mwa ntangu fyoti, mutindu bilandi. Ba landaka Yandi, mingi ya bawu, makumi sambwadi landaka Yandi bamvula mingi, samu na kubakula; na kutala mvula mosi na ndambu, to bamvula zole; kaka samu na kubakula, tii bawu lendaka na kubakula kima mosi na Yandi, mwa... mutindu Yandi vwandaka na ngolo mosi ya kusala bima yayi, to mutindu dikulu ya kalumbu, mutindu ya kusala ya mazisiye, yina Yandi lendaka sala samu na kusala bima yayi, mutindu Yandi lendaka zaba yina vwandaka na kati ya ntima ya bantu mpe yina bawu vwandaka banza. Mpe na nsuka bawu bakulaka ti Yandi tubaka ti Yandi “katukaka na Mazulu,” Yandi “vwandaka Ndinga Yandi mosi.” Mpe na ntangu ya kumaka kuna, yina lutilaka bawu mingi. Ba tubaka, “Muntu ve lenda bakula Yayi.” Mpe bawu kwendaka ntama na Yandi. Ya kele bayina kubwaka na kati ya matiti ya bansende.

265 Ya ke vutula na kima mosi, na kati ya konso dibuundu, beno kele na bakwikidi ya kati-kati, bantu ya kukondwa lukwikilu, mpe bakwikidi. Ya ke vwanda na konso dibuundu. Beno ke mona bawu ntangu nyonso. Bayankaka ke sala mutindu bawu kele bakwikidi, yina kele mutindu ya kulutila yimbi. Mpe kuna ya kele na bayina kele kieleka bantu ya kukondwa lukwikilu; yandi ke kwamisa beno ve, yandi ke kwenda kaka ntama mpe ke ningisa yintu ya yandi. Kasi bakwikidi ya kati-kati, bayina ke tuba kele bakwikidi, ya kele mutindu yina, ya kele mutindu yina beno fwana sala keba, ya kele bakwikidi yina ya kati-kati. Mpe na manima ya kele na bakwikidi ya kieleka. Beno me mona bawu tatu kuna?

266 Ya vwandaka na bantu ya kukondwa lukwikilu. Kaka na ntangu Yandi tubaka, “Beno kudya Nsuni ya Mwana ya muntu,” oh, bakala, yina vwandaka yawu!

267 Bayankaka vwandaka bakwikidi ya kati-kati. Bawu vwandaka tii, kaka mutindu Judas salaka, tii kaka na nsuka.

268 Kasi kuna bakwikidi ya kieleka, bawu lendaka ve kubangula Yawu, kasi bawu kwikilaka Yawu, na mutindu nyonso. Bawu landilaka na kutambula.

269 Vwale, ya kinkulu ya bantu ya ntembe, me katuka, beno ke mona Nzambi. Na ntangu ba me katula vwale ya binkulu, beno lenda mona ti Nzambi kele dyaka Nzambi ya Ndinga ya Yandi. Yandi ke zitisaka dyaka Ndinga ya Yandi. Yandi kele—Yandi kele Nzambi, Nsoniki ya Ndinga ya Yandi.

Yandi kele ya kubumbama na manima ya bavwale ya mpusu, na bayankaka. Yinga, ya kele kieleka. Na bayina lenda kwenda ve na manima ya vwale, Yandi kele dyaka na manima ya bavwale ya mpusu.

270 Beno tala. Na yina, beto, na yina beto ke kuma ndambu ya Yandi, mutindu beno kele vwale yina ke bumbaka Yandi. Beno kele ndambu ya Yandi, ntangu nyonso yina Klisto kele na kati ya beno, mutindu Klisto vwandaka ya Nzambi. Samu ti Nzambi vwandaka na kati ya Yandi, salaka Yandi Nzambi. Mpe mutindu Klisto kele na kati ya beno, kivuvu ya Nkembo, beno ke kuma ndambu ya Klisto. “Yandi yina ke kwikila na Munu, yandi mpe ke sala bisalu yina Mu ke sala.” Beno me mona? Beno ke kuma kitini ya Klisto ntangu nyonso yina Klisto ke bumbama na kati ya beno. Na yina ya me bumbama na muntu ya kukondwa lukwikilu, kasi beno zaba ti Yandi kele na kati ya beno. Beno kele tempelo ya Klisto yina kele na manima ya vwale, mpusu. Na yina beto, samu . . . Na manima, samu na vwale yayi, vwale dyaka na nzutu ya muntu, ke bumbisa Nzambi (Ndinga) na muntu ya kukondwa lukwikilu.

271 Mutindu ya kele ya kusonama, beno me mona, “Ya kele ya kusonama, beno kele mikanda ya kusonama,” Biblia ke tuba. Ntangu yayi, yinki kele *mukanda*? Ya kele “ndinga yina me sonama.” Mpe beno kele “ya kusonama.” Na nzonzolo yankaka, beno ke tanga Yawu mutindu yayi, “Beno,” Ya kele ya kutuba, “beno kele mikanda yina me sonama,” to, “beno kele Ndinga, yina me sonamaka, yina me talana,” kima mosi ve ba lenda bwela na Yawu. Beno lenda ve kutuba, “Mu kele mukanda ya kusonama,” mpe kuzinga mutindu yankaka ya kima mosi kasi yina *Yayi* sonamaka yimeni, samu ti kima mosi ve lenda bwelama to kukatula.

272 Mutindu Docteur Lee Vayle ke na kusonikaka buku yayi ya lukumu, mu zola ti beno mona yawu na manima ya mwa ntangu fyoti. Mpangi Vayle kele awa, yandi kele kisika mosi awa. Mu vwanda me mona yandi na ngaanda. Mu banza ve ti yandi me lenda kukota. Kasi yandi ke na kusonikaka buku mosi kuna, mpe—mpe ya kele na mambu ya ngudi, na zulu ya Nsungi ya Laodicée. Mpe mu zola beno . . . Ya ke basika ntama mingi. Na yawu, beto ke na kusalaka ntangulu ya nsuka ya yawu ntangu yayi. Mpe vwandaka sonika, mpe beto vwandaka zonzila na Yawu na kati kuna, beno me mona, na yina me tala . . .

273 Muntu nyonso ke kwizaka na munu, na kutubaka, “Mpangi Branham, banzasi sambwadi yina ndinga nganaka, mpe Yandi

tubaka, ‘Kusonika Yawu ve, nge me mona, kasi kanga Yawu,’” yandi tubaka, “yina ke vwanda bidumu sambwadi yina ke monana na bilumbu ya nsuka, nge me mona, bidumu sambwadi yina ke tuba na beto?” Ntangu yayi, yina ke wakana ve kieleka mbote? Beno me mona? Kasi beno tala mbote yina beno ke na kuzonzila ntangu beno ke tuba mutindu yina.

Yandi tubaka, “Kumeka ve na kusonika Yawu.” Beno me mona? Banzasi sambwadi yayi ke wakisa bandinga ya bawu, beno me mona, mpe Yandi tubaka, “Kusonika yawu ve, beno me mona, kasi Yawu fwana vwanda ya kukanga na Buku tii na bilumbu ya nsuka.”

<sup>274</sup> Ntangu yayi muntu mosi vwanda, bantu mingi vwanda tuba na munu, mpe ba-théologien vwanda tuba, “Mpangi Branham, kana Mfumu Nzambi. . .” Bawu vwanda tuba, “Kana—kana. . . Na kimbangi ya nge, yina Mfumu me pesa nge samu na bantu ya Yandi,” na bulemvu nyonso ke tuba yayi, yandi tubaka, “nge ke vwanda na lenda ya kusonika Biblia ya nge mosi, Ndinga ya nge, kana Nzambi me talisa.”

<sup>275</sup> Mu tubaka “Yina lenda vwanda kieleka.” Beno me mona, yandi vwandaka meka na kusimba munu. Beno me mona? Mu tubaka, “Kasi, nge me mona, mu lenda sala yawu ve.”

Yandi tubaka, “Samu na yinki nge lenda ve? Nge kele na makuki nyonso na nge.”

<sup>276</sup> Mu tubaka, “Kasi, nge me tala, ba lenda bwela ve to kukatula ve mpova mosi.” Beno me mona?

<sup>277</sup> Mpe yandi tubaka, “Mbote, na yina, banzasi sambwadi yina, nge me mona,” yandi tubaka, “banzasi sambwadi yina ke wakana, ya ke vwanda ve Luzayikisu ba ke pesa na muntu mosi?”

<sup>278</sup> Mu tubaka, “Ve, tata, ya ke vwanda kubwela kima mosi na Yawu to kukatula Kima mosi na Yawu.”

<sup>279</sup> Nyonso kele ya kumonisama na kati Kuna, mpe Bidimbu Sambwadi ke zibuka luzayikisu ya yina Yawu vwandaka. Ya kele yina ya vwandaka. Beno me mona, ya kele dyaka na kati ya Ndinga. Beno me mona, beno lenda ve kubasika na Ndinga yina. Yawu ke bika Ndinga ve. Mpe Mpeve ya Nzambi ke bika ata mbala mosi ve Ndinga yina. Yawu ke vwanda kaka na Ndinga; ke kufwa meso ya bantu yankaka, mpe ke fungula meso ya bayankaka. Yawu ke sala yawu ntangu nyonso.

<sup>280</sup> “Beno kele mikanda yina me sonama, yina bantu nyonso ke tangaka.” To, beno kele. . . Mu ke bangula Yawu, ke balula yayi mutindu yayi, beno me mona, ke balula kaka Yawu mutindu yayi, “Beno kele mikanda yina me sonama,” samu ti beno lenda ve kubwela kima mosi na Yawu, “yina bantu nyonso ke tanga; Ndinga ya Nzambi yina me talana,” na nzonzolo yankaka.

Mpe Pierre mpe Jean, na kulakisa yawu, na ntangu ba kwendaka kuna, ti ba talaka ti bawu vwandaka bantu yina zabaka kima ve mpe yina longokaka ve, bawu kuzwaka ndongosolo ve, kasi bawu talaka ti bawu vwandaka na Yesu. Beno me mona? Bawu vwandaka bantu yina zabaka kima ve mpe yina longokaka ve, kasi bawu vwandaka mikanda yina me sonama, beno me mona, yina me tangama ti bawu vwandaka na Yesu. Samu ti, Yesu vwandaka talana Yandi mosi na nzila ya bawu, Klisto ya kubumbama na kati ya nzutu ya bawu; ya kutalana, kumaka moyo.

<sup>281</sup> Mutindu Yandi vwandaka na kati ya Moise. Ntangu Ndinga vwandaka na kati ya Moise, yandi vwandaka Nzambi na kati ya nzutu. Na ntangu Yawu vwandaka na kati ya Yesu, Yawu vwandaka Nzambi na kati ya nzutu. Beno me mona? Kima kaka Yandi salaka vwandaka kusoba kibukutu ya Yandi, Ndinga ya Yandi ve, nkadulu ya Yandi ve. Yandi kele mutindu mosi mazono, bubu yayi, mpe ntangu nyonso. Yandi sobaka kaka nzutu ya Yandi. Yandi sobaka katuka Noé na Moise; Yandi sobaka katuka Moise na David; katuka David, Joseph; na yisi tii Yandi kwizaka na muvimba ya Bunzambi na nzutu. Beno me mona?

<sup>282</sup> Ya kele dyaka Nzambi mosi! Amen. Amen. Mu banza ti ya me luta. Beno me mona? Ya kele Nzambi mosi, kasi Yandi ke lwata kaka vwale yankaka. Beno me mona, Yandi ke lwata vwale yankaka.

<sup>283</sup> Yandi salaka yawu na mibongisi, bakaka vwale mosi, bakaka vwale mosi. Tii, na nsuka, Yawu me luta nsungi ya ba-Lutherien, me luta nsungi yankaka, na yina na nsuka Yawu kwizaka ya Muvimba. Kaka ntete Yandi kwiza, profete mosi telamaka dyaka. Yinki ya salaka, ya vwandaka samuna Ndinga, na kulakisaka na manima awa, kumonana ya yina me salama, ya yina bikanaka, ti Dibuundu ke vwanda na ngaanda kukondwa . . .ve kukondwa lubakusu. Na yina ntangu yayi ke zimbana fyoti-fyoti, kuna, mutindu Jean tubaka, “Mu fwana kulumuka, Yandi fwana mata,” na yina nyonso-nyonso ke kota na kati ya Yandi. Yandi kele ya muvimba ya kutalana, na nzila ya Luther, Wesley, mpe nsungi ya Pentecote, mpe me landila, me landila, Yandi kele ya muvimba ya kutalana, beno me mona, me landila, kaka kumonisama, Nzambi ke monana: Beno me mona Yandi (Ntangu yayi, beno tala.) kulungisa bansilulu ya Yandi samu na kilumbu *yayi*, mutindu *bawu* kuzwaka.

<sup>284</sup> Ntangu yayi Moise vwandaka Ndinga na kilumbu yina, samu Ndinga pesamaka na yandi samu na kilumbu yina; Moise. Joseph vwandaka Ndinga na bilumbu ya yandi, vwandaka kifwani ya Klisto ya kieleka. Beno me mona, mosi na mosi ya bawu vwandaka Ndinga.

<sup>285</sup> Mpe ntangu Yesu kwizaka, Yandi vwandaka Ndinga na muvimba ya Yawu, samu dikani nyonso ya mpulusu tulamaka

na kati ya Yandi. Dikani nyonso ya mpulusu tulamaka ve na kati ya Moise, tulamaka ve na Joseph, tulamaka ve na Elie. Beno me mona, bawu vwandaka kaka ndambu ya Ndinga, vwandaka lakisa Yawu yina ke kwiza. Beno me mona? Ntangu yayi beno tala, beno bumba yawu na dibanza ya beno; awa Yawu ke kwiza, mutindu mu ke tuba. Beno me mona, dikani nyonso vwandaka ve na bawu. Bawu vwandaka lakisa Yawu yina ke kwiza.

<sup>286</sup> Na yawu, na manima ya Yandi, Muvimba, beto lenda ve kulakisa kima yankaka. Ya ke lakisa na manima na Yandi, Ndinga. *Yayi* kele Luzayikisu ya muvimba; ba lenda bwela kima ve to kukatula na Yawu. *Yawu* kele Luzayikisu ya muvimba. Nyonso yina, kinsinsya ya Yandi ke kwiza; kasi ntangu Yandi kwizaka, Yandi vwandaka ya Kulunga. Hébreux 1, “Nzambi na bantangu mingi zonzaka na batata na nzila ya baprofete,” Nzambi zonzaka na nzila ya bavwale, baprofete, “kasi na bilumbu ya nsuka yayi na nzila ya Mwana ya Yandi, Yesu Klisto.” Yawu yina. Ya kumonana kuna na Calvaire, Mwana ya Nzambi, ya kumonana.

<sup>287</sup> Beno tala, “kumaka moyo.” Mpe, bubu yayi, na ntangu Ndinga ke monana na kati ya bavaze ya bantu, bavwale, ya kieleka ya kele Ndinga me salama na kilumbu yina, yina ke fwanana na Nzambi. Na kuvwandaka ya kubotama na kati ya Yandi, landila ya Ntete ya Corinthiens kapu 12, beto me kuma ya kufwanana na Yandi. Amen.

<sup>288</sup> Mu tubaka ndambu ya ngunga, kasi mu lenda kuzwa mwa ntangu fyoti dyaka? [Dibuundu me tuba, “Amen.”—Mu.] Beno me mona? Beno tala, mu lenda kondwa yayi kaka ve awa. Beno tala, kufwanana na Yandi!

<sup>289</sup> Ntangu yayi beno tala. Bantu yikwa ya Amerika kele awa? Beno telemisa maboko ya beno. Mbote mingi, nge kele sitwaye ya Amerika, na yina nge kele ya kufwanana na yinsi yayi. Ata nyonso yina yinsi yayi kele, beno fwana vwanda. Ya kele kieleka? Beno nyonso kele ya nkembo ya yandi mpe beno nyonso kele ya nsoni ya yandi. Beno kele ya kufwanana na yandi. Beno kele Americain, na yawu beno ke baka kifwani ya Amerika. Aleluya!

<sup>290</sup> Mu vwandaka na George Washington ntangu yandi sabukaka Delaware. Mu ke fwanana na yandi. Ya kele kieleka. Mu vwandaka na Abraham Lincoln na kinzonzi ya yandi na Gettysburg. Mu vwandaka ya kutelama kuna. Mu vwandaka na basoda na Guam, beno babakala, ntangu beno telemisaka dalapo yina. Mu vwandaka kuna. Mu kele Americain; mu ke fwanana na yawu. Amen. Ntangu yayi, samu na kuvwanda Americain, ata nyonso kele nsoni ya yandi na Revolution, mu ke nata yawu, samu mu kele Americain. Ya kele kieleka.

<sup>291</sup> Mpe mutindu Muklisto, mu ke kukifwanikisa na Yandi. Amen! Mu vwandaka na Noé ntangu yandi kotaka na nzasa. Mu vwandaka na Moise ntangu yandi basikaka na Égypte. Amen!

Mu vwandaka na Élie na Mongo ya Carmel. Yinga, tata! Nkembo na Nzambi! Mu vwandaka na yandi ntangu yandi salaka yawu. Ya kieleka mu vwandaka na Yandi, mu me fwanana munu mosi na lufwa ya Yandi kuna na Calvaire na ntangu mu kufwaka na bima ya yinza, na munu mosi mpe na binkulu nyonso. Mu fwananaka na Yandi. Mu kukifwanikisaka na Yandi na suka ya Paki ntangu Yandi vumbukaka na lufwa. Mu kukifwanikisaka na Yandi na Kilumbu ya Pentecote, ntangu Mpeve-Santu kulumukaka mutindu mupepe ya ngolo. Mu kukifwanikisaka na Yandi. Nyonso yina Yandi vwandaka mu kele, nyonso yina mu kele Yandi vwandaka; amen, na kuvwandaka ya kufwa na kati ya Yandi beto ke kukifwanikisa na Yandi. Yina Yandi kele mu kele. Amen!

<sup>292</sup> Yina yinsi yayi kele mu kele. Mu ke sepela na kuvwanda yawu. Mu me kubama na kunata nsoni ya yandi. Mu me kubama na kunata nsoni na kuvwanda Americain. Ya kele kieleka. Mpe mu kele mbala zole yawu na Yesu Klisto! Nyonso yina Yandi vwandaka ntangu nyonso mu kele. Mu zola kukifwanikisa na Yandi.

<sup>293</sup> Bantumwa yina, ntangu bawu vutukaka, bawu banzaka. . . bawu sekaka bawu, mpe bokilaka bawu nyonso yankaka, ba banzaka ti ya vwandaka lukumu mingi na kunata nsoni ya Nkumbu ya Yandi.

<sup>294</sup> Mu kele na kyese bubu yayi na kuvwanda mosi ya bawu, yina me kukifwanikisa na Ndinga, yina kele Klisto. Ya kufwanana na Yandi! Na kubotamaka na kati ya Yandi, beto me kuma ya kufwanana; ya kufwanana na kifwani ya Yandi, ya kufwanana na Ndinga ya Yandi, yina kele Yandi. Kana mu kele na kati ya Klisto, mu kele Ndinga ya Yandi; samu ti Yandi kele Ndinga, mpe yina Yandi kele mu kele. Amen! Beno me bakula Yawu? Mbote mingi.

<sup>295</sup> Ndinga ya kotalana, to ya kumonisama na kati ya Luzayikisu yina na kati kuna, na yina yinki yawu ke tula na munu? Kana Yandi kele Nkembo ya Shekinah yina, mu kele ndambu ya Yawu. Amen! Oh! Amen! Ya kieleka. Ndinga Yawu mosi me monisama, me monisama Yawu mosi.

Beno banza! Mansweki ya Nzambi me zabana na beto na kilumbu yayi, na nzila ya Munati-nsangu mosi ya Mazulu yina zabanaka na bawu na bilumbu yina; beno tala, Dikunzi mosi ya Tiya yina fidisaka Moise; Dikunzi mosi ya Tiya yina vwandaka na zulu ya Moise yina sonikaka Biblia; Dikunzi mosi ya Tiya yina Paul kutanaka na nzila ya yandi kuna na Damas.

<sup>296</sup> Mpe Paul sonikaka Ngwisani ya Malu-malu. Beno bambuka moyo, Matthieu, Marc, Luc, mpe Jean, bawu sonikaka kaka yina bawu monaka; kasi Paul vwandaka na Luzayikisu. Yandi basisaka Yawu, samu yandi kutanaka na Dikunzi ya Tiya, yandi mosi. Mpe beno banza, mutindu mosi. . .

<sup>297</sup> Kuna, Joseph, bawu nyonso sonikaka na yina salamaka, muntu nyonso yina sonikaka ntama na kilumbu yina. Kasi ntangu Moise kotaka na kisalu, yandi kuzwaka Luzayikisu. Yandi kutanaka na Dikunzi ya Tiya, mpe Yawu monisamaka na Moise yina vwandaka na Genese. Yandi sonikaka babuku yiya ya ntete ya Biblia, Moise salaka. Ya kele kieleka? Samu yandi kutanaka na Nzambi na mutindu ya Dikunzi ya Tiya, ya kubumbama na kati ya Dikunzi ya Tiya.

<sup>298</sup> Ntangu Paul kutanaka na Yandi na nzila... Bilandi sonikaka kaka yina bawu monaka Yandi kusala, kasi Moise kuzwaka Luzayikisu; yandi kwendaka na Égypte bamvula tatu mpe longokaka, mpe monaka ti Nzambi ya Ngwisani ya Ntama vwandaka Yesu ya Malu-malu, Luzayikisu! “Mu kondwaka ve kutumama na vision ya Mazulu.” Ya kele kieleka. Kieleka!

<sup>299</sup> Mpe beno banza na Yawu! Dikunzi mosi ya Tiya yina kwizaka na zulu ya bantu yango yina sonikaka Biblia, kele Dikunzi mosi ya Tiya awa, bubu yayi, yina ke na kutendula Biblia. Amen! Wapi mutindu beto ke tonda Yandi samu na yawu! Mutindu mosi! Wapi kubomba! Wapi mutindu ya kotalana! Mu kele na kyese mingi na kufwanana na yawu, mu zaba ve yinki kusala! Mu ke zola mingi kufwanana na Yawu na kisika ya ba-Baptiste nyonso, ba-Methodiste, ba-Presbyterien, ba-Luthérien, mpe bayankaka nyonso. Kufwanana na Ndinga yina kisika Nkembo yina ya Shekinah mpe Luzayikisu kele!

<sup>300</sup> Dikunzi ya Tiya na kumonikaka pwelele na kati-kati ya beto, ke fwanikisa ti Nsangu kele kieleka, mutindu Yandi salaka na Mongo ya Sinaï. Beno bambuka moyo, ntete nsangu ya kieleka kukwiza, Moise longaka mpe yandi basisaka bawu na Egypte; kasi kuna, ntete misiku ya kieleka kusunama (Bidimbu natamaka), Nzambi kulumukaka na ntwala ya bantu mpe siamisaka ti ba fidisaka Moise na Yandi, (ya kieleka?) na Dikunzi ya Tiya yina Moise tubaka ti yandi monaka na divunda mpe zonzaka na yandi.

<sup>301</sup> Oh, na bilumbu yayi ya nsuka, kumona Dikunzi mosi ya Tiya yina kaka na kati-kati ya beto, kuzonza Ndinga mosi; kaka yina ve, kasi ke tendula Yawu na kusalaka Yawu kotalana, mpe kusiamisa Yawu, Yawu kele Kieleka.

Na yawu, bantu kele ve na nzila mosi ya kukondwa kukwikila, kana kaka ti na luzolo ya bawu mosi bawu zola kusala. Mpe, na yina, “Yandi yina ke sumuka na luzolo na manima ya kuzwa luzabu ya Kieleka, ya kele dyaka ve na munkayulu samu na disumu.”

<sup>302</sup> Beno tala, Dikunzi mosi ya Tiya yina ba fidisaka na Moise mpe na Paul, yina sonikaka Biblia, ntangu yayi ba me fidisa samu na kumonisa Yawu. Lemvo ya Nzambi, Nzambi yina ke sobaka ve, ke na kulungisa bansilulu ya Matthieu 28, “Beno tala, Mu kele na beno ntangu nyonso”; ke na kulungisa Santu

Jean 14:12, “Bisalu yina Mu ke sala, beno mpe ke sala”; ke na kulungisa Santu Luc 17:28-29, “Na bilumbu ya nsuka Mwana ya muntu ke monana,” beno me mona, beno me mona; Malachie 4, “Tala, Mu ke tinda nge profete Elie, yina ke kwiza vutula Lukwikilu ya bantu na Ndinga ya kieleka.” Beno me mona? Wapi mutindu yayi. . . Beno me mona? Oh, la la!

<sup>303</sup> Yandi kufwaka, samu na kumonana Yandi mosi na beto. Ntangu yayi bika beto kufwa na beto mosi, samu na kumonisa Yandi na bayankaka. Bika beto kufwa na binkulu mpe bima yankaka, samu na kumonisa Yandi na muntu yankaka. Beto kufwa na ba-denomination, samu na kumonisa Yandi na bantu yankaka.

<sup>304</sup> Beno tala, tempelo ya ntama na kati ya yawu vwandaka na Nkembo ya Shekinah, mpe Nsemo ya Shekinah na zulu ya Ndinga. Ndinga kele Nkuna; Yawu basisaka mampa ya kulakisa samu na bakwikidi kaka. Menga vwandaka mpe na zulu ya ngwisani; mpe Menga kele maza, maza yina ke pesaka mbuma luzingu, ble, nkuna, yina kele Ndinga.

<sup>305</sup> Mutindu Yesu tubaka, “Mutindu Moise zangulaka nyoka ya kisengo,” mpe kuna Yandi tubaka dyaka, “Nzambi zolaka mingi yinza Yandi pesaka Mwana ya Yandi mosi kaka; muntu nyonso yina ke kwikila na Yandi ke kufwa ve.” Moise bulaka ditadi na ntoto ya kuyuma, samu na kuvuukisa bantu yina vwanda kufwa, to samu na kunata maza. Nzambi bulaka Yesu, samu na kubasisa Mpeve na Yandi, samu na bantu vwanda kufwa. Menga basikaka na Yandi, yina kele, “Maza ya kusukula na nzila ya Ndinga.” Mpe, Maza ke nataka Luzingu na Nkuna. Mpe ya basisaka Nkembo ya Shekinah; pelaka na zulu ya Ndinga, yina basisaka mampa ya kulakisa. Mpe mampa ya kulakisa vwanda kaka samu na bantu yina soolamaka. Uh-huh. Ya kieleka?

<sup>306</sup> Ntangu yayi na kukotaka na kati ya vwale, na nzila ya vwale, na kati ya Mvwandulu ya Yandi, kisika Ndinga kele (ve credo), Ndinga; kuna na kumonaka Nkembo ya Shekinah, Shekinah, Ngolo, Mpeve-Santu ke pela na zulu ya Ndinga, ke basisa nsilulu, ke lakisa ti beno kele na manima ya vwale. Amen!

Mu me sabuka bavwale ya kupasuka kisika

Nkembo ke bwaka ata fioti ve, (Uh!)

Aleluya, Aleluya;

Mu ke na kuzinga na Mvwandulu ya Ntinu.

Mu me sabuka bavwale ya kupasuka kisika

Nkembo ke bwaka ata fioti ve,

Mu ke na kuzinga na Mvwandulu ya Ntinu.

<sup>307</sup> Mpusu ya ntama ya kibulu, ba-denomination, ya me pasuka. Mu me lutila na yawu, na kukota na Nkembo ya Shekinah, mpe mu ke mona Ndinga. Mu ke mona Dikunzi ya Tiya kutambula. Mu ke mona Ndinga me talana. Yina Yandi tubaka ti Yandi ke sala na bilumbu yayi ya nsuka, mu ke mona yawu kukula. Mu



ke mona bana kudya Dimpa yina ya Shekinah me basika na kuyela ya Ndinga yina, bayina ke kwikilaka Yawu. Amen! Wapi ngunga ya mbote beto ke na kuzingila! Beno me mona, Shekinah vwandaka na zulu ya Ndinga; mpe na yisi kuna vwandaka Dimpa. Mpe kuna vwandaka na Menga, yina losamaka, yina ke pesaka Yawu maza. Mpeve ke pesaka Luzingu na Ndinga. Mpe. . .

Bantu yikwa tangaka, kuwaka bande na zulu ya *Lufundusu*? Yinga. Mingi ya beno. Beno me mona kuna, ya ke lomba. . .

Ndinga yina fwana yela. Samu na kuyela, Ya fwana vwanda na mutindu ya kulunga ya ntoto. Beno me mona? Mpe Nzambi salaka nsilulu, mpe na ntangu ya ke bula ntima yina, ya lenda kubwa ve.

<sup>308</sup> Noé vingilaka bamvula nkama mosi na makumi zole. Abraham vingilaka bamvula makumi zole na tanu, samu na mwana. Nzambi tubaka yawu, mpe yina sukisaka dyambu. Beno me mona? Yinki ya kele? Ndinga vwandaka kuna me tulama maza na nzila ya lukwikilu, na kukwikilaka Yawu, ya basisaka bandandu. Ya basisaka mwana; ya basisaka mvula; ya basisaka kufuluka ya maza; ya basisaka mwense yina kuzwaka kivumu.

<sup>309</sup> Profete mosi tubaka, “Mwense mosi ke kuzwa kivumu.” Kukondwa ntembe ti mwana-kento nyonso ya ntwenya kwendaka mpe kubikaka bilele ya bebe ya yandi. Mbote, profete yayi Esaie talisamaka profete, siamisamaka na Nzambi. Mpe Mfumu tubaka, “Mwense mosi ke kuzwa kivumu. Mu ke pesa bawu kidimbu ya mazulu, kidimbu ya nene; mwense mosi ke kuzwa kivumu.”

<sup>310</sup> Kuna, bantu nyonso yina, bakwikidi yina, kaka mutindu beno nyonso. Mpe bawu kuwaka profete yina kutuba yawu, mwana-kento nyonso ya ntwenya. . . Muntu nyonso tubaka, “Ya ke vwanda mwana ya munu ya kento. Yinga, tata.” Muntu nyonso kwendaka sumba mapapa ya ba-bebe mpe ba-couche mpe nyonso, na kuvwanda ya kukubama, samu bawu zabaka ti yandi zolaka kuzwa yawu. Nsungi yina lutaka, mpe bawu banzaka, “Profete yina talisamaka, yina Nzambi siamisaka, wapi mutindu yandi lendaka tuba kima ya luvunu? Ya fwana vwanda mutindu yina!”

<sup>311</sup> Ya vwandaka bamvula bankama nana na ntswala, kasi yandi butaka bebe. “Mazulu na ntoto ke luta, kasi Ndinga ya Munu ke luta ve.”

<sup>312</sup> “Mpe ya ke salama na bilumbu ya nsuka,” me tuba Nzambi. Beno me mona, beto bawu yayi, Nsemo na zulu ya Ndinga. Mutindu nsemo ya mwini ke sobaka nkuna kubanda na nkembo na nkembo, beto mpe kumaka—me kuma ya kulutila mutindu mosi na Yandi na yina beto ke zinga na Mvwandulu ya Yandi; mutindu Yandi, na kuvwandaka mutindu kifwani ya Yandi ya lusakumunu mutindu beto ke tambula na Yandi.

313 Beno tala mbote yina mwini ke salaka. Beno ke kuna nkuna, yinki ke salama? Nkuna yina ke bola. Na kati ya nkuna kele na luzingu. Luzingu ke mena mpe ke basisa mwinga. Ntangu yayi, yina ke talana ve mutindu yina vwandaka na ntonono.

Ya kele na Luther. Ya vwandaka mwinga. Mbote mingi.

Mwinga kwendaka na ntwala mpe, kima ya ntete beno zaba, yawu basisaka felele. Beno me mona, yina vwandaka reveil ya ba-Wesleyen; ya vwandaka ve mutindu yankaka.

Na manima me kwiza reveil ya ba-Pentecotiste, beno me mona, yina basisaka mbotika ya Mpeve-Santu. Mbote mingi.

Yinki salamaka? Beto me kuzwa buwa na dikutu. Ya bandaka na kutalana yimbi. Kima *yayi*, kima *yina*, ya ke talana ve mutindu Ndinga. Ya kele ve mutindu yankaka ya Yawu. Ya kele ve mutindu Mbuma ya kieleka yina kotaka na ntoto.

314 Kasi Nzambi kele dyaka kuna samu na kusala yawu—yawu kaka mutindu mosi. Beno tala, yinki ya ke sala? Na nsuka ya ke vutuka dyaka na Nkuna ya kieleka. Ntangu Yandi kwizaka na kati ya nzutu ya Martin Luther; ntangu Yandi kwizaka na kati ya nzutu ya John Wesley; ntangu Yandi kwizaka na kati ya nzutu ya Pentecote; Yandi fwana monana Yandi mosi dyaka mutindu Nkuna mosi yina kotaka na ntoto, Mwana ya muntu. Yandi monisamaka Yandi mosi mutindu Mwana ya Nzambi, na nzila ya nsungi ya mwinga mpe nyonso yina, kasi na nsungi yayi ya nsuka Yandi ke monisama Yandi mosi mutindu dyaka Mwana ya muntu. Beno me bakula yawu? Mbote mingi, mutindu na mbandukulu, ya kuyidika!

315 Mpe yinki mwinga yina ke basisa? Ya ke yela ntangu nyonso. Mwa mwinga ke yela, dyaka ya kele ve mutindu mbuma ya kieleka. Nsangu ya Luther mpe; ve, kuna kwizaka bansangu yankaka, Finney, Sankey, Knox, Calvin, tii na yisi, ata mosi ya bawu. Ya vwandaka mpe nsangu kasi, yina ya vwandaka, ba vwandaka ve na Luzayikisu ya muvimba ya Yawu samu ti ya vwandaka ve ntangu. Beno lenda ve kutula dikutu na disangu ntete ya kwiza. Beno me mona? Mpe kuna, na nsuka, kuna ke vutuka dyaka Nkuna ya kieleka yina kwendaka na ntoto.

316 Beno me mona, Nzambi ke landaka yinza ya kieleka. Beno me mona, Yandi butukaka mwana-dimeme, ya kele samu na yina Yandi butukaka na kidikilu. Mameme ke butukaka ve na bamfulu. Beno me mona, Ba *twadisaka* Yandi na Calvaire. Mwana-dimeme, ba ke twadisaka mameme. Ya kele kieleka. Bankombo ke twadisaka bawu na boucherie, beno zaba yawu, na abattoir. Nkombo ke twadisaka bawu, kasi ba fwana vwanda ya kutwadisa. Huh! Ya kele kieleka. Na yawu Yandi vwandaka ya kutwadisa na boucherie, beno me mona, samu Yandi vwandaka Mwana-dimeme.

317 Kima nyonso ke talisa Yandi na yinza. Ya kele samu na yina Yandi butukaka na Ngonda ya yiya to na Ngonda ya yiya,

na Ngonda ya kumi na zole ve; Yandi zolaka lenda ve, ya ke vwandaka na neze tii na bametele sambanu na zulu kuna na ntangu yina ya mvula. Yandi vwandaka ve nzambi-mwini, kasi Yandi vwandaka Mwana ya Nzambi. Beno me mona? Nzambi-mwini ya Rome na kilumbu ya makumi zole na tanu ya Ngonda ya kumi na zole, ntangu sikle ya mwini ke kumaka na kisika ya yawu kuna mpe bawu vwanda salaka ba-cirque ya Rome, mpe vwanda bokila mukembo ya mbutukulu ya nzambi-mwini, mpe bawu salaka yawu ya Mwana ya Nzambi. Ve, ve. Yandi vwandaka Mwana ya Nzambi. Mukembo ya mbutukulu ya Yandi vwandaka na bayankaka ya yinza. Ya kieleka.

Ntangu yayi beno tala dyaka ntangu yayi na yina beto ke landila, beto ke na mwa ntangu me bikana.

<sup>318</sup> Ntangu yayi na ya kulunga. Na manima ba me sala mwinga; na manima ba me sala yinti; na manima mbuma me basisa disangu; na yina ya fwana kuma na kulunga, kuvutuka dyaka na mbuma ya ntangu nyonso.

Mpe, beno bambuka moyo, mbuma fwana vwanda na luzingu. Beno me mona? Kana ve, ya ke zinga ve. Beno me mona? Ata mosi ya yina vwandaka na ngaanda ya bansangu yina ke kwiza na Luzingu. Ya fwana kuzwa luzingu na Yawu. Kasi, beno bambuka moyo, Luzingu mosi yina vwandaka na mwinga kele na mbuma. Yawu ke na kuyelaka kaka yawu mosi, beno me mona. Yandi monanaka Yandi mosi, (yinki?) Mwana ya muntu, mbuma yina kwendaka na ntoto. Beno ke bakula Nsangu?

Ba-Grecs tubaka na Yandi, “Beto zola mona Yesu.”

<sup>319</sup> Yandi tubaka, “Kana mbuma ya disangu kubwa na ntoto.” Beno me mona? Mbote mingi.

<sup>320</sup> Ntangu yayi wapi mutindu Yandi monisamaka Yandi mosi na ntwala? Na nzutu yankaka; mwinga mpe felele, mpe nyonso yina, mpe makasa mpe nyonso. Yandi monikisaka Yandi mosi kuna, (yinki?) Mpeve mosi, kasi na nzutu yankaka. Beno me mona? Kasi yinki kele nsuka ya mbuma yina? Ya ke vutuka na mbuma ya kieleka. Ya kieleka?

<sup>321</sup> Mpe ministere ya Yandi ke kwiza, na kulutaka na kubongisa, na kuvutuka dyaka na Ndinga ya kieleka. Ndinga ke kwizaka na profete. Mpe Yandi silaka yawu, na Malachie 4, “Mpe kuvutula Lukwikilu ya bantu na mbuma ya kieleka.” Yina kwendaka na ntoto kele awa mutindu mosi. Mbuma me lutila na mingi awa. Ya me basika mutindu Mwana ya Nzambi, ntangu yayi Yawu ke na kumonana Yawu mosi awa mutindu Mwana ya muntu, mpe kuna Yawu ke monana Yawu mosi mutindu Mwana ya David na zulu ya Kiti ya kimfumu. Beno me mona, Bana tatu yina, kaka ya kieleka. Oh, la la, dyaka mutindu ya kieleka!

<sup>322</sup> Ntangu yayi na ministere ya kulunga ya Yandi mosi; ya muntu mosi ve, ya denomination mosi ve, mutindu bawu salaka na nsungi yina kuna, beno me mona; kasi Yandi mosi kutalanaka,

talana Yandi mosi na nsilulu, na kusalaka Santu Luc 17:28, Malachie 4, mpe nyonso yina, Hebreux 13:8, kaka ya kieleka. Na ntangu yina, wapi ntangu ya ke vwanda? Ntangu Nkuna ya kimfumu ya Abraham ke na kuingila Mwana ya nsilulu. Mpe bifwanukusu nyonso fwana kusalama. Mpe Nzambi Yandi mosi monanaka na nzutu ya muntu ya moyo, na nkuna ya kimuntu ya Abraham, na ntwala ya kubeba, mpe Yesu tubaka ti ya ke vwanda kima mutindu mosi na Mbumba yayi ya kimfumu ntete Mwana ya nsilulu kuvutuka.

<sup>323</sup> Beno tala vwale ya ntama yina bumbaka Nkembo. Bampusu ya ntama ya bibulu, ya vwandaka ve na kitoko samu na kuzola yawu; to dyaka vwandaka nzutu ya Yandi. Ya kele samu na yina bantu vwanda tubaka, “Mutindu ya Muntu na mukongo ya kufutama mutindu yina?” Mu banza ya bamvula makumi tatu, mpe na bansuki ya mpembe, mpe mandefo ya Yandi ya mpembe, Yandi vwandaka ve na mingi ya kutala. Biblia ke tuba, “Ya vwandaka ve na kitoko yina beto zolaka zola Yandi.” Yandi vwandaka talana ve mutindu Ntinu, mpusu ya kibulu ya ntama, kasi, oh, yinki vwandaka na kati!

<sup>324</sup> Mpe mwa nkonga ya “ba-exalté” ya kuvukana kintwadi na kati ya kivinga ya tiya mutindu yayi, bawu ke bokila bawu, mingi ve ya kitoko ya kuzola, kasi yina kele na kati! Mu ke kwikila ti ya kele ya kubumbama na bantima mingi, beno me mona. Beno me mona? Mbote mingi.

<sup>325</sup> Na nganda Yawu vwandaka kima mosi ve, kasi nyonso vwandaka na kati. Mbala mosi na kati ya Yawu, kuna beno ke mona Yawu. Wapi mutindu beno ke kota na kati ya Yawu; na kupesanaka maboko, na kukuma? Ve. Beno butama na kati ya Yawu. Na kufwaka, na kukatulaka mpusu ya beno ya ntama ya kibulu, beno me mona, beno mosi ya ntama, samu na kukota na yina ya malu-malu. Beno me mona? Kubika mpusu yina ya ntama ya kibulu.

<sup>326</sup> Nsemo ya Shekinah ke ve . . . Beno kuwa, milongi! Milongi, mu zola ti beno kuwa Yayi. Ntangu mbala mosi na kati . . . Ntangu yayi mu ke baka yayi na malembe nyonso, samu ya kieleka beno bakula Yawu. Mbala mosi na kati ya vwale, na yisi ya Nkembo ya Shekinah, Nsemo ya Shekinah ke baka ve Ndinga ya Nzambi mpe ke monisa Yesu na kuvwanda “nganga-nkisi,” ve, mutindu ba-denomination ke salaka bubu yayi, “télépathie mentale, exalté, Béelzéboul.” Nkembo ya Shekinah ke monikisaka Yandi ve mutindu yina.

<sup>327</sup> Kasi Nkembo ya Shekinah ke yelisaka Nkuna yina ba silaka samu na ngunga yina, ya Ndinga, na kulakisaka Yandi kele dyaka Lis ya Vallée. Ya ke basisa Nkuna yina, Lis ya Vallée, Dimpa ya Luzingu, Alpha mpe Omega, mutindu mosi mazono, bubu yayi, mpe ntangu nyonso. Yandi kele kitini ya bakwikidi.

Nkembo ya Shekinah ke monikisa, na mukwikidi, Yandi kele mutindu mosi mazono, bubu yayi, mpe ntangu nyonso.

<sup>328</sup> Ve, “Bilumbu yina, Yandi lutaka, mpe Yandi kufwaka mpe nyonso manisaka.” Na yawu nkundi, kana beno ke kwikila yawu, kana beno ke kwikila yawu, na yina beno kota na kiwisa na Nkembo ya Shekinah. Wapi mutindu Nkembo ya Shekinah lenda monikisa kaka Yandi na kati ya bantu tatu? Beno me mona? Wapi mutindu Nkembo ya Shekinah lenda monikisa kaka Yandi mutindu na kuvwanda ya kubotama, bantu, na nkumbu ya “Tata, Mwana, mpe Mpeve-Santu,” na yina ya kele ve na muntu na kati ya Biblia yina botamaka mutindu yina? Wapi mutindu Nkembo ya Shekinah lenda sukisa Yandi na ntumwa mosi, na ntangu Yandi kele mutindu mosi mazono, bubu yayi, mpe ntangu nyonso? Beno me mona?

<sup>329</sup> Nkembo ya Shekinah ke talisa Yandi. Yawu ke basisa Ndinga ya nsilulu, mbala mosi na ntwala ya beno. Ya kele samu na yina Yandi zolaka bumba kizizi ya Moise, samu na kati ya yandi vwandaka Ndinga. Yandi bumbaka Yesu, mutindu mwa Muntu ya kulemvuka, samu na kukanga bawu na kumona Yehowa. Mpe Yandi ke bumbama Yandi mosi bubu yayi, na kati ya bavaze ya ntodo, na Shekinah. Ngaanda ke talana mutindu nkonga ya ba-exalté, bampusu ya bibulu ya ntama, kasi kati ke bumba Nkembo ya Shekinah.

Mpe Yawu ke yelisa Dimpa ya kulakisa na yina beto ke sepelaka, mpe samu na yina beto ke nataka matoma lweka yankaka ya yinsi, bankama ya bakilometele, beno me mona. Ya kele Madia ya bakwikidi. Ya kele kaka samu na mukwikidi. Beno bambuka moyo, Dimpa ya kulakisa vwandaka kaka samu na mukwikidi kaka, beno me mona, Nkuna ya Dimpa ya kulakisa. Beno tala. Yinki yawu ke sala? Nkembo yina ya Shekinah, na zulu ya Dimpa ya kulakisa, vwanda bumba Yawu na kubola.

<sup>330</sup> Beno bambuka moyo, mani yina katukaka na Mazulu, ya vwanda vwanda na Nkembo ya Shekinah, kubanda nsungi mosi na yankaka. Na ngaanda ya kuna, ya vwanda kuzwa misyete na kati ya yawu, na mpimpa, ya vwanda kuzwa bamikolobo. Ya kele kieleka?

<sup>331</sup> Na ngaanda ya Nkembo ya Shekinah, “Bilumbu ya bimangu me luta. Beno me mona, ya kele nyonso bufanatiki.” Kasi na kati. . .

<sup>332</sup> Beno tala, ba kuzwaka bankuna ya felele tournesol na kibumbulu-bambuma mosi na Egypte yina ba tulaka kuna na bilumbu ya Joseph, bamvula mafunda yiya, na kutala, me luta. Joseph tulaka yawu na kibumbulu-bambuma. Ba kunaka yawu. Yawu zingaka. Samu na yinki? Yawu vwandaka na luzingu.

<sup>333</sup> Yinki kele Nkembo ya Shekinah yayi bubu yayi? Samu na kukota na lweka yankaka ya vwale, samu na kumona Nani Nzambi kele, ya kutelama na ntwala ya beno, kumona Nani

Nzambi kele, ya kutelama awa na ntwala ya beto, Dikunzi ya Tiya. Yandi me bumbama na kati ya nzutu ya muntu. Kasi yinki ke sala Shekinah, yinki yawu ke sala? Nkuna ya Dimpa ya kulakisa, Ndinga yina beto ke zinga na kilumbu yayi, na nzila ya bansilulu yayi, Nkembo ya Shekinah ke yelisa Dimpa yina ya kulakisa, ke nata Yawu na kusalama, ke sala Yawu Dimpa samu na mukwikidi; yina vwandaka na kati ya bapaze ya Biblia, mvula na manima ya mvula, Ndinga ya nsungi yayi.

<sup>334</sup> Samu na ba-denomination, Ya kele ditadi ke bwisa. Samu na ba-denomination, bawu ke kubwa na Yawu. Kuna na kati ya bamvula, Luther, Wesley, Martin Luther, mpe bawu nyonso, Sankey, Finney, John Smith, Knox, bawu nyonso kubwaka na ntwala ya Yawu.

<sup>335</sup> Kasi yinki ya ke sala na bilumbu ya nsuka? Yinki yayi “*kumonikisa*”? “Kubasisa!” Yinki Malachie 4 fwana sala? Kukatula bantu na ditadi yina ke bwisa, kumwangisa binkulu, mpe kumonikisa Dimpa na Nkembo ya Shekinah. Beno tala Yawu mbote kuyelisa mpe kubasisa kaka ya kieleka yina Yawu tubaka ti Yawu ke sala, oh, la la, Dimpa ya kulakisa samu na nsungi yayi. Samu na denomination, ditadi ke bwisa, “nkonga ya bafanatiki.” Kasi, beto bayina ke kwikilaka!

<sup>336</sup> Kasi ntangu yayi mutindu Apocalypse 10 silaka, “Mansweki nyonso ya Nzambi, yina vwandaka ya bumbama na kati ya bapaze na kati ya bamvula, ke natama na kuyela, na kubasika na nsungi ya Nsunga ya wanzio ya sambwadi.” Ya kele kieleka?

Yinki Yandi tubaka, mvula mosi na bangonda sambanu me luta, na kutala na bamvula zole ntangu yayi? “Kwenda na Tucson; nge vwanda na node ya Tucson, kupasuka ya nene,” mpe yina ke salama, “Bidimbu ke funguka,” Bidimbu yina ke monikisa bima yayi. Mu vutukaka kaka mutindu Yandi tubaka.

Yinki ya kele? Ya ke lakisa ti Ya lenda vwanda muntu ve. Ya ke salamaka na mutindu ya kulunga, kaka ya kusungama mutindu ya lenda vwanda, ntangu nyonso. Yinki ya kele? Ya kele diboko ya Nzambi, beno me mona, na ntwala ya beto. Mpe samu ya kele na kati ya mwa nkonga mosi ya bantu, ya kubumbama na kati ya nzutu ya muntu, ya kele ya kubumbama na yinza na ngaanda. Yandi kele ya kubumbama na yinza na ngaanda. Yandi ke na kumonana Yandi mosi na bana ya fyoti bayina zola kulongoka. Beno me mona? Ya kele kieleka.

<sup>337</sup> Konso, beno me mona, konso kingana na Biblia, konso kifwanukusu ya Biblia, ke talana kaka awa na ntwala ya beto. Nzambi mosi, na kati ya Dikunzi ya Tiya, yina sonikaka Biblia, nyonso zole na Ngwisani ya Ntama mpe ya Malu-malu, kele kaka awa na kutalisaka Yawu, ke lakisa kaka ya kieleka yina yawu vwandaka, ke tendula kaka mbala mosi, mpe kundimisa yawu ti ya kele lutendulu.

338 “Beto kele na lutendulu!” Na yawu beto tala yawu kusalama. Beno me mona, yawu yina, beto tala yawu kotalana.

339 Kumonisama! Yesu tubaka, “Kana Mu ke sala ve bisalu ya Tata ya Munu, beno kwikila Munu ve.” Beno me mona, ya fwana siamisama.

340 Kasi ntangu yayi—ntangu yayi, ke talana ve mutindu Yesu, ba tulaka kitende na zulu ya yintu ya Yandi mpe bulaka Yandi na zulu ya yintu, ba tubaka, “Kana Nge kele Profete, tuba na beto nani me bula Nge.” “Mpe kana Nge kele Mwana ya Nzambi, balula dimpa yayi.” Beno me mona, yina kele dyabulu. “Kana Nge kele Mwana ya Nzambi, katuka na . . .”

341 Mu zola tuba, Luzayikisu yina Yandi fwana sala, ya kele yina Yawu kele. Kasi ntangu yayi, mutindu Apocalypse 10 me monisama, mansweki ya Nzambi me talana, me zabana, mutindu Buku ya Bidimbu Sambwadi ba silaka.

Ntangu yayi beno bika lukwikilu ya beno na Yandi Yina kele Ndinga . . . Samu ti, na Apocalypse 10 ya ke tuba . . .

342 To, Apocalypse 19, mu zola tuba. Mu sonikaka yawu awa, Apocalypse 10, samu na kukwenda na yawu; kasi ya kele ve 10, ya kele 19. Ntangu Yandi ke kwiza, ba ke bokila Yandi, “Ndinga ya Nzambi,” na kutambulaka na zulu ya mpunda ya mpembe, mpe bilandi ya Mazulu ke vwanda na manima ya Yandi.

343 Beno bukaka vwale ya ndongosolo ya denomination! Beno bukaka vwale ya kinkulu ya denomination! Beno buka bavwale nyonso yina ke na kubumba Yandi na beno! Beno buka bavwale yina ya lunangu, beno bakento. Beno kele—beno kele bana ya bakento ya Ntinu; beno sala mutindu yawu, beno zinga mutindu yawu. Beno buka konso vwale, ata nyonso yina Doctorat ya Philosophie mpe Doctorat ya Droit ke tuba. Kana ya kele ya kuswaswana na Biblia yina, beno buka vwale yina!

Samu, beto me sabuka vwale ya kupasuka. Beto me kuma na lweka yankaka ntangu yayi, na lweka yankaka. Mpe beno ke mona, kana beno sala kaka yawu, kubuka binkulu yina ya ntama mpe nyonso yina, mpe kukwiza na Yandi, beno ke mona Yandi ya kutelama, Munungi ya Ngolo, Ndinga ya nsilulu samu na nsungi yayi, kotalana. Beno ke mona Nzambi ya Ngolo nyonso kumonana, ke mona Yandi kaka na kati ya beto awa, ya kumonana, Nzambi ya Ngolo nyonso, yina binkulu nungaka ve.

344 Bawu mekaka na kubumba Yandi na manima kuna; bawu salaka, bamvula, kasi ntangu ya nsilulu me lunga. Nzambi telemisaka Moise na ntangu mosi, mpe yandi vulusaka bana na bima yina. Mpe Yandi kele dyaka . . . Ba lenda nunga Yandi ve. “Mazulu na ntoto ke luta, kasi Ndinga ya Munu ke luta ve.” Yandi kele mutindu mosi mazono, bubu yayi, mpe ntangu nyonso.

345 Bawu ke tuba, “Ya lenda salama ve.” Kasi ya salamaka. Mpe, ntangu ya salamaka, bawu tubaka, “Ya kele ya dyabulu.”

<sup>346</sup> Kasi yina ke soba ve Ndinga ya Nzambi, ata fyoti ve. Yawu kele kaka “Nzambi,” samu na mukwikidi, “Munungi ya Ngolo nyonso; mutindu mosi mazono, bubu yayi, mpe ntangu nyonso,” na nzila ya nkadulu ya Yandi, na nzila ya Ndinga ya Yandi, Hébreux 13:8.

<sup>347</sup> Mu ke sukisa, na kutubaka yayi, samu ti ya kele baminuti tanu na ngunga kumi na zole, mu ke tuba kaka yayi. Mu kele dyaka na bapaze kumi, kumi na zole. Mu ke baka yawu ntangu yankaka, mu banza na nkokila yayi.

<sup>348</sup> Beno tala, beno tala yayi. Ya vwandaka kilumbu mosi na vente aux enchere, mpe bawu vwandaka na violon mosi ya ntama. Beno me kuwaka yawu bambala mingi. Violon mosi ya ntama; mpe muteki tubaka, “Yikwa ba ke pesa munu samu na yawu?” Mu lendaka zonga yawu mbote ve, landila poweme. Ya me luta bamvula mingi, mingi, kasi ya me kwiza na mabanza ya munu. Mpe ba nangulaka violon yango ya ntama, ya vwandaka talana mingi mbote ve; ya vwandaka talana mvindu mingi, mpe nyonso. Yandi kuzwaka ata muntu samu na yawu. Na kumanisa, mu banza ti ba lakisaka yandi dollar mosi, to kima mosi mutindu yina.

<sup>349</sup> Mpe ya vwandaka na muntu ya kutelama kuna yina vwandaka banza ve ti ba zolaka tekisa yawu na mbongo yina, na yawu yandi kwendaka mpe bakaka yawu. Yandi me lutisa maboko ya yandi na zulu ya yawu, mpe me baka mwa yiti ya kubulila mpe me lutisa colophane, mpe yandi bulaka mwa miziki. Mpe na yina yandi salaka mutindu yina, bantu nyonso bandaka na kudila. Bawu kuwaka ntete ve muziki ya mutindu yina na luzingu ya bawu.

Na yina muteki tubaka, “Yikwa ba ke pesa munu?”

<sup>350</sup> “Mafunda zole!” “Mafunda tanu!” “Mafunda kumi!” Beno me mona? Yinki ya vwandaka? Diboko ya mulongisi me monikisa yina vwandaka ya kubumbama na kati ya kisadilu ya ntama yina.

<sup>351</sup> Mutindu mosi ntangu yayi! Buku ya ntama, Yawu me beba, ba me seka Yawu, me nyengisa, ba me moke Yawu. Kasi ntangu me lunga yina bawu ke sala vente aux enchere ya ba-denomination, Lukutakanu ya Yinza ya Mabuundu. Ba ke na kutekisaka Yawu mutindu ata mumbungu ya muntu. Ya kele na vente aux enchere ya ba-denomination yina ke na kwiza.

<sup>352</sup> Kasi, beno bambuka moyo, ya kele na kima na Buku ya ntama yina ba silaka ti ya ke vwanda na diboko ba soolaka ntete, yina ba kubikaka yina ke kwiza kilumbu mosi, yina ke baka Yawu mpe ke sala Ndinga ya Buku yayi, na nzila ya ntima yina ba soolaka ntete, samu na kisalu yina ba salaka Yawu, kotalisa bansilulu yina kele na kati ya Yawu. Ya lendaka talana, oh, mutindu nkonga ya bantu ya ba-exalté, to kima yankaka; kasi beno baka kaka diboko ya Mulongisi, Ndinga na zulu ya Yawu,



samu na kumonisa Ndinga yina, mpe ya ke kuma ya kulutila na exalté. Ya me kuma yawu na mosi na mosi ya beto, mutindu yina ve, bankundi? Ya kele ve nkonga ya bafanatiki. Ya me tala na diboko ya Nani me simba mwa yinti yina ya kubula muziki.

Beto sambila.

<sup>353</sup> Tata ya beto ya Mazulu, na nzila ya lukwikilu, bubu yayi, mu ke mona Mulongisi ya Buku ya ntama, yina bawu sobisaka na binkulu. Bawu sobisaka Yawu na ba-denomination. Bawu me meka na kusobisa Yawu. Ntangu yayi bawu ke sobisa Yawu na Lukutakanu ya Yinza ya bantu, ya mabuundu, ya communiste, mumpani. Vente aux enchere ke na kulandila, Mfumu.

<sup>354</sup> Nzambi, kwiza! Ya kieleka, Nge ke sala. Tinda beto profete yina, Mfumu, yina ke baka mwa yinti yina ya kubula muziki, yina ke baka Ndinga yayi mpe ke siamisa ti Yesu Klisto kele mutindu mosi mazono, bubu yayi, mpe ntangu nyonso. Mingi, Mfumu, ke teka baluzingu ya bawu, bawu ke losa binkulu ya ntama, bawu ke buka bavwale. Bawu zola Yawu, Mfumu. Bawu ke pesa nyonso, nyonso, pesa bawu kaka Yesu.

<sup>355</sup> Mfumu, mu banza ti Nge me siamisa Yawu na bawu ntangu yayi. Bawu me katuka bisika nyonso. Bawu me baka bambongo ya bawu ya kuzingila. Bawu ke sala nyonso, samu na kumeka na kukuma na balukutakanu, samu na kusala nyonso yina bawu lenda sala, samu bawu me tala Palata yina ya kulutila ntalu. Bima yankaka kele kaka fyoti. Sakumuna bawu, Tata.

<sup>356</sup> Na zulu ya chaire yayi, na suka yayi, Mfumu, ya kele na bamuswale. Mu banza ti bayankaka ya yawu fwana kwenda bubu yayi, ntete lukutakanu ya kubeluka ya nzutu na nokila yayi. O Nzambi ya Seko, tala na yisi. Mu zaba ti Nge kele awa, Nge kele ya kubumbama. Mpe mu ke na kufidisa mwa bavwale yayi, Mfumu, yina ba ke bokilaka “bamuswale,” mpe mwa “ba-tablier,” mpe mwa “ba-chouche” ya mwa ba-bébé. Mpe mu ke na kutinda yawu mutindu mwa bidimbu ya vwale, ti Ndinga ya Nge me longama na zulu ya yawu na suka yayi, mpe, mutindu mukwikidi, mu ke tentika maboko ya munu na zulu ya yawu, nzutu ya munu, kidimbu ti mu ke kwikila Yawu. Mpe, na nzila ya lukwikilu, konso muntu na kati ya yinzo yayi ke na kusalaka mutindu mosi, Mfumu. Bika ti bambevo kubeluka.

<sup>357</sup> Nge lenda lutisa diboko ya Nge na Ndinga awa, Mfumu, mutindu muntu ya violon ya ntama salaka na violon, sala yawu mutindu yina, Mfumu. Sala ti yawu bula muziki ya kieleka, mwa yinti yina ya kubula muziki na diboko ya Mulongii, kuna beto ke mona Yandi kutelama na ntwala ya bantu nyonso.

<sup>358</sup> Wapi mutindu bantu yina zolaka banza kilumbu yina, na yina bawu zolaka ve kupesa kima mosi, na ntangu bawu pesaka ve kima samu na violon yina ya ntama. Bawu zolaka yawu ve. Bawu vwanda zola ve yawu na bayinzo ya bawu. Kasi ntangu muntu yina zabaka kusadila yawu bakaka yawu, kuna ba tekisa

nyonso yina vwandaka na bawu, samu na kuzwa yawu. Bawu vwandaka swana mpe vwandaka nwanina yawu. Kuna ntangu manaka mingi.

<sup>359</sup> Mutindu mosi ya ke vwanda ntangu Mpungi ya Mfumu ke wakana, ntangu ke vwanda dyaka ve. Bayina talaka mpe sekaka, bayina telamaka kuna na ntwala ya vwale ya kufunguka mpe monaka Ndinga ya Nzambi kotalana (*bayankaka* ke boka samu na Yawu, kasi, mutindu Nge tubaka, “Kuna ntangu ke mana mingi”), bawu me kwenda na Madya ya Makwela; mpe *bawu* me bikana na ngaanda na kisika ya kele na kudila, kuyawula, mpe kukwetisa meno.

<sup>360</sup> Sadisa konso muntu na kukwikila, na suka yayi, Tata; buka konso vwale ya muyimi, konso vwale ya kukondwa lukwikilu, mpe kumona Munungi ya Ngolo nyonso kumonana na ntwala ya bakwikidi. Samu, “Tala, Mu kele na beno ntangu nyonso, tii na nsuka ya yinza. Na mwa ntangu fyoti mpe yinza ke mona Munu dyaka ve, kasi beno ke mona Munu.” Lakisa Nge mosi na kati ya beto, Mfumu, mutindu Nge vwanda salaka. Vwanda kaka mutindu yina tii ntangu beto ke monana na ntwala ya Nge, ntangu *en morphe* me soba mpe Nge me kuma dyaka Mwana ya muntu, mpe Mwana ya David. Pesa yawu, Mfumu, na Nkumbu ya Yesu Klisto.

Na yina beto kele na bayintu ya beto ya kukulumusa, beto nyonso sambila.

<sup>361</sup> Mu ke kukiyufula bubu yayi kana ya kele na bayankaka awa yina . . . na kati to na ngaanda. Ya kele ve na mutindu ya kusala mbokolo na autel awa, samu kisika kele ve. Kasi mu ke kukiyufula, na kieleka, beno ke kwikila ti yayi kele Kieleka? Beno ke kwikila ti na kilumbu yayi yina beto ke na kuzinga, mpe na bakawo yayi nyonso mpe nsungi ya science mutindu vwandaka na bilumbu ya Noé, na bilumbu ya Moise, na bilumbu ya Klisto, ti Nzambi, Tata ya nene ya beto nyonso beto bayina me butuka na kati ya Yandi, kele ya kutelama na kati-kati ya beto bubu yayi?

<sup>362</sup> Dikunzi yayi ya Tiya yina science me pesa kimbangi, bamvula mingi me luta, ntangu mu vwandaka mwa mwana ya bakala, zonzaka na munu kuna mpe tubaka na munu ti mu ke zinga kaka awa, mpe yina zolaka salama. Mu tubilaka beno yawu, mpe kuna Yawu . . . Kilumbu mosi kuna na nzadi, ntete ministere kubanda, na reveil ya ntete, Yandi monikaka na mazulu, kukifwanikisaka Yandi mosi mpe pesaka kosalu. Bamvula nyonso yayi mu bumbaka yawu na kati ya ntima ya munu, vwandaka bumba Klisto, Dikunzi mosi ya Tiya ke na kutendulaka Ndinga, mutindu ba silaka. Beto kele na kilumbu ya nsuka, kaka na Nkwizulu ya Mfumu. Mpe kana beno tala beno mosi na ngaanda ya vwale yina, kuvwanda na ngaanda kele lufwa na, beno zola na nzila ya lukwikilu, na suka yayi, kutuba,

“Na lusalusu ya Nzambi. Mpe na lusalusu ya Nge, Mfumu, mu zola pasula vwale yina. Mu zola kukota kisika Nge kele, samu na kumona Ndinga ya muvimba ya Nzambi”?

<sup>363</sup> Beno meka ve na kuvwanda Moise mosi. Beno meka ve na kuvwanda Aaron mosi. Ve. Beno vwanda kaka yina beno kele, kasi beno vwanda Muklisto.

<sup>364</sup> Beno zola, na bayintu ya beno ya kukulumusa, beno telemisa maboko ya beno na Nzambi, mpe beno tuba, “Mfumu Nzambi, sadisa munu na kati ya vwale”? Nzambi sakumuna nge. Nzambi sakumuna nge. Ya kele, beno tala kaka maboko!

<sup>365</sup> Na ngaanda, beno bambuka moyo, mu lendaka mona diboko ya beno ve. Ya kele ve—ya kele ve mfunu mingi samu na munu na kumona yawu, na mutindu nyonso; ya kele, na Nzambi. Ya ke kaka, samu na munu, ya ke sala munu kaka kumona ti Nkuna me kubwa kisika mosi, mpe, kasi Nzambi ke mona ntima ya kieleka.

<sup>366</sup> Kana ya kele na bayankaka dyaka yina vwanda me telemisa ve maboko ya bawu, ke zola kutelemisa ntangu yayi, beno telemisa maboko ya beno mpe ba ke bambuka na beno na kisambu. Beno telemisa maboko ya beno. Nzambi sakumuna nge. Yina kele mbote. Nzambi sakumuna nge.

<sup>367</sup> Tata, beto ke sambila bubu yayi ti bayayi, Mfumu, bayina me luta ntete ve na vwale yina. Bawu kele ya kutelama kuna na ngaanda mutindu Israël; bawu ke na kutalaka. Bawu ke kwikila, kasi bawu ata fyoti ve me kota ntete na kati ya Yayi, samu na kumona Nsemo yina ya nene ya Shekinah, nyonso zole na kimpeve mpe na nzutu, na mutindu ti disu mekaniki ya kamera ke na kulandila na kubaka foto; kaka balumingu zole me luta, Yawu me bakama dyaka na foto. Nge ke na kukimonisaka Nge mosi, Mfumu, Nzambi ya Ngolo nyonso ya kumonana na mukwikidi; dyaka ya kubumbama na muntu ya ntembe, kasi ya kumonana na mukwikidi.

Ti bawu sabuka, bubu yayi, Mfumu, kumona bunene ya Yandi mpe Nkembo ya Yandi. Ti bantima ya bawu kusoba ntete beto vutuka kaka na dibuundu yayi na nkokila yayi. Ti bawu nyonso kuvwanda ya kufuluka na Mpeve ya Nge, na Mvwandulu ya Nge. Ti Mulongisi kubaka lukwikilu yina kele na bawu, Yandi lutisa yawu na zulu ya Ndinga; mpe ti miziki vutuka, “Ba kubikaka nge ntete, ntete mbandukulu ya yinza, samu na kukwikila Yayi. Kwikila, mwana ya Munu, mpe kuzwa mpulusu.”

<sup>368</sup> Tata Nzambi, beto me pesa bawu na maboko ya Nge ntangu yayi, na kuzabaka ti ya kele ve na kima ya kulutila yina beto lenda sala. Ya kele nyonso na Nge ntangu yayi, Tata. Mu me pesa bawu na Nge. Na Nkumbu ya Yesu Klisto, Mwana ya Nge. Amen.

Mu zola Yandi, mu . . .  
 Samu . . .zolaka mu ntete  
 Mpe futaka mpulusu ya munu  
 Na yinti ya Calvaire.

369 Beno zola Yandi?

Mbote kele, mbote kele, Yesu samu na munu,  
 Konseye, Ntinu ya Ngemba, Nzambi ya Ngolo  
 Yandi kele;  
 Yandi me vuukisa munu, ke keba munu na  
 masumu mpe nsoni nyonso,  
 Mbote kele Mukudi ya munu, lukumu na  
 Nkumbu ya Yandi!

Mu vwandaka mbala mosi ya zimbana, ntangu  
 yayi mu me talana, ya kimpwanza na  
 kitumbu,  
 Yesu ke pesa kimpwanza mpe mpulusu ya  
 kieleka;  
 Ke vuukisa munu, ke keba munu na masumu  
 mpe nsoni nyonso,  
 Mbote kele Mukudi ya munu, lukumu na  
 Nkumbu ya Yandi!

Oh, mbote kele, mbote kele, Yesu samu na  
 munu,  
 Konseye, Ntinu ya Ngemba, Nzambi ya Ngolo  
 Yandi kele;  
 Oh, ke vuukisa munu, ke keba munu na  
 masumu mpe nsoni nyonso,  
 Mbote kele Mukudi ya munu, lukumu na  
 Nkumbu ya Yandi!

370 Bantu yikwa ke mona Yandi me telama, Munungi ya Ngolo  
 nyonso, Ndinga me kuma muntu, ya kumonana na ntuala ya  
 beto; Alpha, Omega; Yandi yina Vwandaka, Yina Kele, mpe Ke  
 Kwiza; Nsimbulu mpe Nkuna ya David; vwandaka Mwana ya  
 muntu, Mwana ya Nzambi, Mwana ya muntu, mpe ke vwanda  
 Mwana ya David? Beno ke kwikila Yawu na ntima ya beno  
 nyonso? Ke monana Yandi mosi na konso nsungi, samu na  
 kutalana na mukwikidi, ke bumbama Yandi mosi na kati ya  
 nzutu ya muntu samu na muntu ya kukondwa lukwikilu. Yandi  
 kele ya kubumbama na manima ya vwale. Ti Nzambi buka konso  
 vwale, mpe beto mona Yandi mutindu Yandi kele!

Yesu ke buka konso miniololo,  
 Yesu ke buka konso miniololo,  
 Oh, Yesu ke buka konso miniololo,  
 Ntangu Yandi ke pesa nge kimpwanza!

Na lweka yankaka ya Jourdain,  
 Na bilanga ya kitoko ya Eden  
 Kisika Yinti ya Luzingu ke basisa bafelele,  
 Ya kele na kupema samu na munu.

Yesu ke buka . . .

Beno zola ve kusabuka Jourdain ntangu yayi? Ya me kuma bilumbu mingi na ntoto ya kuyuma? Beto kota na bansilulu!

Yesu ke buka konso miniololo,  
 Yesu ke buka konso miniololo,  
 Oh, ntangu Yandi ke pesa nge kimpwanza!

371 Beto telemisa diboko ya beto ntangu yayi.

Mu ntangu nyonso, ntangu nyonso ke kumisa  
 Yandi,  
 Mu ntangu nyonso, ntangu nyonso ke kumisa  
 Yandi,  
 Mu ntangu nyonso, ntangu nyonso ke kumisa  
 Yandi,  
 Samu Yandi ke pesa munu kimpwanza!

372 Amen! Yina ke sala ve beno kuwa mbote? Oh, mutindu mbote! Mutindu mbote, Yandi kele ve, kuna? Beto pesana mbote mosi na yankaka ntangu yayi, na kutubaka:

Yesu ke buka konso miniololo,  
 Yesu ke buka konso miniololo,  
 Oh, Yesu ke buka konso miniololo, (Nzambi sakumuna nge, mpangi ya bakala.)  
 Oh, mpe Yandi ke pesa nge kimpwanza!

Mu ntangu nyonso, ntangu nyonso ke kumisa  
 Yandi, (Nzambi ya Ngolo nyonso!)  
 Mu . . .

“Mutindu mosi mazono, bubu yayi, mpe ntangu nyonso,” me soba kaka nzutu ya Yandi.

. . . kumisa Yandi,  
 Mu ntangu nyonso, ntangu nyonso ke kumisa  
 Yandi,  
 Samu Yandi kele (me katula ba-credo nyonso na munu) me pesa munu . . . (na kukwikila Ndinga ya Yandi).

373 Oh, beno lenda ve kuwa Violon ya Mulongisi kuluta, mwa yinti yina ya kubula muziki na zulu ya Ndinga yayi? Yandi kele mutindu mosi mazono, bubu yayi!

Mu ntangu nyonso, ntangu nyonso ke kumisa  
 Yandi,  
 Mu ntangu nyonso, ntangu nyonso ke kumisa  
 Yandi,  
 Mu... (Yandi, Ndinga!)... ntangu nyonso,  
 ntangu nyonso ke kumisa Yandi, (Yinki Yandi  
 salaka?)  
 Samu Yandi ke pesa (na manima ya rido) munu  
 kimpwanza!

<sup>374</sup> Lukumu na Nzambi! Mu zola Yandi. Beno zola Yandi  
 ve? Yayi kele Mazulu ve? Mu ke zolaka binamina yina ya  
 Ndinga, beno me mona, kaka Mpeve-Santu na lembami yina, na  
 mutindu ya kulemvuka. Mu—mu ke zolaka kaka Yawu. Oh, beno  
 banza kaka!

Na lweka yankaka ya Jourdain, (mu me belama  
 na kukuma kuna ntangu yayi.)  
 Na mbote... (Yina ke kufwa ve!) ya Eden,...  
 (Yinki mu ke tala kuna?)  
 Kisika Yinti ya... (yina vwandaka na nsaba ya  
 Eden) ke na kubasisa bafelele,  
 Ya kele na kupema samu na munu.

<sup>375</sup> Beno zola kwenda? Yandi ke bukaka konso miniololo.

Yesu ke buka (konso kinkulu) konso miniololo,  
 Yesu ke buka konso miniololo, (ba-  
 denomination nyonso, ba-credo nyonso)  
 ... ke buka konso miniololo,  
 Oh, ntangu Yandi ke pesa nge kimpwanza!

<sup>376</sup> Lukumu na Nzambi! Mu zola Yandi. Kuyituka ve ti Esaie  
 tubaka, “Yandi kele Konseye, Ntinu ya Ngemba, Nzambi ya  
 Ngolo nyonso, Tata ya Kukonda nsuka, ya Mbote!”

Mbote kele, mbote kele, Yesu samu na munu,  
 Konseye, Ntinu ya Ngemba, Nzambi ya Ngolo  
 kele Yandi;  
 Oh, me vuukisa munu, ke keba munu na  
 masumu mpe nsoni nyonso,  
 Mbote kele Mukudi ya munu, lukumu na  
 Nkumbu ya Yandi!

<sup>377</sup> Oh, la la! Yina ke ningisa ntima ya munu. Mutindu Yandi kele  
 mbote! Mu ke tuba na beno, ya kele ve na nsuka samu na Yayi.  
 Ya, mu me kota na Yayi ya me kuma Bamvula makumi tatu me  
 luta, ke kuwa mutindu yayi. Mpe kana Yandi vutula bilumbu,  
 kilumbu mosi mu ke kanga meso ya munu, mu ke kwenda na  
 mutindu mosi. Amen!

Mbote kele, mbote kele, Yesu samu na munu,  
 Yandi kele Konseye, Ntinu ya munu ya  
 Ngemba, Nzambi ya Ngolo Yandi kele;

Yandi me vuukisa munu, ke keba munu na  
masumu mpe nsoni nyonso,  
Mbote kele Mukudi ya munu, lukumu na  
Nkumbu ya Yandi!

<sup>378</sup> Mu lendaka vwanda awa kilumbu ya muvimba, na kati ya Yawu. Paul tubaka, “Kana mu yimba, mu ke yimba na Kimpeve.” Uh-huh. “Kana mu longa, mu ke longa na Kimpeve. Kana mu tambula, mu ke tambula na Kimpeve. Kana mu zonza, mu ke zonza na kimpeve.” Ti kima nyonso kusalama na nzila ya Ndinga mpe na Mpeve. Yinga, tata. Amen! Ya kele nyonso Kieleka ya Nzambi.

<sup>379</sup> Mu ke mona Yandi, Nzambi ya Ngolo nyonso, yina me monana. Mu ke mona Yandi kukatula ba-credo, ba-denomination; kukatula ntembe, manaka ya lukolo, mpe nyonso; kukwenda na ntwala, kutelama kuna. Beno ke banza ti ba-credo lenda nunga Yandi? Beno ke banza ti ba-denomination lenda nunga Yandi? Beno ke banza ti Lukutakanu ya Yinza lenda nunga Yandi? Yandi nungaka nyonso, bukaka konso muniololo, fungulaka difelo; bukaka kidimbu, kotaka na kisika ya kulutula Santu; me monana Yandi mosi na beto, na kuvwandaka Ndinga, mutindu mosi mazono, bubu yayi, mpe ntangu nyonso. Amen. Mu zola Yandi.

<sup>380</sup> Ntangu yayi, tii beto ke kutana na manima ya midi yayi, beto zola sala kima mosi, ya kele:

Baka Nkumbu ya Yesu na nge,  
Nge mwana ya mawa mpe ya kyadi;  
Yawu ke pesa nge nsayi mpe ngolo,  
Oh, baka yawu bisika nyonso nge ke kwenda.

Nkumbu kitoko, O Nkumbu ya mbote!  
Kivuvu ya ntoto mpe kyese ya Mazulu;  
Nkumbu ya ntalu, (Yinga, mu me kuzwa yawu,  
yimeni.) O mutindu ya kele mbote!  
Kivuvu ya ntoto mpe... (...? ...)

<sup>381</sup> Kana Satana kumeka na kumeka beno, ti beno ke na kutalaka ve na kima ya mbote, lakisa yandi Ndinga mutindu Yesu salaka. Beno me mona? Beno me mona? Amen!

Beto ke fukimina Nkumbu ya Yesu,  
Beto ke fukama na makulu ya Yandi,  
Samu na kubyadisa Yandi ntinu ya bantinu na  
Mazulu,  
Ntangu nzyetolo ya beto ke suka.

Nkumbu ya ntalu, (Nkumbu ya Ntalu!) . . .  
Kivuvu ya ntoto mpe kyese ya Mazulu;  
Nkumbu ya ntalu, O Nkumbu ya mbote!  
Kivuvu ya ntoto mpe kyese ya Mazulu.

<sup>382</sup> Billy ke vwanda awa, na kutala na ngunga ya sambanu, samu na kukabula bakalati ya bisambu samu na bayina zola kwiza na ndonga ya bisambu. Mu banza ti beto ke sala mbote na kusala yawu. Beto zolaka sala yawu ve, kasi, samu na lutangu ya bantu, beto ke sala mbote na kusala yawu, beno me mona.

<sup>383</sup> Ntangu yayi beno bambuka Yandi! Beno bumba Yandi ntangu nyonso na mabanza ya beno, na kati ya ntima ya beno. Kisika nyonso beno ke kwenda, beno me mona, beno bumba Yesu na mabanza ya beno.

Baka Nkumbu ya Yesu (Ntangu yayi beno kuwa.) beno,

Mutindu kinwaninu ya ngolo; (Yinki ke salama?)

Ntangu mpukumunu ke kwiza, (Yinki beno fwana sala?)


Beno niunguta kaka Nkumbu yina ya santu na kisambu.

Nkumbu ya ntalu, (Nkumbu ya Ntalu!) O Nkumbu ya mbote!

Kivuvu ya ntoto mpe kyese ya Mazulu;

Nkumbu ya Ntalu, O Nkumbu ya mbote!

Kivuvu ya ntoto mpe kyese ya Mazulu.

<sup>384</sup> Beto kulumusa bayintu ya beto ntangu yayi. Mu ke lomba na pasteur kana yandi lenda kwiza samu na kusukisa lukutakanu. Mpangi Neville, Nzambi sakumuna nge, Mpangi Neville. 



*NZAMBI ME MONANA* KNG64-0614M  
(The Unveiling Of God)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 14 ya Ngonda ya sambanu, na mvula 1964, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)